

سنتون را کوم

تعارف

آي شاستر لکڻ آلو سنت لوقا هې. جکي لوقا رو انجيل شاستر پي لکيو. سنت لوقا پرچار ري کوم ۾ سنت پولوس پيڙو هتو هان اوني تموم

گهڻا گهمرا سنت پولوس پيڙا سفر پي ڪيئا. سنت لوقا آي شاستر اندازن سن 60 شون 65 عيسوي ري بچ ۾ لکيو هتو. اوني خوشي ري خبر ري

پرچار ري باري ۾ لکيو جڪو يروشلم شهر شون شروع هوئي الگي ملڪون توڻي پگي.

ايئي شاستر ۾ وشواسيون ني پويتر آتما ملڻ هان اوني را کوم خاص سنتون را پرچا هان پرچارم وشواسيون را ڏک، پولوس رو پريو يسوع تي

وشواس هان بيخي قومون ۾ پرچار ري باري ۾ لکيوڙو هې.

خاص مضمون

14-1:1 پويتر آتما رو واعدو هان پريو يسوع رو آڪاش تي جاوڻ

26-15:1 يهودا اسڪرپوتي ري جگها متيا ني چونڊڻ

3:8-1:2 وشواسيون ني پويتر آتما ملڻ هان يروشلم ۾ خوشي ري خبر رو پگڻ

25:12-4:8 بيخي علائقون ۾ خوشي ري خبر رو پگڻ هان پولوس رو پريو يسوع ني منڻ

28:14-1:13 سنت پولوس رو پيلڪو سفر هان بيخي قومون ۾ پرچار

35-1:15 يروشلم شهر ۾ اجلاس

22:18-36:15 سنت پولوس رو بيجو سفر

16:21-23:18 سنت پولوس رو تيجو سفر

31:28-17:21 سنت پولوس ري گرفتاري هان قيد

پويتر آتما ميلن رو واعدو

1

¹ پيارا ٿيو فلس، مهِي آيري پيلڪي شاستر ۾ اُوئي سَجِي باتون ري باري ۾ لڪيو هتو، جڪو پريو يسوع شروع شون لي اُوئي تيم توڻي ڪرتو هان شيڪاوتو رهيو، ² جتري توڻي او آڪاش تي ڪونهي گيو- آڪاش تي جاوڻ شون پيل پريو يسوع آيري چونڊيوڙي سنتون ني پويتر آتما ري وسيلي حڪم ڏينا هتا ڪه اُوئون ني ڪي ڪرڻو هي- ³ پريو يسوع شولي تي آيري جان ڏيوڻ شون پچي جيتو هوئي چاليه ڏنون توڻي اُوئون ني درشن ڏيتو رهيو هان ايشور ري بادشاهي ري باتون سُٿاوتو رهيو-

⁴ جڏي پريو يسوع آيري چيلون پيڙو هتو، تو اُوئون ني حڪم ڏينو ڪه، ”يروشل شهر شون باهر ني جايا، پڻ مهاري پتا ري ڏينوڙي واعدِي رو پوري هوڻ رو انتظار ڪريا، جڪي ري باري ۾ مهِي توڻي پيل سُٿايو هي، ⁵ ڪيونڪه يوحنا تو پوڻي شون پويتر سنون ڏيتو، پڻ ڪئينڪه ڏنون شون پچي توڻي پويتر آتما شون پويتر سنون ڏينو جاشي-“

پريو يسوع رو آڪاش تي جاوڻ

⁶ پچي خاص چيلا جڪو اوڻ پيڙا هتا، اُوئون پريو ڪه، ”اي پريو، ڪي ٿي هتون اسرائيلي قوم ني بادشاهي پاچي ڏيراشو؟“ ⁷ پريو يسوع اُوئون ني ڪهيو ڪه، ”اينون باتون ري باري ۾ خبر ليوڻ ٿونرو ڪوم ڪونهي، ڪيونڪه اي آڪاشي پتا ري هات ۾ هي- ⁸ پڻ جڏي پويتر آتما تون تي اُترشي، تو توڻي همت ملشي هان ٿي يروشلم شهر، سجي يهوديا هان سامريا صوبي ۾، پڻ سجي دُنيا ۾ مهارا گواهي ڏيوڻ آلا هوشو-“ ⁹ اي ڪيوڻ شون پچي اُوئون ري ڏيڪتي ڏيڪتي ايشور، پريو يسوع ني آڪاش ماتي ڪي ليو هان باڏل اُوئي ني لڪائي چيوڙو- ¹⁰ جڏي خاص چيلا پريو يسوع ني آڪاش ڏيشا جوتي ڏيڪتا پڙيا، تو اوچتو بي آڏمي چمڪيلا گاڀا پريوڙا اُوئون شومها آئي اُيا- ¹¹ اُوئون آڏميون ڪهيو ڪه، ”اي گليل آتون، ٿي آڪاش ڏيشا ڪيون جوڻو پڙيا؟ شاگي پريو يسوع جڪو ٿونري شومهو آڪاش ڏيشا گيو هي، اُوئج نموني او پڙي پاچو آشي، جون تون اُوئي ني آڪاش ماتي جاوتو ڏينو هي-“

¹² پچي خاص چيلا زيتون ري جبل شون پاچا يروشلم شهر گيا- اي جگها شهر شون اندازن هيڪ ڪلو ميتر الگي هي- ¹³ او يروشلم شهر ۾ پڻا هان او هيڪي گهر ري ماتي ڪمري ۾ گيا، جيت بطرس، يوحنا، يعقوب، اندرياس، فلپس، توما، برتلمائي، متي، حلفي رو ڏيڪرو يعقوب، شمعون وطن دوست هان يعقوب رو ڏيڪرو يهودا، اي سچائي ريتا- ¹⁴ اُوئون سنتون پيڙا پريو يسوع را پائي، اُوئي ري ما مريم هان ڪئين لگائي پي هتي- او سچائي پيڙا هوئي پراٿا ڪرتا رهيا-

يهودا اسڪرٽوري ري جگها متيا ني چونڊڻ

15 هيڪ ڏن جڏي پريو يسوع ني منڻ آلا اندازن هيڪ سئو بيش منڪ هيڪي جگها تي پيڙا هتاهه، تو بطرس اوئون ري بچ ۾ اُپي ڪيوڻ لاگو ڪم،

16 ”اي وشواسيون، دائود بادشاهه آپري شاستر ۾ پويتر آتما شون يهودا ري باري ۾ پيل جڪو ڪهيو هتاهه، او شاجيلي پورو هوڻو هتاهه. يهودا او هتاهه

جڪي پريو يسوع ني جهلاوڻ آئون ري اگووڻي ڪي. 17 او مهون سنتون مئيلو هتاهه هان او ايشور ري شيوا ري ڪوم ۾ مهون پيڙو هتاهه.“

18 پريو يسوع ني جهلاوڻ را رُپيا جڪو يهودا ني مليام، اوئي شون اوئي بني لي. اوٽ آپرو آپني قاشي ڏيني هان اونڌي موڏي ڪرڻ شون مري گيو. اوئي

رو پيت قاتو هان شجائي اونترا باهر نڪريا. 19 جڏي يروشلم ري شجي منڪون سُٽيو، تو اوئون آپري بولي ۾ اوئي بني ني هقل دما ڪهيو. (هقل دما

رو مطلب هي ”خون ري بني.“)

20 پچي بطرس ڪهيو ڪم، ”زبور شاستر ۾ اي لڪيوڙو هي ڪم،

’اوئي رو گهر ڪالي هوئي جاوي

هان اوئي ۾ ڪو پي ريوڻ آلو ني ري.“

اي پي لڪيوڙو هي ڪم،

’ڪو بيجو اوئي ري جگها تي ايشور ري شيوا رو ڪوم ڪري.“

21 ايئي ري ڪري اي ضروري هي ڪه يهودا ري جگها هيڪ اهڙو منڪ چونڊيو جاوي، جڪو مهون پيڙو هوئي پريو يسوع ري مرڻ هان جي اُنڻ

ري گواهي ڏي، 22 يعني پريو يسوع رو يوحنا شون پويتر سنون ليونڻ شون لي آڪاش تي جاوڻ توڻي.“

23 پچي اوئون بيئون منڪون را نون ڏينا. هيڪي رو نون يوسف هتاهه، جڪي ني برسبا هان يوسٽس پي ڪيتا هان بيجي رو نون متيا هتاهه. 24 پچي اوئون

پراٽا ڪي ڪم، ”اي پرميشور، تُو تو شجون را من اولڪي هي. مهوني سُٽا ڪه ٿي ايئون بيئون ۾ ڪيني چونڊيو هي؟ 25 ڪه او سنت هوئي تاري

شيوا رو ڪوم ڪري، جڪي ني يهودا چوڙي آپري مارگ ڏيشا گيو هي.“ 26 پچي سنتون اوئون ري نون را پُڪا گهاتيا هان او پُڪو متيا ري نون رو

نڪريو. پچي او اگباري سنتون پيڙو شامل هويو.

وشواسيون ني پويتر آتما ملڻ

1 جڏي پينتيڪوسٽ رو ڀرڀ آيو، تو شجائي وشواسي هيڪي جگها تي پيڙا هويا. 2 جيٽ او بيٺا هتاهه، اوٽ اوچتو آڪاش شون تيز بائيري

2 جهڙو آواز آيو، جڪي شون شجو گهر پريجي گيو. 3 اوئون ني باشڏي ري جهال آئي ڪار زبونون ڏيڪيجڻ ۾ آئي، جڪو ڌار ڌار هوئي هر

هيڪ ماڻي آئي آئي. 4 او شجائي پويتر آتما شون پريجي گيا هان او پويتر آتما ري طاقت شون ڌار ڌار ٻولي ٻولڻ لاگا.

⁵ اُوئي تيم يروشلم شهر ۾ دُنيا ري هر هيڪ مُلڪ شون يهودي آيوڙا هئا، جڪو ايشور شون پيناجن آلا منڪ هئا. ⁶ جڏي اُوئون آي آواز شُتيوم، تو او شجائني هيڪي جگها تي پيڙا هويا. او حيرون هويام، ڪيونڪ هر هيڪ منڪ آپري آپري بولي شُتن لاگو. ⁷ او حيرون هوني حيرت ۾ ڪيوڻ لاگا ڪم، ”جوئو، ڪي آي شجائني بولڻ آلا گليل صوبي را ڪونهي؟“ ⁸ پڇي ڪيئون آپون ۾ هر هيڪ آپري آپري مُلڪ ري بولي شُتي پڙيو؟ ⁹ آبي تو ايئون مُلڪون را ريوڻ آلا هون، يعني فارس، ماديا، عيلام، مسوپتاميا، يهوديا، ڪُڊڪيا، پينطس، آسيا، ¹⁰ فروگيا، پمفليا، مصر هان ليا جڪو ڪريني ڏيشا هي. ايئي شون تال روم مُلڪ شون آيوڙا پرديسي پي هي، ¹¹ جڪون ۾ ڪئين يهودي، ڪئين نونا يهودي هان ڪئين ڪريني هان عرب علائقي را هي، پڻ تو پي آبي آپري آپري بولي ۾ اُوئون شون ايشور ري موتي موتي ڪومون ري باري ۾ شُتون پڙيا. ¹² آي شجو ڪئين ڏيڪي، او حيرون هان پريشون هوني هيڪي پيڇي شون پوڇڻ لاگا ڪم، ”آي ڪي هي؟“ ¹³ پڻ ڪئينڪ منڪ وشواسيون تي هاشا ڪري ڪيوڻ لاگا ڪم، ”آي تو نشي ۾ هي.“

پطرس رو پڙيو يسوع هان پويتر آتما ري باري ۾ شُتاوڻ

¹⁴ پڇي پطرس اڳيارون سنتون پڙيو اُنيو هان زور شون منڪون ني ڪيوڻ لاگو ڪم، ”اي يهوديون هان يروشلم ري شجي منڪون، ڪون ڪولي مهاري بات شُتو، تو هون توني شمجهائون. ¹⁵ مهني نشي ۾ ڪونهي هون، ڪيونڪ آجون تو شاڪلي پور را اندازن نئو هويا هي. ¹⁶ پڻ آي او بات هي

جڪي ري باري ۾ يوايل نبي اگڪتي ڪي هتي ڪم،

¹⁷ ايشور ڪي هي ڪه آخري ڏنون ۾ ايئون هوشي

ڪه هون آپرو پويتر آتما هر هيڪ منڪ تي ميلين

هان تونرا ڏيڪرا هان ڏيڪري مهارو نياپو ڏيشي

هان تونرا جوان درشن ڏيڪشي

هان تونرا ڏوڪرا شينا ڏيڪشي.

¹⁸ هون آپري بونهون هان بونهيون تي،

اُوئي ڏنون ۾ آپري آتما ميلين

هان او مهارو نياپو ڏيشي.

¹⁹ هون آڪاش تي عجيب ڪوم

هان ڌرتي تي نشوتي،

يعني لوني، باشدي هان ڏونئي آلا باڏل بتائين.

20 سُورج رو اُجالو ختم هوئي جاشي

هانَ چندر رو رنگ لوي جهڙو هوئي جاشي.

پڇي پرميشور رو موتو هان مهما آو ڏن آشي.

21 پڇي ايئون هوئي ڪه جڪو پي پرميشور رو نون ليشي،

تو اُوئي ني مُگتي ملشي.

22 اي اسرائيلي قوم آون، آي باتون شتو ڪه يسوع ناصري ني ايشور ميليو ڪه او ٿون تي اُون پرجون، عجيب ڪومون هان نيشونون شون ثابت

ڪري، جڪو ايشور اُوئي ري وسيلي بتايا. ٿوني ايئون باتون ري شني نموني خبر هي. 23 جهڙي نموني ايشور پيل فيصلو ڪيو هتو هان اُوئي ني پيل

خبر هتي، اُوئي نموني ٿون پريو يسوع ني جهلايو هان اُوئي ني پيچي قوم ري هاتون شولي تي چڙهائي مرائي چوڙيو. 24 پڻ ايشور اُوئي ني مرڻ شون

پڇي پڙي جيتو ڪيو، ڪيونڪه ايئون هوئي ڪونهي شگهتو ڪه موت پريو يسوع ني آپري قبضي ۾ راڳي. 25 ڪيونڪه داؤد بادشاهه پريو يسوع

ري باري ۾ ڪهيو ڪه،

’مهني پرميشور ني هميشا آپ آگهي ڏينوم

ڪيونڪه او هميشا مهني پيڙو هي،

ايئي ري ڪري هون بيٺاجڻ آو ڪونهي.

26 مهارو من خوش هي

هان هون ٿاري ٻڌائي ڪرون هون.

مهارو وشواس هي ڪه ٿو مهاري شري ني پڙي جيتو ڪري.

27 ٿو مهاري آتما ني مونڙون ري جگت ۾ ريوڻ ڪونهي ڏي

هان نڪو آپري پويتر شيوادار ني مڪوم ۾ سڙڻ گڙڻ ڏي.

28 ٿو مهني زندگي رو مارگ بتائي.

ٿو مهني پيڙو ري هي، تو هون تموم گهڻو خوش هون.

29 اي پايون هان بينون، هون ٿوني وشواس شون ڪونه هون ڪه شاستر ري آي بات اسرائيلي قوم ري آگوڻ داؤد بادشاهه ري باري ۾ ڪونهي،

ڪيونڪه او مونڙو هان اُوئي ني مڪوم ۾ پريو هان اُوئي رو مڪوم آج ڏن ٿو هي. 30 داؤد بادشاهه نبي هتو ايئي ري ڪري اُوئي ني خبر هتي

ڪه ايشور شونش لي واعدو ڪيو هتو ڪه، 'هُون ٿاري پيڙهي ۾ هيڪي ني ٿاري بادشاهي ڏين-،'³¹ دائود بادشاهه، مسيح ري جي اُنڙ ري باري ۾ اگڪي ڪي هان سُٿايو ڪه،

'ايشور اُوئي ني موٽوڙون ري جگت ۾ ريوڻ ڪونهي ڏينو،

هان نڪو اُوئي ري شير ني مڪوم ۾ سڙڻ گڙڻ ڏينو-،'

³² ايني نموني پريو يسوع ني ايشور پري جيتو ڪينو، جڪي را مهني شجائي گواه هون-³³ ايشور اُوئي ني بادشاهي ڪرڻ ري شارو آپري شاجي

پاشي پيشاڙيو- پچي ايشور آپري واعدِي تي پريو يسوع ري وسيلي مهوني پويتر آتما ڏينو-³⁴ دائود بادشاهه آپ تو آڪاش تي ڪونهي گيو، پڻ اُوئي ڪهيو ڪه،

'پرميشور مهاري پريو ني ڪهيو ڪه،

تو مهاري شاجي پاشي پيش-

³⁵ جتري توڻي هون ٿارا دشمن هرائي

اُونون ني ٿارا غلوم ني ڪرون-،'

³⁶ ايني ري ڪري شجائي اسرائيلي پڪ شمجهي ڪه جڪي پريو يسوع ني اُونون شولي تي چاهي ماريو هتو، اوج ايشور ري طرفون پريو هان مسيح هي-،"

³⁷ جڏي منڪون اي سُٿيوم تو اُونون ني تموم گهڻو ڏک هيو هان اُونون پطرس هان باقي سنتون شون پوچو ڪه، "پايون، مهني همي ڪي ڪرون؟"

³⁸ تو پطرس اُونون ني ڪهيو ڪه، "پايون شون توبهون ڪرو هان يسوع مسيح ري نون شون پويتر سنون لئو، تو ايشور ٿونرا پاپ معاف ڪرشي هان

ايشور ري طرفون ٿوني پويتر آتما ملشي-³⁹ ايشور رو اي واعدو ٿون شون، ٿونري پيڙهي هان الگي ريوڻ آئي منڪون شون هي، جڪون ني پرميشور آپو ايشور آپ ڪيدي آٿاشي-،"

⁴⁰ پطرس اُونون ني تموم گهڻي باتون سُٿائي شمجهايا ڪه او آرو آبي ايني بچڙي قوم ني ملڻ آئي سزا شون بچاوي-⁴¹ پچي جڪي منڪون پطرس

ري ايئون باتون رو وشواس ڪينو، اُونون پويتر سنون لئو هان اُوئي ڏن اندازن تين هزار منڪ پريو يسوع را چيلا هويا-⁴² اُونون آرو تيم سنتون شون شيڪڻ، ميل جول راکڻ، پريو يسوع ري ياد ۾ بائي ڪاوڻ هان پراتنا ڪرتا رهيا-

وشواسي مندلي

⁴³ پچي ايشور سنتون ري هاڻون تموم گهڻا پرچا هان عجيب ڪوم بتايا هان شجائي منڪ اي جوئي حيرون هتا-⁴⁴ شجائي وشواسي هيڪي جگها

تي ريتا هان هر هيڪ شي ۾ هيڪ جهڙا پائيوار هتا-⁴⁵ ايني نموني او آپري مال ملڪيت بيچي شجون ري ضرورتون پوري ڪرتا-⁴⁶ او هر روز هيڪ

من هوئي ايشور ري گهر ۾ پيڙا هوتا هان آبري گهرون ۾ سادي نموني هان خوشي شون بائي کاوتا. 47 او ايشور ري بکوڻ ڪرتا هان اسرائيلي قوم را بيجا منڪ اونون ري عزت ڪرتا. هرور جڪون منڪون ني مگتي ملتي، پريو اونون ني وشواسي مندلي ۾ شامل ڪرتو.

پطرس رو پونگڙي ني شاجو ڪرڻ

3¹ هيڪ ڏن پطرس هان يوحنا بيبار رو تيني بجي پراٿنا ڪرڻ ري شارو ايشور ري گهر ڏيشا جاوتا پڙيا. 2 او جڏي اوت پڳام، تو ايشور ري گهر ري فوٽري در تي هيڪي جنم ري پونگڙي ني بينوڙو ڏينوم، جڪو مئين جاوڻ آتون شون خيرات مونگنو پڙيو. منڪ هرور اوئي ني اوت پيشاڙي جاوتا. 3 جڏي اوئي پطرس هان يوحنا ني ايشور ري گهر ۾ جاوتي ڏينام، تو اونون شون خيرات مونگي. 4 پطرس هان يوحنا اوئي ني ذهيون شون ڏينو هان پطرس اوئي ني ڪهيو ڪم، ”مهون ڏيشا جو.“ 5 تو پونگڙو ايئون شمجهو ڪه او مهني ڪئين ڏيشي. 6 پطرس اوئي ني ڪهيو ڪم، ”شونو چوندي، تو مهني ڪيدي ڪونهي، پڻ جڪو مهني ڪيدي هي، او تني ڏيون هون. يسوع مسيح ناصر ري نون شون گهم ڦر.“ 7 پڇي اوئي رو شاجو هات جهالي اوئي ني انايو هان اونيج تيم اوئي ري تونگيون ۾ طاقت آئي. 8 او تپ ڏي انيو هان بيوڻ لاگو. پڇي او ناچتو هان ايشور ري بدائي ڪرتو اونون پيڙو ايشور ري گهر ۾ گيو. 9 جڏي شجي منڪون اوئي ني ڦرتو هان ايشور ري بدائي ڪرتي ڏينوم، 10 تو اوئي ني اولڪيو هان ڪيوڻ لاگا ڪم، ”آي تو اوج هي، جڪو باهر ايشور ري گهر ري فوٽري در تي پنتو.“ او آي شجو واقعو جوئي تموم گهڻا حيرون هويا.

پطرس رو ايشور ري گهر ۾ پرچار

11 جڏي او منڪ پطرس هان يوحنا ني جهالي شليموني نون ري پروندي ۾ ايو هتوم، تو شجائي منڪ تموم گهڻا حيرون هويا هان ناشتا اونون ڪيدي آيا. 12 پطرس آي جوئي منڪون ني ڪهيو ڪم، ”اي اسرائيلي قوم آتون، تي ايئي منڪ ني جوئي ڪيون حيرون هويا هو هان مهوني ڪيون ايئون جوئو پڙيا ڪه مهني ڌرمي هون، جون مهون آبري طاقت شون ايئي ني شاجو ڪيو هي؟ 13 نام پڻ ايئي ني شاجو ڪري ايراهيم، اضحاق هان يعقوب ري ايشور يعني مهوري باب ڏاڏي ري ايشور، آبري بونهي پريو يسوع ني عزت ڏيني هي. اونيج پريو يسوع ني تون جهلايو هتو هان جڏي پلاطس اوئي ني چوڙڻ رو فيصلو ڪيو، تو تون اوئي آگهي انڪار ڪيو. 14 پريو يسوع تو نيك هان پويتر هتوم، پڻ تون اوئي ني رد ڪيو هان پلاطس ني منٽ ڪي ڪه او تونري شارو هيڪي خوني ني ڦنو ڪري. 15 تون تو زندگي ري مالڪ ني مرائي چوڙيو، پڻ ايشور اوئي ني مونوڙون شون جيتو ڪيو هان مهني ايئي بات را گواه هون. 16 تي ايئي پونگڙي ني جوئو پڙيا هان اولڪو هوم، ايئي ني پريو يسوع تي وشواس راکڻ شون همت ملي هان شاجو هوئي تون آگهي ايو هي. 17 اي پايون هان بينون، مهني خبر هي ڪه جڪو ڪئين تون هان تونري سردارون، پريو يسوع شون ڪيو، او بنا شمجهي ڪيو. 18 پڻ ايشور او شجي باتون پوري ڪئي جڪو اوئي آبري نيون ري موڏي شون ڪئي هتي ڪه اوئي رو چونديوڙو مسيح ڏڪ ڏيڪشي. 19 ايئي ري ڪري تي آبري پايون شون توبهون ڪرو هان ايشور ڪيدي آتم، تو او تونرا پاپ معاف ڪري 20 هان پرميشور ري طرفون اهڙا ڏن آوي، جڪي شون توني شڪ ملي. او پريو يسوع ني پڙي ميلشي جڪو مسيح هان تونري شارو چونديوڙو هي. 21 پڻ آي ضرور هي ڪه پريو

یسوع اُوئي تيم توتی آکاش تي ري، جتري توتی ايشور شجو کين نوتو ني کري. ايئي ري باري م ايشور آپري پوتير نبون ري وسيلي پيل شون کھيو هتو. ²² کيونکه موسي کھيو هتو کم، ’پرميشور تونرو ايشور تونري پايون م تونري شارو مهي جهتو هيک نبي ملشي. او جکو کين توني کي، تي اوتی ري منيا. ²³ جکو منک اوتی ني ري بات کونهي مي، تو اوتی ني ايشور ري چونديوڙي قوم شون کاڍي متايو جاشي.‘
²⁴ سيموئيل شون لي لارلي شجي نبون، ايئون ڏنون ري باري م شتايو هي. ²⁵ تي نبون را اولاد هو هان او وچن تونري شارو پي هي، جکو ايشور تونري باب ڏاڏي شون کيئو، جڏي اوتی ايراهيم ني کھيو هتو کم، ’تاري اولاد شون ڏنيا ري شجي قومون ني برکت ملشي.‘ ²⁶ ايشور آپري بونهي ني چونديو پيل تون کيڍي ميليو که تون م هر هيک ني آپري چونڊي شون قيرائي برکت ڏي.‘

پطرس هان يوحنا درمي پنچائيت آگهي

4
¹ جڏي پطرس هان يوحنا منکون شون باتون کرتا پڙيام، تو ايشور را پوجاري، ايشور ري گهر رو فوج رو صوبيدار هان صدوقي پنت آلا اوتون کيڍي آيا. ² او ايئي بات ري کري تموم گھڻا ريش م هتام کيونکه او منکون ني شيکاوتا هان پرچار کرتا که پريو يسوع مونوڙون شون جيتو هوپو هي. ³ ايئي ري کري اوتون پطرس هان يوحنا ني جهاليا هان اوتون ني بيجي ڏن ساکڻي توتی جبل م راکيام کيونکه شام هوئي هتي. ⁴ تو پي تموم گھڻون منکون سنتون رو پرچار شتي وشواس راکيو. اوتون م رگو آدمي اندازن بونچ هزار هتا.

⁵ پيجي بيجي ڏن شجائي يهودي سردار، آگوڻ هان درمي گرو يروشلم شهر م درمي پنچائيت ري شارو پيڙا هويا. ⁶ اوتون م ايشور ري پوجاريون رو سردار حنا هان اوتی ري خاندان شون کائنام يوحنا، سکندر هان بيجا منک پي پيڙا هتا. ⁷ اوتون پطرس هان يوحنا ني آپ کيڍي اٿائي پوچو کم، ’تون ايئي پونگڙي ني کهڙي طاقت شون هان کيري نون شون شاجو کيئو هي؟‘ ⁸ تو پطرس پوتير آتما شون پريجي اوتون ني کيوڻ لاگو کم، ’اي يهودي سردارون هان آگوڻون، ⁹ جي آج مهوني ايئي ري کري پوچا گاچا کرڻ ري شارو ايت لي آيا هو که مهون هيکي پونگڙي ني شاجو کري، اوتی شون پلائي کي هي، ¹⁰ تو تون شجون ني هان شجي اسرائيلي قوم ني خبر هوڻڻ کيڻي که آي منک يسوع مسيح ناصر ري نون ري قدرت شون شاجو هوئي تون آگهي آيو هي. پريو يسوع اوج هي، جکي ني تون شولي تي چاهيو هتو، پڻ ايشور اوتی ني مونوڙون شون جيتو کيئو

¹¹ هان جکي ري باري م لکيوڙو هي کم،

’جکي پتر ني کارينگرون بيکار شمجهوم

اوج شجون شون خاص پتر هوپو.‘

¹² بيجو کو پي کونهي جکي شون مگني ملي، کيونکه آکاش هينا منکون ني پريو يسوع شون تال بيجو کو پي نون کونهي ڏينوڙو، جکي

شون مگني ملي.‘

13 جڏي اُوئون پطرس هان يوحنا ري دليري ڏيئي، تو تموم گهڻا حبرون هويام، ڪيونڪه اُوئون ني خبر پڙي ڪه آي تو آڻ پڙهيا هان شادا منڪ هي، پڻ او پريو يسوع پيڙا ريتا. 14 پڇي اُوئون پطرس هان يوحنا ني ڪئين ڪونهي ڪهيو، ڪيونڪه جڪو پونگڙو شاجو هويو هتو، او پي اُوئون پيڙو ايو هتو. 15 پڇي ڌرمي پنچائيت پطرس هان يوحنا ني اوڻ شون باهر جاوڻ رو ڪهيو هان آبت ۾ صلاح ڪرڻ لاگا ڪه، 16 ”هتي آبي ايتون شون ڪي ڪرون؟ ڪيونڪه يروشلم ري سڄي منڪون ني خبر هي ڪه ايتون هيڪ موتو پرچو بتايو هي هان ايون ني پي آي بات منڻي پڙشي. 17 پڻ تو پي اڻڻي مرضي ڪونهي ڪه آي بات منڪون ۾ گهڻي مشهور هوي. ايتي ري ڪري آي پلو هوشي ڪه اُوئون ني بيٺاري ڪونه ڪه او بيڃي گهمري يسوع رو نون لي پرچار ني ڪري.“

18 پڇي ڌرمي پنچائيت اُوئون ني مئين هيلو ڪرائي حڪم ڏينو ڪه، ”منڪون ني يسوع رو نون لي ڪڏي پي ني شيڪائو هان ني پرچار رو ڪوم ڪرو.“ 19 پڻ پطرس هان يوحنا اُوئون ني بلتي ڏيني ڪه، ”تي آپ فيصلو ڪرو، ايشور ري نظر ۾ پلو ڪي هي، ٿوري بات منڻ، جون ايشور ري؟“ 20 آي پلا ڪيڪر هوي شگهي هي ڪه جڪو ڪئين مهون ڏينو هان شيو هي، اُوئي ري باري ۾ ڪيني پي ني شٽائون؟“ 21 پڇي اُوئون پطرس هان يوحنا ني تموم گهڻا بيٺاري چوڙي ڏينا. حقيقت ۾ او اُوئون ري سازو سزا رو فيصلو ڪري ڪونهي شگهيا، ڪيونڪه سڄائي منڪ او پرچو جوئي ايشور ري بدائي ڪرتا پڙيا. 22 او منڪ جڪو ايتي پرچي شون شاجو هويو هتو، او چاليهه شال شون پي وڌيڪ موتو هتو.

وشواسيون ري دليري ري سازو پراڻا

23 پطرس هان يوحنا اوڻ شون بونا گيا هان جڪو ڪئين ايشور ري موتي بوجاريون هان يهودي اگروئون اُوئون ني ڪهيو هتو، او جائني آري منڪون ني شٽايو. 24 جڏي اُوئون آي باتون شٽي، تو زور شون ايشور شون پراڻا ڪرڻ لاگا ڪه، ”پرميشورم تي آڪاش، ڌرتي، شمندر هان جڪو ڪئين اُوئون ۾ هي، او سڄائي ناهيا. 25 تي پويتر آتما شون آري بونهي هان مهوري پڙ ڏاڏي دائود بادشاه ري وسيلي ڪهيو هتو ڪه،

’بيڃي قومون ڪيئون ريش ۾ هي؟‘

هان منڪون ڪيئون بيڪار رٿائون ڪئي؟

26 پرميشور ري خلاف

هان اُوئي ري چونڊيوڙي مسيح ري خلاف،

دنيا را بادشاه جنگ ڪرڻ ري سازو تياري ڪري آيا هي

هان سردار آئي پيڙا هوي هي.“

27 ايتي ۾ ڪو پي شڪ ڪونهي ڪه هيروديس، بينطس پلاطس، اسرائيلي قوم آلا هان بيڃي قوم آلا سڄائي پيڙا هوي ٿاري پويتر بونهي پريو يسوع ري خلاف هوي هي، جڪي ني تي چونڊيو هي. 28 او ايتي ري ڪري پيڙا هوي هي ڪه او سڄائي ڪوم ڪري، جڪو تي پيل شون آري قدرت

هان آڀري مرضي شون فيصلو ڪيو هتو. ²⁹ اي پرميشورم همي او منڪ مهوني بيٺاري پٽيا، ايني ري ڪري ٿو آڀري بونهون ني همت ڏي ڪه او منڪون ۾ تموم گهڻي دليري شون ٿارو پرچار ڪرتا ري. ³⁰ ٿو آڀري قدرت بنا هان آڀري پويتر بونهي پريو يسوع ري نون شون شاجا ڪرم پرچا هان عجيب ڪوم بنا.“

³¹ جڏي اونون پرائنا ڪري هئو ڪيوم، تو او جگها لڏي گئي، جيٿ او پيٽا هئا. او سڃائي پويتر آتما شون پريجي گيا هان تموم گهڻي دليري شون ايشور ري باتون سٿاڻ لاگا.

وشواسي منبلي ري آڀت ۾ ٻڌي

³² وشواسي منبلي آلا هر هيڪ بات ۾ ٻڌي ۾ ريتا. اونون ۾ هر هيڪ آڀري شئي ني آڀري ڪونهي سمجهتو، پٺ سڃي شيون آڀت ۾ بلائي ليتا. ³³ پڇي سنت تموم گهڻي قدرت شون پريو يسوع ري مرڻ هان اوني ري جي انڻ ري باري ۾ گواهي ڏيتا رهيا هان اونون سڃون تي ايشور ري تموم گهڻي ڪريا هتي. ³⁴ اونون ۾ ڪو پي محتاج ڪونهي هتو، ڪيونڪه بني هان گهرون را مالڪ آڀري مال ملڪيت بيچي اونون را پشا لي آتا ³⁵ هان او رپا سنتون ري پگون ۾ راکتا هان پڇي او هر هيڪ ضرورت آئي ۾ بلاوتا.

³⁶ لاوي قبيلي رو هيڪ منڪ هتو، جڪو ايشور رو شيواداري هتو. اوني رو نون يوسف هتو هان او ڪپرس بيت رو ريوڻ آڻو هتو. سنتون اوني رو نون برنباس راکيو. (برنباس رو مطلب هي ”همت ڏيوڻ آڻو.“) ³⁷ اوني آڀري بني بيچي هان اوني را پشا لائي سنتون ري پگون ۾ راکيا.

حننيا هان سفيرا ني ڪوڙ ري سزا

5 ¹ وشواسيون ۾ هيڪ منڪ هتو، جڪي رو نون حننيا هتو هان اوني ري لگائي رو نون سفيرا هتو. اونون بيٺون پيٽون هوني آڀري ڪئين بني بيچي. ² حننيا، بني ري رپيون ۾ ڪئين رپا آڀري شارو راکيا هان باقي لائي سنتون ري پگون ۾ راکيا. ايني سڃي بات ري خبر اوني ري لگائي ني پي هتي. ³ ايني تي پطرس، حننيا ني ڪهيو ڪه، ”حننيا، ٿي ڪيئون شيطون ري بات مني هان پويتر آتما شون ڪوڙ بوليو هان بيچوڙي بني را ڪئين رپا آب ڪڍي راکيا؟ ⁴ ڪي بني بيچن شون پيل ٿاري ڪونهي هتي؟ ڪي همي جڏي او بيچي ري، تو اوني را رپا ٿارا ڪونهي؟ ٿي ڪيئون آڀري من ۾ ايئون شوچو؟ ٿو منڪون شون نام، پٺ ايشور شون ڪوڙ بوليو هي.“ ⁵ حننيا اي شئي هينا ڌرتي تي ڪريو هان او مري گيو. جڪي پي اي شٽيوم او پيٽاجن لاگو. ⁶ پڇي ڪئينڪه جوانون، حننيا ني ڪوڙ ڏينو هان لي جائي ٻوري چوڙيو.

⁷ اندازن تينون ڪلاڪون شون پڇي اوني ري لگائي سفيرا اوٽ آئي، پٺ اوني ني خبر ڪونهي هتي ڪه اوٽ ڪي هويو هي. ⁸ پطرس اوني شون پوچو ڪه، ”ڪي ٿون آڀري بني اتر ري بيچي هتي؟“ سفيرا بلتي ڏيني ڪه، ”هاوي، مهون اتر ري مول ۾ بيچي هتي.“ ⁹ ايني تي پطرس ڪهيو ڪه، ”تون ڏٺي لگائي، ڪيئون پرميشور ري آتما رو آزموتو ليو؟ جو، جڪون ٿاري ڏٺي ني ٻوريو هي، همي او ٻاهر اڀا هي هان ٿني پي ٻورڻ ري

شارو لي جاشي۔“¹⁰ سفيرا اوثيج تيم پطرس زي پگون ۾ ڪري هان مري گئي۔ پچي او آيا هان اوثي رو لاش لي جائي اوثي زي ڏي حننيا ري پاشي ۾ ٻوريو۔¹¹ پچي سجي وشواسي منڊلي هان جڪي پي آي بات سُڻي، او سڃائي بيٺاڄڻ لاڳا۔

سنتون ري طرفون پرچا

¹² پچي پريو يسوع را سنت ۾ منڪون ۾ تموم گهڻا عجيب ڪوم هان پرچا بتاوتار هيا۔ او سڃائي وشواسي هيڪ من هوني ايشور زي گهر ۾ سليموني نون ري پروندي ۾ پيڙا هوتا۔¹³ ڪينڪ منڪ اهڙا پي هتام جڪون ري همت ڪونهي هتي ڪه او اوتون ري منڊلي ۾ جاوي، پڻ تو پي او وشواسيون ري عزت ڪرتا۔¹⁴ تو پي تموم گهڻون آدميون هان لڳايون پريو يسوع تي وشواس راڪيو هان منڊلي ۾ شامل هوتا ڪيا۔¹⁵ سنتون زي پرچون زي ڪري منڪ آيا بيمار لائي مارگ ۾ موجون هان تڏون تي شونالنام جيٺ شون پطرس لنگهتو ڪه اوثي ري چان بيمارون تي پڙي، تو بيمار شاجا هوني جاوي۔¹⁶ تموم گهڻا منڪ يروشلم شهر ري آشي پاشي ري گون شون بيمار هان پوت لاڳوڙا منڪ سنتون ڪيڊي لي آوتا هان او سڃائي شاجا هوني جاوتا۔

ڌرمي پنچائيت رو سنتون ني ڏک ڏيون

¹⁷ پچي ايشور زي پوجاريون رو سردار هان اوثي را ساڻي جڪو صدوقي هتام او سنتون تي ريشي پلڻ لاڳا۔¹⁸ ايني ري ڪري اوتون سنتون ني جهلائي جيل ۾ گهاتيا۔¹⁹ پڻ اوثيج رات پرميشور ري هيڪي فريشتي جيل را در ڪولي چوڙيا هان اوتون ني باهر لي جائي ڪهيو ڪه،²⁰ ”تي جائو ايشور زي گهر ۾ جائي منڪون ني نوني زندگي ري سجي باتون سُٺائو۔“²¹ پچي جون فريشتي اوتون ني ڪهيو هتو، ايتوج ڏن اگني ئي او ايشور زي گهر ۾ ڪيا هان شيڪاوڻ لاڳا۔

پچي ايشور زي پوجاريون ري سردار هان اوثي ري ساڻيون ڌرمي پنچائيت ري شارو اسرائيلي قوم ري سجي اڳوڻون ني آپ ڪيڊي اٿايا۔ پچي اوتون آبري فوجيون ني ڪهيو ڪه، ”جائو هان جيل شون اوتون قيديون ني لي آئو۔“²² پڻ جڏي فوجي جيل ۾ ڪيا، تو ڏينو ڪه اوت تو سنت هائي ڪونهي۔ پچي فوجي پاچا آيا هان ڪهيو ڪه،²³ ”مهون جيل ني ڪاڻو بند ڏيني هتي هان فوجي پي جيل ري در تي پهرو ڏيتا پڙيا، پڻ جڏي مهني جيل ۾ ڪيا، تو ڏينو ڪه اوت او هائي ڪونهي۔“²⁴ جڏي ايشور زي گهر ري فوجيون ري سردار هان ايشور ري موتي پوجاريون آي بات سُڻي، تو او پريشون هوني ڪيوڻ لاڳا ڪه، ”همي ڪي هوشي؟“²⁵ اتر ري ۾ ڪي آئي اوتون ني ڪهيو ڪه، ”سُٺو، تون جڪون ني جيل ۾ گهاتيا هتام هتون او ايشور زي گهر ۾ هي هان اوت منڪون ني شيڪاوي پڙيا۔“

²⁶ پچي فوجيون رو سردار هان فوجي ڪيا هان جائي سنتون ني لي آيا، پڻ اوتون ني زوري ڪونهي لي آيا، ڪيونڪ اوتون ني پي هتو ڪه ڪيٺ منڪ پڙ هئي ماري ني چوڙي۔²⁷ پچي سنتون ني ڌرمي پنچائيت ڪيڊي لي آيا۔ تو ايشور زي پوجاريون ري سردار اوتون شون پوجو ڪه،²⁸ ”مهون توني سختي شون حڪم ڏينو هتو ڪه پڙي يسوع رو نون لي منڪون ني ني شيڪايا۔ پڻ تون تو سجي يروشلم ۾ سجون ني شيڪايو رو هان مهوني يسوع ري موت را ڏوهي ڪرو هو۔“²⁹ ايني تي پطرس هان باقي سنتون ڪهيو ڪه، ”مهوني منڪون رو نام پڻ ايشور رو حڪم منڻ ڪبي۔“³⁰ تون تو

پريو يسوع نِي شُولِي تي چاڙهي، ڪوڪا هڻي تونگي چوڙيو هان ماري چوڙيو هتو، پڻ ايشور جڪي نِي مهورا باب ڏاڏا مننام اُوئي نِي پڙي جيتو ڪيو. ³¹ پڇي اُوئي نِي مالڪ هان مُگتي داتا نائي بادشاهي ڪرڻ ري شارو آڀري شاجي هات پيشاڙيو ڪه اسرائيلي قوم آئون نِي موقعو ڏي ڪه او اُوئي ري وسيلي توبهون ڪري هان آڀري پاپون شون معافي حاصل ڪري. ³² ايني ري ڪري نِي رگو مهني ايني باتون را گواه هون، پڻ پويتر آتما پي، جڪو ايشور آڀري حُڪم منڻ آئون نِي ڏينو هي. “ ³³ جڏي ڌرمي پنچائيت آئون آي شُٽيوم تو اُوئون نِي تموم گهڻي ريش آئي هان اُوئون نِي مارڻ ري شارو سنڀريا. ³⁴ پڻ اوٽ گملي ايل نون رو هيڪ منڪ هتو جڪو فريسي پنت رو هتو هان او ڌرمي گرو هتو هان منڪون م اُوئي ري تموم گهڻي عزت هتي. او ڌرمي پنچائيت ري شومهو اُني ايو هان ڪهيو ڪه، ” ايتون نِي توڙي دير ري شارو باهر ميلو. “ ³⁵ پڇي اُوئي پنچائيت نِي ڪهيو ڪه، ” اي اسرائيلي پاپون، ٿي ايتون منڪون شون جڪو پي ڪرو، او سوچي شمعهي ڪريا. ³⁶ ڪيونڪه ڪئينڪه تيم اگي ٿيوداس نون رو هيڪ منڪ هتو جڪي رومي حڪومت ري خلاف گوڙ گهاتيو هتو. او ڪيتو ڪه، ’ هون موتي هستي هون. ‘ اُوئي را اندازن چار شتو چيلا هويام، پڻ جڏي او ماريجمو تو اُوئي را چيلا پي در بدر هوئي گيا هان او ڪئين ڪونهي ڪري شگهيا. ³⁷ اُوئي شون پڇي آدم شماري ري ڏنون م گليل صوبي رو يهودا نون رو هيڪ منڪ هتو. اُوئي پي رومي حڪومت ري خلاف بگاوت ري شارو تموم گهڻا چيلا ناهيا. جڏي او ماريجمو، تو اُوئي را چيلا پي در بدر هوئي گيا. ³⁸ همي هون تون شجون نِي ڪونه هون ڪه ٿي ايتون نِي ڪئين نِي ڪو هان ايتون نِي جاوڻ ڏيو. جي ايتون رو ڪوم هان مقصد ايتون رو هي، تو هاقِي مِتي جاشي. ³⁹ پڻ جي او ايشور ري طرفون هي، تو ٿي اُوئون نِي پالي ڪونهي شگهيو، پڻ ٿي ايشور ري خلاف هوئي جاشو. “ ⁴⁰ پڇي ڌرمي پنچائيت اُوئي ري صلاح مني. پڇي اُوئون سنتون نِي مئين اڻايا هان چاهڪ هڻائي اُوئون نِي حُڪم ڏينو ڪه، ” ٿي پڙي ڪڏي پي يسوع رو نون لي بات نِي ڪريا. “ اُوئي شون پڇي اُوئون نِي ڦٽا ڪيا. ⁴¹ سنت اوٽ شون بونا گيا. او ايني بات م خوش هتا ڪه ايشور مهوني اهڙو مون تو ڏينو ڪه مهني پريو يسوع ري ڪري بي عزتا تو هويا.

⁴² او هرور ايشور ري گهر م هان منڪون ري گهرون م جائي شيڪاوتا هان ايني خوشي ري خبر رو پرچار ڪرتا ڪه، ” پريو يسوع ٿي مسيح هي. “

شات شيواداري چُونڊڻ

6 ¹ اُوئون ڏنون م جڏي پريو يسوع را چيلا بڻڻ لاگام، تو اُوئون م يوناني بولڻ آلا يهودي، عبراني بولڻ آلي يهوديون ري دانهن ڏيوڻ لاگا. اُوئون ڪهيو ڪه، ” جڏي هرور رونڊبيرون م امدادي بلائي جاوي هي، تو مهوري تولي ري رونڊبيرون رو خيال ڪونهي راڪتا. “ ² ايني تي بارهون سنتون شجون وشواسيون نِي آپ ڪڍي اڻائي ڪهيو ڪه، ” آي پلي بات ڪونهي ڪه آبي ايشور ري باتون شيڪاوڻ چوڙي، پشون هان ڪاوڻ پيڻ رو بندوبست ڪرون. ³ ايني ري ڪري اي وشواسيون، ٿي آڀري منڪون م شات عزت آلا منڪ چُونڊو، جڪو پويتر آتما شون پريجوڙا هان شمعهدار هوِي. مهني اُوئون نِي ڪاوڻ پيڻ رو ڪوم ڏيشون. ⁴ پڻ مهني پرائنا هان ايشور ري باتون رو پرچار ڪرتا ريشون. “ ⁵ آي بات شجون نِي وڻي هان اُوئون آي منڪ چُونڊيا، ايسٽيفنس جڪو پڪو وشواسي هان پويتر آتما شون پريجوڙو هتو، فلپس، پرخرس، نيڪانور، تيمون، پرمناس هان نيڪلائوس

جڪو انطاڪيا شهر رو هتم، او پيل پڇي قوم رو هتم هان پڇي يهودي هيو هتم. ⁶ پڇي او اوئون شاتون ني سنتون ڪي دي لي گيا هان سنتون اوئون ري مائي تي آيرا هات راڪي پراٽا ڪي هان اوئون ني ايئي ڪوم رو ذمو ڏينو.

⁷ ايئي نموني ايشور رو شهبڏ بدتو گيو هان يروشلم شهر ۾ پريو يسوع را چيلا تموم گهڻا بدتا گيا. ايئون شون تال تموم گهڻون ايشور ري پوجاريون پي پريو يسوع تي وشواس راڪيو.

استيفنس ني جهالڻ

⁸ استيفنس ايشور ري ڪريا هان طاقت شون پريجوڙو هتم هان او منڪون ۾ موتا موتا پرچا هان عجيب ڪوم ڪرتو. ⁹ پڇي ڪئينڪ يهودي استيفنس شون بحث ڪرڻ لاگا. او ڪرين هان اسڪندريا شهر هان ڪلڪيا هان اسيا صوبون را ريوڻ آلا هتا هان او اوئي پگني گهر را هتام جڪون ني آزاد ڪيوڙي غلومون رو پگني گهر ڪيتا. ¹⁰ پڻ پوپتر آتما استيفنس ني اهڙي سمجه ڏيني ڪه جڏي او باتون ڪرتو، تو اوئي شون ڪو پي مقابلو ڪري ڪونهي شگهيو.

¹¹ پڇي اوئون ڪئينڪ منڪون ني رشوت ڏي شيڪايو ڪه او اي ڪي ڪه ”مهون استيفنس ني موسيٰ هان ايشور ري خلاف باتون ڪرتي شڻيو هي.“ ¹² ايئي نموني اوئون شجون منڪون، اگروئون هان ڌرمي گروئون ني اوئي ري خلاف ڪيتا. پڇي او استيفنس ڪي دي گيا هان اوئي ني جهالي ڌرمي پنچائيت ڪي دي لي گيا. ¹³ اوٽ او ڪئينڪ منڪون ني لي آيا جڪون ڪوڙي گواهي ڏي ڪهيو ڪه ”استيفنس ايشور ري گهر هان شريعت ري خلاف هميشا باتون ڪرتو ري هي.“ ¹⁴ ڪيونڪ مهون ايئي ني اي ڪيتي شڻيو هي ڪه يسوع ناصرِي ايئي ايشور ري گهر ني برباد ڪرشي هان موسيٰ ري ڏينوڙي ريتون ني متائي چوڙشي.“ ¹⁵ جڏي ڌرمي پنچائيت ۾ پينوڙي منڪون استيفنس ڏيشا ڏهيون شون جوپوم، تو اوئي رو مونڏو فريشتي آلي ڪار چمڪتو پڙيو.

استيفنس ني ڌرمي پنچائيت رو ڏوهي ڪرڻ

¹ پڇي ايشور ري پوجاريون ري سردار، استيفنس شون پوڇو ڪه ”ڪي اي باتون ساڇي هي؟“ ² استيفنس ٻاڻي ڏيني ڪه ”اي ڀايون هان اگروئون، مهاري بات شڻو، موتي مهما آلي ايشور آڀي ڏاڏي ابراهيم ني اوئي تيم درشن ڏينوم، جڏي او حاران شهر ۾ ريوڻ شون پيل مسوپتاميا ملڪ ۾ ريتو. ³ ايشور اوئي ني ڪهيو ڪه، ’تو آڀري عزيزون هان آڀري ملڪ ني چوڙي اوئي ملڪ ۾ جام جڪو هون ٿني بتائين.‘ ⁴ پڇي او آڀرو ملڪ يعني ڪسديون رو ملڪ چوڙي حاران شهر ۾ ريوڻ لاگو. پڇي اوئي ري ٻاپ ري مرڻ شون پڇي ايشور اوئي ني ايئي ملڪ ۾ لي آيو، جيت ٿي آجون توڻي رو هو. ⁵ اوئي تيم ايشور اوئي ني ايت ڪو پي زمين ڪونهي ڏيني، اترِي توڻي ڪه پگ راڪڻ ري پي جگها ڪونهي ڏيني. اوئي تيم ابراهيم رو ڪو پي اولاد ڪونهي هتم، پڻ تو پي ايشور آي واعدو ڪيو هتم ڪه، ’هون آي زمين ٿني هان ٿي شون پڇي تاري پڙهي ني هميشا ري شارو ڏين.‘ ⁶ ايشور آي پي ڪهيو ڪه، ’تاري پڙهي آلا ڪي بيڇي ملڪ ۾ پرديسي آلي ڪار ريشي. اوٽ را منڪ اوئون

7

نِي غُلوم نَاشِي هَانْ اُونُون تِي چار شتو شالون توڻي ظلم كَرَشِي-،⁷ پيچي ايشور آي پي كهيو كه، 'جكو قوم اُونُون نِي غُلوم نَاشِي، هُون اُونُون نِي سزا ڏئين- پيچي او اوت شون نڪري آشي هان اِيئي جگها تِي آئي مهاري پگني كَرَشِي-،'⁸ ايشور ابراهيم شون وچن ڪيئوم جڪي رو نشون ڪننو هتو- اِيئي ري ڪري ابراهيم آپري ڏيڪري اضحاق ري جنم ري آنون ڏن اُوئي رو ڪننو ڪيئو- اضحاق شون يعقوب جايو هان اُوئي رو ڪننو ڪيئوم يعقوب را بارهي ڏيڪرا جايا هان اُوئي اُونُون را پي ڪننا ڪيئا- او بارهي ڏيڪرا مهوري قوم ري بارهي قبيلون را اگووڻ هوبا-

⁹ پيچي يعقوب را ڏيڪرا آپري پائي يوسف شون شال ڪرڻ لاگا هان اُوئي نِي واپاريون نِي پيچي چوڙيو هان واپاري اُوئي نِي غُلوم نائي مصر مُلڪ ۾ لي گيا، پڻ ايشور اُوئي پيڙو هتو-¹⁰ ايشور يوسف نِي سڄي ڏڪون شون بچايو هان اُوئي نِي اهڙي سمجه ڏيئي كه مصر مُلڪ ري بادشاه فرعون خوش هوئي اُوئي نِي مصر مُلڪ رو موتو وزير هان آپري محل رو اگووڻ ناهيو-¹¹ پيچي سڄي مصر مُلڪ هان ڪنعان علائقي ۾ ڏڪال پڙيو- منڪ تموم گهڻي مُصيبت ۾ هتا هان آڻي باپ ڏاڏون ڪڍي ڏن ختم هوئي گيو-¹² جڏي يعقوب نِي خبر پڙي كه مصر مُلڪ ۾ ڏن هي، تو اُوئي آپري ڏيڪرون نِي ڏن مول ليوڻ ري شازو پيلڪو گهمرو اوت مليا-¹³ جڏي او پيچو گهمرو مصر مُلڪ ۾ گيا، تو يوسف آپري پايون نِي آپري اولڪوڻ ڪرائي هان فرعون بادشاه نِي پي آپري خاندان ري باري ۾ سُڻايو-¹⁴ اُوئي شون پيچي يوسف آپري ابا يعقوب هان سڄي گهر نِي مصر مُلڪ ۾ آڻايو، آي سڄائي پنجهتر منڪ هتا-¹⁵ پيچي يعقوب مصر مُلڪ ۾ ريوڻ لاگو- اوتج او هان آڻا باپ ڏاڏا مري گيا-¹⁶ پيچي اُونُون را لاش سڪم شهر ۾ لي جائي اُوئي مُڪومون ۾ پوريا، جڪو بني ابراهيم حمور ري ڏيڪرون شون مول لي هتي-

¹⁷ جڪو واعدو ايشور ابراهيم شون ڪيئو هتوم جڏي اُوئي رو پورو هوڻ رو تيم آيو، تو مصر مُلڪ ۾ آڻا منڪ تموم گهڻا ٻڌڻ لاگا-¹⁸ اُوئي تيم پيچو بادشاه مصر مُلڪ تي حڪومت ڪرتو جڪو يوسف نِي ڪونهي اولڪتو-¹⁹ اُوئي آڻي قوم نِي دوکو ڏينو هان آڻي باپ ڏاڏون شون اُترو تو ظلم ڪيئو كه اُونُون نِي آڻا ٻاليا گهرون شون ٻاهر نوڪڻا پڙيا كه او مري جاوي-²⁰ اُونُون ڏنن ۾ مُوسي جايو جڪو تموم گهڻو ڦوترو هتو هان تينون مهڻون توڻي آڻي ابا ري گهر ۾ نينو موتو هويو-²¹ پڻ جڏي اُوئي نِي پي نوڪيوم، تو فرعون بادشاه ري ڏيڪري اُوئي نِي ڪڻيو هان اُوئي نِي آڻو ڏيڪرو ڪري راڪيو-²² پيچي مُوسي مصري قوم را سڄائي علم شيڪيا- او بولڻ هان ڪوم ۾ هوشيار هتو-

²³ پيچي جڏي مُوسي چاليه شالون رو هويوم، تو اُوئي نِي آڻي پايون يعني اسرائيلي قوم رو حال احوال ليوڻ رو خيال آيو-²⁴ جڏي اُوئي هيڪي مصري منڪ نِي اسرائيلي تي ظلم ڪرتي ڏينوم، تو اُوئي ري مدد ڪي هان اُوئي ظلمي مصري منڪ شون بدلو ليوڻ ري شازو اُوئي نِي ماري چوڙيو-²⁵ اُوئي شوچو كه، 'مهارا پائي آي بات سمجهي جاشي كه ايشور اُونُون نِي مهاري وسيلي چوڙاشي-،' پڻ ڪو پي اُوئي ري بات ڪونهي سمجهو-²⁶ پيچي پيچي ڏن مُوسي پيئون اسرائيلي قوم آڻون نِي آڻت ۾ ٻهتا ڏينام، تو اُونُون نِي ناوڻ ري ڪوشش ڪرڻ لاگو هان اُونُون نِي ڪهيو كه، 'مهاري بات سُڻوم ٿي تو آڻت ۾ پائي هو- آڻت ۾ ڪيئون پڙهيجو هو؟'²⁷ پڻ اُونُون ۾ جڪو پيچي شون پڙهتو پڙيو، اُوئي مُوسي نِي ڏڪو ڏي ڪهيو كه،

’کي تُو مهورو اگووڻ جون جج هي؟‘²⁸ کي تُو مهني پي ايئون ماري، جون تي کالهي اوئي مصري ني ماريو هتو؟‘²⁹ جدي موسي اي بات شئي، تو اوت شون نانو هان جائي ميدان ملڪ ۾ پرديسي آلي کار ريوڻ لاگو. اوتج اوئي بيان ڪيو هان اوئي را بي ڏيڪرا جايا.

³⁰ چاليهه شالون شون پچي موسي، ايشور رو فريشتو سينا جبل ري رڻ پت ۾ باشدي ري جهال آلي کار هيڪي بوني ۾ ڏينو. ³¹ موسي اي جوئي حيرون هيو هان اوئي ني جتو جوڻ ري شارو نيڙو گيو، تو اوئي پرميشور رو آواز شئيو ڪم، ³² ’هون اوج ايشور هون جڪي ني ٿارا باب ڏاڏا، ايراهيم، اضحاق هان يعقوب منئا.‘ تو موسي ڏڪڻ لاگو هان اوئي بوني ني جوڻ ري همت ڪونهي ڪي. ³³ پرميشور اوئي ني ڪهيو ڪم، ’آپري پگون شون جتا اٿار، ڪيونڪه جڪي جگها تي تُو ايو هي، او پويتر ڌرتي هي. ³⁴ مهني مصر ملڪ ۾ آپري چونڊيوڙي قوم تي ظلم هوتا ڏينا هي هان اوئون را شڏڪا پي شئي هي. ايئي ري ڪري هون اوئون ني آزاد ڪراوڻ ري شارو آيو هون. همي تباري ڪم، هون ٿني مصر ملڪ ڏيشا ميلون پڙيو.‘ ³⁵ اي اوج موسي هي جڪي ري بات آپي باب ڏاڏون ڪونهي مني هان ڪهيو ڪم، ’کي تُو مهورو اگووڻ جون جج هي؟‘ پڻ ايشور اوئي ني اگووڻ هان آزاد ڪراوڻ آو نائي اوئي فريشتي ري وسيلي ميلوم، جڪو بلتي بوني ۾ ڏيڪيڻ ۾ آيو هتو. ³⁶ اوئي موسي اسرائيلي قوم ني مصر ملڪ شون ڪاڍيا هان اوئي مصر ملڪ، قلمر شمندر هان رڻ پت ۾ چاليهه شالون توڻي پرچا هان عجيب ڪوم بنايا. ³⁷ اي اوج موسي هي جڪي اسرائيلي قوم ني ڪهيو هتو ڪم، ’ايشور تونري قوم شون مهني جهڙو هيڪ نبي ميلشي.‘ ³⁸ جدي رڻ پت ۾ شجي اسرائيلي قوم پڙي هتي، تو اينج موسي آپي باب ڏاڏون هان اوئي فريشتي پڙو هتو، جڪي سينا جبل تي موسي شون باتون ڪئي. ايئي موسي ني ايشور ري طرفون زندگي رو مارگ بناوڻ آلا حڪم مليا ڪه او آيون توڻي اوئون ني پڳاوي. ³⁹ پڻ آپي باب ڏاڏون موسي ري بات ڪونهي مني هان اوئي ني ڦنو ڪيو هان اوئون ري من ۾ مصر ملڪ پاچا جاوڻ رو خيال آيو. ⁴⁰ پچي اوئون هارون ني ڪهيو ڪم، ’مهوني خبر ڪونهي ڪه موسي جڪو مهوني مصر ملڪ شون ڪاڍي لي آيو هي، همي او ڪيت هي؟ ايئي ري ڪري تُو مهوري شارو اهڙو ڏيوتا نام، جڪو مهوري اگووڻي ڪري.‘ ⁴¹ تو اوئون هيڪ توگهڙي ري مورتِي نائي هان اوئي ري شارو بلدون ڪيئا هان پچي آپري هاتون ري ناهيوڙي مورتِي ري شارو خوشي ڪرڻ لاگا. ⁴² ايئي ري ڪري ايشور اوئون شون آيو موندو قيرايو هان اوئون ني ڦنا ڪيئا ڪه او جائي شورج، چندر هان تارون ري پوجا ڪري. جون نبين ري شاستر ۾ لکيوڙو هي ڪم،

’اي اسرائيلي قوم آئون،

تون چاليهه شال رڻ پت ۾،

جڪو پيتائون هان بلدون ڪيئا،

او مهاري شارو ڪونهي هتا.

⁴³ پڻ ٿي تو مولڪ ڏيوتا رو تنبو

هان رفان ڏيوتا ري تاري آلي مورتِي

آپ پيڙي راکتا،

تون او پوجا ري شارو ناهي هتي.

همي هون توني بابل ملڪ شون پي الگا ميلين.

44 مهوري باپ ڏاڏون ڪڍي رڻ پت ۾ ايشور رو پويتر تنبو هتو. اوني ني ايئوج ناهيو جهڙي نموني ايشور، موسي ني حڪم ڏينو هتو. 45 او تنبو

مهوري باپ ڏاڏون ني اوئون ري بويون شون مليو هتو. پچي جدي او يشوع پيڙا آيا، تو او تنبو پي پيڙو لي آيا. پچي ايشور هلي هلي اوني پچي قومون

ني اوئون ري ملڪ شون باهر ڪڍي چوڙيا هان مهوري باپ ڏاڏون اوني ملڪ تي قبضو ڪيو. او پويتر تنبو دائود ري نيم توڻي اوئون ڪڍي هتو.

46 ايشور دائود بادشاه تي ڪريا ڪي. اوني ايشور شون موڪل مونگي ڪم، ’هون اسرائيلي قوم ري شارو ٿارو گهر ٿاڻون‘، 47 پڻ ايئون ڪونهي

هويو، پڻ سلیمون بادشاه ايشور رو گهر ٿايو. 48 حقيقت ۾ پرميشور، انسون ري هات ري ناهيوڙي گهرون ۾ ڪونهي ريتو. ايئي ري ڪري او آڀري

نبي ري وسيلي آي ڪي هي ڪم،

49 آڪاش مهارو تخت هي

هان ڌرتي مهاري پگون ري سندنلي هي.

تو ٿي مهاري شارو ڪهڙو گهر ناشو؟

جون مهاري آروم ري جگها ڪئي هي؟

50 ڪي آي سجي شيون مهني ڪونهي نائي؟“

51 پچي استيفنس آي پي ڪهيو ڪم، ”تي ضدي منڪ هو. نڪو ٿي ايشور ري بات من ۾ راکتا هان نڪو تو ٿي ايشور ري بات ذهيون شون سڻتا.

تي آڀري باپ ڏاڏون آلي ڪار هميشا پويتر آتما ري خلاف ڪوم ڪرو هو. 52 نبيون ۾ اهڙو ڪيو هي، جڪي ني ٿونري باپ ڏاڏون ڏک ني ڏينو

هووي؟ ٿونري باپ ڏاڏون اوئون ني پي ماري چوڙيا، جڪون ايشور ري نيڪ بونهي ري اوڻ ري اگڪتي ڪي هتي هان ٿون اوئي ني پي جهلائي

مراي چوڙيو. 53 توني شريعت، فريشتون ري وسيلي ملي، پڻ ٿي اوئي تي ڪونهي ٿوئا.“

استيفنس ني پترون شون مارڻ

54 جدي ڌرمي پنچائيت استيفنس ري آي باتون سڻي، تو اوئون ني تموم گهڙي ريش آئي هان اوئي تي ڏونت پيشڻ لاگا. 55 پڻ استيفنس پويتر آتما

شون پريجي آڪاش ڏيما جويو، تو ايشور اوئي ني درشن ڏينو هان اوئي پريو يسوع ني ايشور ري شاجي پاسي اڀوڙو ڏينو. 56 ايئي تي استيفنس منڪون

ني ڪهيو ڪم، ”جوئو، هون آڪاش ني ڪليوڙو ڏيڪون پڙيو هان منس پتر عزت هان اختياري شون ايشور ري شاجي هات ايو هي.“ 57 آي بات

سڻي ڌرمي پنچائيت آلا زور شون هل ڪرڻ لاگا هان آڀرا ڪون بند ڪري چوڙيا هان شجائي پيڙا هوئي استيفنس ني مارڻ ري شارو نانا. 58 او اوئي

ني شهر شون باهر لي گيا هان نپ مارڻ ري شارو پتر هڻڻ لاڳا. استيفنس ري خلاف ڪوڙي گواهي ڏيوڻ آئون آيرا گايا سائول نون ري هيڪي نوجوان ري پگون ۾ راکيا. 59 جڏي او استيفنس ني پتر هڻتا پڙيا، تو او پرائتا ڪرتو پڙيو ڪم، ”اي پڙيو يسوع، مهاري اتما ني قبول ڪر.“ 60 پڇي استيفنس آيرا گوڏا ڪوڙي زور شون ڪهيو ڪم، ”اي پڙيو، ايئي بات رو ڏوه ايئون تي ني لگائي.“ اي ڪئي اوئي دم ڏينو.

سائول رو وشواسي مندليون ني تنگ ڪرڻ

1 جڏي استيفنس ني ماري چوڙيو، تو سائول پي ايئي بات ۾ خوش هتو.

8

اُويج ڏن يروشلم شهر ۾ وشواسي مندلي تي تموم گهڻو ظلم هوڻ شروع هيو. پڇي سنتون شون نال باقي شجائي وشواسي يهوديا هان سامريا صوبي ڏيما ناشي گيا. 2 پڇي ڪينڪه نيڪ منڪون استيفنس رو لاش لي جائي اوئي ني متي حوالي ڪيو هان اوئي ري مرڻ تي تموم گهڻا روئڻ لاڳا.

3 سائول وشواسي مندليون ني متاوت شروع ڪيو. او گهرون ۾ جائي لڳايون هان آدميون ني گيشلي جبل ۾ گهاتو.

فليس رو سامريا صوبي ۾ پرچار

4 جڪو وشواسي اينا اونا گيا، او جيت پي گيا اوڻ پڙيو يسوع رو پرچار ڪرڻ لاڳا. 5 پڇي فليس سامريا صوبي ري هيڪي شهر ۾ جائي مسيح ري باري ۾ پرچار ڪرڻ لاڳو. 6 جڏي منڪون فليس رو پرچار شڻيو هان اوئي را پرچا ڏينا، تو شجائي منڪ پيڙا هوئي اوئي ري باتون ڏهون ڏي شڻڻ لاڳا. 7 پڇي تموم گهڻي منڪون ۾ پوت رڙي ڪري نڪريا هان تموم گهڻا آڌرنگا هان لولها لنگڙا شاجا هويا. 8 اي جوئي اوئي شهر را منڪ تموم گهڻا خوش هويا.

9 اوئي شهر ۾ هيڪ شمعون نون رو منڪ هتو، جڪو سامريا صوبي ري منڪون ني آيري جادو شون حيون ڪرتو هان او ڪيتو ڪم، ”هون موتي هستي هون.“ 10 نيا موتا شجائي اوئي ري باتون ڏهون شون شڻتا هان اوئي ري باري ۾ اي ڪيتا ڪه ايئي آدمي ني ايشور تموم گهڻي طاقت ڏيني هي. 11 او اوئي ري باتون ڏهون شون شڻتا، ڪيونڪه اوئي تموم گهڻي ڏنون شون آيري جادو شون منڪون ني حيون ڪيتا هتا. 12 پڻ جڏي فليس، منڪون ۾ ايشور ري بادشاهي هان يسوع مسيح ري باري ۾ پرچار ڪيو، تو تموم گهڻي آدميون هان لڳايون وشواس راکيو هان پويتر سنون ليون لاڳا. 13 پڇي شمعون پي فليس رو پرچار شڻي پڙيو يسوع تي وشواس راکيو. پڇي اوئي پويتر سنون ليئو هان فليس پيڙو رهيو. او موتا موتا پرچا هان نشون جوئي حيون هيو.

14 جڏي يروشلم شهر ۾ سنتون اي شڻيو ڪه سامريا صوبي آئون ايشور ري باتون تي وشواس راکيو هي، تو اوئون پطرس هان يوحنا ني اوئون وشواسيون ڪيڊي ميليا. 15 پطرس هان يوحنا اوڻ جائي اوئون وشواسيون ري شارو پرائتا ڪي ڪه ايشور اوئون ني پويتر اتما ڏي، 16 ڪيونڪه اوئي تيم اوئون

وشواسيون نِي پويتر آتما ڪونهي ملبو هتو هان اُونون رُگو پريو يسوع ري نون رو پويتر سنون ليئو هتو. ¹⁷ پچي پطرس هان يوحنا اُونون ري ماڻي تي هات راڪيو هان ايشور اُونون نِي پويتر آتما ڏينو.

¹⁸ جڏي شمعون ڏينو ڪه سنتون ري هات راڪڻ شون پويتر آتما ملي هي، تو اُوني سنتون نِي پشا ڏي ڪهيو ڪه. ¹⁹ ”مهني اختياري ڏيو ڪه هون جڪي ماڻي هات راڪون، تو اُوني نِي پويتر آتما ملي.“ ²⁰ پطرس اُوني نِي بلتي ڏيني ڪه، ”تو هان تارا رپيا نرگ ۾ جاوي. ٿني ڪي لاڳي هي ڪه جڪو تحفو ايشور مهوني ڏينو هي، تو او ربيون شون لي شگهي هي؟ ²¹ ايشور نِي خبر هي ڪه تاري من ۾ ڪوت هي، ايني ري ڪري مهوري ايني ڪوم ۾ تارو ڪو پي واسطو ڪونهي. ²² ايني تي تو ايني پاپ شون توبهون ڪر هان پرميشور شون پرائتا ڪر، هوني شگهي هي ڪه پرميشور ٿني ايني بچري ارادي ري معافي ڏي. ²³ مهني لاڳي هي ڪه تو شال هان لالچ شون پريجوڙو هي هان تو بچرائي ۾ ڦاڻوڙو هي.“ ²⁴ تو شمعون ڪهيو ڪه، ”مهاري شارو پرميشور شون پرائتا ڪرو ڪه جڪو باتون ٿون ڪيني هي، اُونون ۾ هيڪ پي مهني تي ني آوي.“

²⁵ پچي پطرس هان يوحنا پريو يسوع ري گواهي ڏي هان پرميشور ري باتون رو پرچار ڪري يروشلم شهر ۾ پاچا ڳيا. مارگ ۾ جاوتي بلا او سامريا صوبي ري تموم گهڻي گون ۾ پريو يسوع ري باري ۾ خوشي ري خبر رو پرچار ڪرتا ڳيا.

فليس هان اٿوپيا ملڪ رو وزير

²⁶ پچي پرميشور ري فريشتي فليس نِي ڪهيو ڪه، ”اُني هان ڏڪڻ ڏينما رڻ پت ۾ اُوني مارگ تي ڄام جڪو يروشلم شهر شون غزا شهر ڏينما جاوي هي.“ ²⁷ پچي فليس اُنيو هان اُوني علائقي ڏينما بئير هيو. مارگ ۾ اُوني هيڪي منڪ نِي ڏينوم، جڪو اٿوپيا ملڪ رو هتو هان او ڪڏڙو هتو. او اٿوپيا ملڪ ري روڻي ڪنداڪي ري خزوني رو وزير هتو. او يروشلم شهر ۾ پگتي تي ڳيو هتو. ²⁸ او آپري گهوڙا گاڏي تي پاچو آپري ملڪ ڏينما جاوتو پڙيو هان يسعياھ نبي رو شاستر پڙهتو جاوتو پڙيو. ²⁹ پويتر آتما فليس نِي ڪهيو ڪه، ”نيزو جا هان اُوني گهوڙا گاڏي پڙيو بي.“ ³⁰ تو فليس ناشي اُوني ڪڍي ڳيو هان اُوني نِي يسعياھ نبي رو شاستر پڙهتي سڻيو. پچي فليس اُوني شون بوجو ڪه، ”ڪي تو جڪو پڙهي پڙيو، او شمجهي پي هي؟“ ³¹ اُوني ڪهيو ڪه، ”جترې توڻي ڪو شمجهاوڻ آلو ني هووي، تو هون هاڻي ڪيڪر شمجهي شگهون هون؟“ پچي اُوني فليس نِي منٿ ڪي ڪه، ”مهروني ڪري آني مهني پڙيو پيش.“ ³² شاستر ۾ جڪو اُوني پڙهيو، او آي هتو ڪه،

”منڪ اُوني نِي رد آلي ڪار باڊڻ ري شارو لي ڳيا.

جون گهيتو آپري بال ڪترڻ آلي آگهي، مان ڪري آيو ري هي،

ايئج نموني اُوني آبرو مونڏو ڪونهي ڪوليو.

³³ اُوني نِي بي عزتو ڪيو هان اُوني نِي انصاف ڪونهي مليو.

اُوني ري پڙهي ۾ ڪڻ هوشي، جڪو اُوني ري باري ۾ سڻاشي؟

ڪيونڪه ڌرتي تي اُوئي ري زندگي مِٺائي جاوِي هِي۔“

34 پڇي وزير فلپس نِي ڪهيو ڪم ”مهروبوني ڪري مهني شُٺام آي نبي آپري باري ۾ بات ڪري پڙيوم، جون ڪي پڇي ري باري ۾؟“ 35 اِئي تي فلپس شاستر ري اُوئيچ بات شون شروع ڪيو هان اُوئي نِي پڙيو يسوع ري باري ۾ خوشي ري خبر شُٺائي۔ 36 جڏي او بيتا بيتا هيڪ اهڙي جگها تي پُگام جيت پوئي هتوم تو وزير ڪهيو ڪم ”جوم ايت پوئي پي هِي، همي مهني ڪڻ پويتر سنون ليون شون پالشي؟“ 37 [پڇي فلپس ڪهيو ڪم، ”جي تُو شاڄي من شون وشواس راڳي هِي، تو تُو پويتر سنون لي شگهي هِي۔“ اُوئي ڪهيو ڪم ”هُون وشواس راڪون هون ڪه يسوع مسيح، ايشور رو ڏيڪرو هِي۔“]

38 پڇي وزير گهوڙا گاڏي نِي اُپڻ رو حڪم ڏينو۔ او گهوڙا گاڏي شون اُتري پوئي ۾ گيا هان فلپس اُوئي نِي پويتر سنون ڏينو۔ 39 جڏي او پوئي شون ٻاهر نڪريام تو پرميشور رو آتما فلپس نِي اوڻ شون ڪڍي لي گيو هان وزير پڙي فلپس نِي ڪونهي ڏينو هان او خوش هوئي آپرو مارگ جهالي بوئو گيو۔ 40 پڇي فلپس اشدود شهر ۾ پُگو هان بيتو بيتو اوڻ ري سڄي شهرن ۾ پڙيو يسوع رو پرچار ڪرتو ڪرتو قيصريا شهر ۾ پُگو۔

سائول رو پڙيو يسوع نِي منڻ

(ڪوم 6:22-16، 12:26-18)

9 ¹ سائول ايجون توڙي پڙيو يسوع ري چيلون نِي نپ مارڻ ري ڌمڪي ڏيتو رهيو۔ او ايشور ري پوجاريون ري سردار ڪڍي گيو ² هان منڻ ڪري ڪهيو ڪم، ”سائين، مهني دمشق شهر ۾ يهوديون ري پگتي گهرون ري اگووئون ري نون اهڙا خط لکي ڏيو، جڪي شون هون يسوع نِي منڻ آڻي لڳايون هان آدميون نِي جهالي يروشلم ۾ لي آئون۔“
³ او خط لي دمشق شهر ڏيشا بئير هويو۔ بيتو بيتو او دمشق ري نيڙو پُگو، تو اوچتو آڪاش شون اُجالو اُوئي ري چوڌاري چمڪڻ لاگو۔ ⁴ تو او ڌرتي تي هيٺو ڪريو هان هيڪ آواز شُٺيجڻ ۾ آيو ڪم، ”سائول، سائول، تُو مهني ڪيون تنگ ڪري هِي؟“ ⁵ سائول پوچو ڪم، ”اي پڙيو تُو ڪڻ هِي؟“ اُوئي ڪهيو ڪم، ”هُون يسوع هون، جڪي نِي تُو تنگ ڪري هِي۔“ ⁶ پڻ همي تُو اُٺ هان شهر ڏيشا جا۔ اوڻ تني شُٺايو جاشي ڪه تني ڪي ڪرڻو هِي۔“ ⁷ جڪو منڪ سائول پيڙا هتاء او پي ۾ مات ڪري اُپا رهيا، ڪيونڪه اُوئون رُگو آواز تو شُٺيو پڻ ڪيني پي ڏينو ڪونهي۔ ⁸ پڇي جڏي سائول ڌرتي شون اُونچو اُٺي اونڪي ڪولتي، تو او اونڌو هتوم اِئي ري ڪري منڪ اُوئي نِي هاڻون شون جهالي دمشق شهر ۾ لي گيا، ⁹ جيت سائول تين ڏن اونڌو هتو هان نڪو اُوئي کاڌو نڪو پيو۔

¹⁰ دمشق شهر ۾ حننيا نون رو هيڪ پڙيو يسوع رو چيلو ريتو۔ پڙيو يسوع اُوئي نِي شپني ۾ ڪهيو ڪم، ”حننيا۔“ اُوئي ڪهيو ڪم، ”جي پڙيو۔“
¹¹ پڙيو يسوع اُوئي نِي ڪهيو ڪم، ”اُٺ هان اُوئي مارگ تي جا، جڪي نِي سڌو مارگ ڪي هِي۔ اوڻ يهودا ري گهري جا هان ترسُس شهر آڻي سائول نون ري منڪ ري پوچا ڪري، اُوئي شون مل۔ او پراڻا ڪرتو هوشي۔“ ¹² اُوئي شپني ۾ حننيا نون ري منڪ نِي گهر ۾ اوتو هان آپري مائي تي

هاٿ راکٽي ڏينو هي، ڪه او پڙي ڏيکي۔“¹³ حننيا ڪهيو ڪه، ”اي پرڻو، مهڻي تموم گهڻي منڪون شون ايني منڪ ري باري ۾ سُڻيو هي ڪه يروشلم ۾ اُوئي تاري منڪون تي تموم گهڻا ظلم ڪيئا هي۔“¹⁴ او ايت پي آيو هي ڪه ايشور ري پوجاريون ري سردار ري موڪل شون تاري منڪون ني جهلاوي۔“¹⁵ پڻ پرڻو يسوع حننيا ني ڪهيو ڪه، ”تو پي تو جاء، ڪيونڪه مهڻي اُوئي ني آپري شيوا ري سارو چونديو هي۔ او پي جي قومون، بادشاهون هان اسرائيلي قوم آگهي مهارو نون ظاهر ڪرسي۔“¹⁶ هون آپ اُوئي ني بتائين ڪه اُوئي ني مهاري ڪري ڪترا ڏک ڏيکيا هي۔“¹⁷ پي جي حننيا اُوئي گهر ۾ گيو هان آيا هات سائول ري ماتي تي راڪي ڪهيو ڪه، ”پائي سائول، پرڻو يسوع مهڻي مليو هي، جيڪي مارگ ۾ تني درشن ڏينو هتو۔ اُوئي مهڻي ايني ري ڪري مليو هي ڪه تو جوئي شگهي هان ايشور تني پويتر آتما ڏي۔“¹⁸ پي جي سائول ري اونڪيون شون مچي ري چلر آئي ڪار ڪو شي ڪري هان او پڙي جوڻ لاگو۔ پي جي اُوئي ائي پويتر سنون ليئو۔¹⁹ پي جي اُوئي بائي ڪاڏي هان اُوئي ري شري ۾ طاقت آئي۔ او ڪينڪه ڏنن توڻي پرڻو يسوع ري چيلون پيڙو دمشق شهر ۾ رهيو۔

سائول رو دمشق شهر ۾ پرڻو يسوع رو پرچار

²⁰ پي جي سائول دمشق شهر ۾ جائي يهوديون ري پگتي گهرون ۾ پرچار ڪرڻ لاگو ڪه، ”پرڻو يسوع ئي ايشور رو ڏيڪرو هي۔“²¹ جيڪون پي آي بات سُڻي، او حيون هون ڪيون لاگا ڪه، ”ڪي آي او منڪ ڪونهي، جيڪو يروشلم شهر ۾ پرڻو يسوع ري منڪون ني تنگ ڪرتو؟ همي او ايت پي ايني ري ڪري آيو هي ڪه اهڙي منڪون ني جهالي ايشور ري موتي پوجاريون ڪڍي لي جاوي۔“²² پڻ سائول ري پولڻ ري همت آيون پي وڌيڪ هون گئي هان او ثابت ڪرتو رهيو ڪه پرڻو يسوع ئي مسيح هي۔ آي سُڻي دمشق شهر را يهودي حيون هيا۔²³ تموم گهڻي ڏنن شون پي جي يهوديون پيڙا هون سائول ني ٺپ مارڻ ري صلاح ڪي۔²⁴ پي جي او منڪ ڏن رات شهر ري در تي پهرو ڏيئا رهيا ڪه سائول ني ٺپ ماري۔ پڻ سائول ني ايني بات ري خبر پڙي گئي۔²⁵ ايني ري ڪري چيلون اُوئي ني رات رو توڪري ۾ گهاتي شهر ري پيت شون باهر ٺپائي چوڙيو۔

سائول رو يروشلم شهر ۾ پاچو آون

²⁶ پي جي جڏي سائول پاچو يروشلم شهر ۾ آيو، تو اُوئي پرڻو يسوع ري چيلون پيڙو شامل هون ري ڪوشش ڪي، پڻ او سڃاڻي اُوئي شون بيٺاجام ڪيونڪه اُونون ني اُوئي تي ڀروسو ڪونهي هتو ڪه او پي پرڻو يسوع رو چيلو هيو هي۔²⁷ تو برنباس، سائول ني سنتون ڪڍي لي گيو۔ برنباس اُونون ني او سڄو ڪئين سُڻايو ڪه سائول ڪيڪر مارگ ۾ پرڻو يسوع ني ڏينو هان اُوئي شون باتون ڪيئي هان ڪيڪر سائول دليري شون دمشق شهر ۾ پرڻو يسوع رو پرچار ڪيو۔²⁸ پي جي سائول اُونون پيڙو رهيو هان يروشلم ۾ آون جاوتو رهيو۔ او دليري شون پرڻو يسوع ري نون رو پرچار ڪرتو رهيو۔²⁹ او يوناني پولڻ آئي يهوديون شون پي باتون ڪرتو هان بحث ڪرتو، پڻ او منڪ اُوئي ني مارڻ ري ڪوشش ڪرڻ لاگا۔³⁰ جڏي وشواسيون ني ايني بات ري خبر پڙي، تو او سائول ني قيصر يا شهر ۾ لي گيا هان ترسُس شهر ڏيشا ملي چوڙيو۔³¹ ايني نموني پوري يهوديا، گليل هان سامريا صوبون ۾ سڄي وشواسي منبلي ني سُڪ رو شاش مليو۔ او پرميشور ري بي ۾ بيٺا رهيا هان پويتر آتما ري مدد شون بدتا گيا۔

پطرس رو هيڪي پونگڙي ني شاجو ڪرڻ

³² پطرس جيڪي ڪيٽ ڄاڻي وِشواسيون شون ملتو. هيڪ ڏن اِنئون هويو ڪه او اُونون وِشواسيون ڪيڊي گيوم جڪو لدا شهر ۾ ريتا. ³³ اوت اُوئي اينياس نون رِي هيڪي پونگڙي ني ڏينوم جڪو اَنون شالون شون موجي تي پڙيو هتو. ³⁴ پطرس اُوئي ني ڪهيو ڪه ”اينياس، يسوع مسيح ري نون شون شاجو هو هان آڀرو بچوڻو بيٽر.“ او اُوئيج تيم اُئي اڀو. ³⁵ اِي جوئي لدا شهر هان شارون علائقي ري تموم گهڻي منڪون پڙيو يسوع تي وِشواس راڪيو.

پطرس رو يافا شهر ۾ لڳائي ني جيتي ڪرڻ

³⁶ يافا شهر ۾ پڙيو يسوع ري هيڪ چيلي ريتي. اُوئي رو نون تبيتا هتو. (تبيتا رو مطلب هي ”هرڙي.“) او هر تيم نيڪ ڪوم ڪرتي هان غريبن ري مدد ڪرتي. ³⁷ اُونون ڏنون ۾ او بيمار هوئي هان مري گئي. اُوئي ني جهيلاڙي ڪوڀڙ ڏي اُوئي رو لاش ماڻلي ڪمري ۾ راڪيو. ³⁸ لدا شهر يافا شهر ري نيڙو هتو. اِئي ري ڪري جڏي چيلون ني خبر پڙي ڪه پطرس لدا شهر ۾ هي، تو اُونون پيئون منڪون ني اُوئي ڪيڊي ميلي منت ڪري ڪهيو ڪه، ”مهروني ڪري مهون ڪيڊي چيڪو آ.“ ³⁹ تو پطرس اُنيو هان اُونون منڪون پيڙو بئير هويو. جڏي او اوت ڀڳام، تو او اُوئي ني ماڻلي ڪمري ۾ لي ڳيا. اوت شجي رونڌيرون پطرس ڪيڊي ائي روئڻ لاڳي هان اُوئي ني او ڳايا بناوڻ لاڳي، جڪو تبيتا اُونون پيڙي رِي شيليا هتا. ⁴⁰ پطرس شجون منڪون ني باهر ڪاڍيا هان آپ گوڏا ڪوڙي پراڻا ڪي. پچي اُوئي لاش ڏيشا مونڌو ڪري ڪهيو ڪه، ”اي تبيتا، اُت.“ تو اُوئي اونڪي ڪولتي هان پطرس ني جوئي اُئي پيني. ⁴¹ پطرس اُوئي رو هات جهالي اُوئي ني اُٺائي هان وِشواسيون هان رونڌيرون ني اُٺائي تبيتا ني جيتي اُونون ري حوالي ڪي. ⁴² اِي بات شجي يافا شهر ۾ مشهور هوئي هان تموم گهڻي منڪون پڙيو يسوع تي وِشواس راڪيو. ⁴³ پچي پطرس تموم گهڻا ڏن يافا شهر ۾ شمعون نون ري هيڪي منڪ ڪيڊي رهيو، جڪو ڪالون رنگن رو ڪوم ڪرتو.

پطرس هان رومي فوجي آفيسر ڪرنيليس

10 ¹ قيصر يا شهر ۾ ڪرنيليس نون رو هيڪ منڪ هتو، جڪو رومي فوج رو اٽلي نون ري ٽولي رو آفيسر هتو. ² او هان اُوئي رو شجو خاندان نيڪ هان ايشور شون پيڄتو. او غريب يهوديون ري تموم گهڻي مدد ڪرتو هان هر تيم ايشور شون پراڻا ڪرتو. ³ هيڪ ڏن پيار رو اندازن تيني بجي ايشور ري هيڪي فريشتي شيني ۾ اُوئي ني ڪهيو ڪه، ”اي ڪرنيليس.“ ⁴ ڪرنيليس اُوئي ني ڏيڪي پيڄتو هان ڪهيو ڪه، ”جي سائين.“ تو فريشتي اُوئي ني ڪهيو ڪه، ”ايشور تاري پراڻائون شئي هي هان اُوئي ني خبر هي ڪه تو غريبن ري مدد ڪري هي.“ ⁵ همي تو ڪئينڪ منڪ يافا شهر ڏيشا ميل جڪو شمعون نون ري منڪ ني لي آوي، جڪي ني پطرس پي ڪي هي. ⁶ او ڪالون رنگ ڪرڻ آئي شمعون ڪيڊي ري هي. اُوئي رو گهر شموندر ري ڪپ تي هي. ⁷ اِي بات ڪري فريشتو بوڻو گيو. پچي ڪرنيليس آڀري پيئون نوڪرون هان آڀري شيوا ڪرڻ آئي فوجيون ۾ هيڪي نيڪ فوجي ني اُٺايو. ⁸ ڪرنيليس اُونون ني شجي بات سمجهائي هان يافا شهر ڏيشا مليا.

⁹ ٻيڃي ڏن اندازن ٻارهي ٻڃي، جڏي او شهر ري نيڙا آجون مارگ ۾ هتا، تو اوئيڇ تيم پطرس گهر ري ڇت تي پراڻا ڪرڻ گيو. ¹⁰ اوئي ني بؤڪ لاڳي هان من ۾ ڪئين ڪاوڙ ري ٻال لاڳي. ٻائي آجون تيار هوتي پڙي، تو ايشور اوئي ني شپنو بتايو. ¹¹ اوئي ڏينو ڪه آڪاش ڪليوڙو هي هان موتي چادر جهڙي ڪو شئي چارون ڪنڊون شون لٽڪيوڙي هينا اترتي پڙي. ¹² اوئي ۾ هر نموني را جنار، سرڪڻ آلا جيويو جنار هان پڪي هتا. ¹³ پڇي اوئي هيڪ آواز شُڻيو ڪه، ”اي پطرس، ائي هان ايئون ني باڊي ڪا.“ ¹⁴ پڻ پطرس ڪهيو ڪه، ”اي پڙيو، هون ڪڏي پي ڪونهي ڪائون، ڪيونڪه مهني ڪڏي پي حروم جون پليت شئي ڪونهي ڪاڏي.“ ¹⁵ پڙي آواز آيو ڪه، ”جڪي شيون ني ايشور حلال ڪهيو هي، تو اوئون ني حروم ني ڪي.“ ¹⁶ پطرس تين گهمرا آي بات شُڻي. پڇي او چادر يڪدم آڪاش ڏيشا ڪڙيڃي گئي. ¹⁷ پطرس آپري من ۾ حيرون هان پريشون هويو ڪه ايئي شپني رو مطلب ڪي هي؟ اترتي ۾ او منڪ جڪون ني ڪرنيليس ميليا هتا، اوئون ڪالون رنگ ڪرڻ آئي شمعون رو گهر جوئي ليئو هان آئي اوئي در تي اُڀا. ¹⁸ اوئون هيلو ڪري پوڇو ڪه، ”شمعون جڪي ني پطرس ڪي هي، ڪي او ايت ري هي؟“ ¹⁹ پطرس آجون توڙي اوئي شپني ري شوچ ۾ هتا، تو پويتر آتما اوئي ني ڪهيو ڪه، ”جو، تين آدمي ٿاري پوڇا ڪري پڙيا. ²⁰ ايئي ري ڪري ائي هان هينا جا هان بنا پي اوئون پيڙو بوئو جا، ڪيونڪه مهني اوئون ني ميليا هي.“ ²¹ تو پطرس هينو اترتي اوئون آدميون ڪڍي گيو هان ڪهيو ڪه، ”پطرس هون هون، ڪي تونرو مهني ۾ ڪو ڪوم هي؟“ ²² اوئون ڪهيو ڪه، ”مهوني رومي فوجي آفيسر ڪرنيليس ميليا هي. او نيڪ هان ايشور شون بيناڄڻ آلو منڪ هي. شجائي يهودي اوئي ري تموم گهڙي عزت ڪري هي. ايشور ري هيڪي فريشتي اوئي ني ڪهيو ڪه او ٿني آپري گهري اٿائي ٿاري باتون شُڻي.“ ²³ آي شُڻي پطرس اوئون ني گهري لي گيو هان اوئون ري ميموڙي ڪي. ٻيڃي ڏن او سنپري اوئون پيڙو بوئو. يافا شهر شون ڪئين وشواسي پائي پي اوئي پيڙا گيا.

²⁴ پڇي او ٻيڃي ڏن قيصر يا شهر ۾ آيا هان ڪرنيليس آپري عزيزون هان خاص دوستون ني پيڙا ڪري اوئون ري انتظار ۾ هتا. ²⁵ جڏي پطرس گهر ۾ اوڻ لاڳو، تو ايئون هويو ڪه ڪرنيليس اوئي شون ملڻ ري شارو گيو هان اوئي آگهي شيش نمايو. ²⁶ پڻ پطرس اوئي ني اٺائي ڪهيو ڪه، ”اونچو ائي، هون پي ٿي جهڙو انسون هون.“ ²⁷ پڇي پطرس اوئي شون باتون ڪرتو گهر ۾ گيو هان تموم گهڙي منڪون ني پيڙا ڏينا. ²⁸ پطرس اوئون ني ڪهيو ڪه، ”توني تو خبر هي ڪه آي بات يهودي ڌرم ري خلاف هي ڪه ڪو پي يهودي ڪي ٻيڃي قوم آئي شون واسطو راڪي، جون اوئون ڪڍي جاوي. پڻ ايشور مهني تي ظاهر ڪيو هي ڪه هون ڪي پي منڪ ني گهت جون پليت ني شمعون. ²⁹ ايئي ري ڪري جڏي مهني اٿايو، تو هون بنا پوڇي بوئو آيو. همي مهني شُڻام ٿي مهني ڪيون اٿايو هي؟“ ³⁰ ڪرنيليس ڪهيو ڪه، ”تین ڏن پيل هون آپري گهر ۾ بيبار رو اندازن تيني ٻڃي پراڻا ڪرتو پڙيو، تو مهني ڏينو ڪه هيڪ منڪ چمڪيلا گاپا پيروڙا مهاري آگهي آئي اُڀو ³¹ هان اوئي ڪهيو ڪه، ’اي ڪرنيليس، ايشور ٿاري پراڻائون شُڻي هي هان اوئي ني خبر هي ڪه تو غريبن ري مدد ڪري هي، ³² ايئي ري ڪري ڪيني يافا شهر ڏيشا ميل، تو او شمعون نون ري منڪ ني لي آوي، جڪي ني پطرس پي ڪي هي. او ڪالون رنگ ڪرڻ آئي شمعون ري گهري ري هي، جڪو شموندر ري ڪپ تي

هي۔³³ اُوڻيج تيم مهي ٿي ڏيما منڪ مليا هان ٿي پلو ڪيو ڪه ٿو آيو رو۔ همي مهي شجائي ايشور آگهي حاضر هون ڪه جڪو ڪئين اُوڻي ٿني سٿايو هي، او سٿون۔“

پطرس رو پيچي قوم ۾ پريو يسوع رو پرچار

³⁴ پيچي پطرس ايشورن ڪهيو ڪه، ”همي مهي پڪو وشواس هي ڪه ايشور ڪيرو پي باشو ڪونهي ليتو³⁵ پڻ هر هيڪ قوم ۾ جڪو اُوڻي شون پيئاجي هان نيڪي ڪري هي، ايشور اُوڻي ني پسند ڪري هي۔³⁶ ٿني تو ايشور ري نيپي ري خبر هي، جڪو اُوڻي اسرائيلي قوم ني ڏينو ڪه اُوڻي يسوع مسيح ري وسيلي، جڪو شجون رو پريو هي، آپت ۾ هيڪ هوڻي ريون ري خوشي ري خبر ڏيني۔³⁷ ٿوني ايئي بات ري خبر هي جڪو پويتر سنون ڏيون آئي يوحنا ري پرچار شون پيچي گليل صوبي شون شروع ڪري، شجي يهوديا صوبي ۾ مشهور هويو³⁸ ڪه ايشور، يسوع ناصري ني چوندي پويتر آتما هان قدرت ڏيني۔ او پلائي ڪرتو هان شجائي جڪون ني شيطون تنگ ڪرتو، اوتون ني شاجا ڪرتو رهيو، ڪيونڪه ايشور اُوڻي پيڙو هتو۔³⁹ مهي اُوڻي شجي ڪومون را گواه هون، جڪو اُوڻي يروشلم هان يهوديون ري پيچي علائقون ۾ ڪيئا، پڻ تو پي اوتون اُوڻي ني شولي تي چاهي ڪوڪا هٿائي تونگائي هان مراڻي چوڙيو۔⁴⁰ ايشور اُوڻي ني تيجي ڏن جيتو ڪيو هان منڪون پي اُوڻي ني ڏينو۔⁴¹ شجون منڪون نام پڻ او جڪو اُوڻي را گواه هان پيل شون ايشور را چونديوڙا هتام يعني مهي جڪون اُوڻي ري جي اٺڻ شون پيچي اُوڻي پيڙو ڪادو پيو۔⁴² پريو يسوع مهوني اي حڪم ڏينو ڪه شجي منڪون ۾ پرچار ڪرو هان گواهي ڏينو ڪه هون اوج هون جڪي ني ايشور جيتون هان مونوڙون رو انصاف ڪرڻ آلو چونديو هي۔⁴³ اُوڻي ري باري ۾ ايشور را شجائي ني اي گواهي ڏي هي ڪه جڪو پي اُوڻي تي وشواس راکشي، اُوڻي ني پاپون ري معافي ملشي۔“

پيچي قوم ني پويتر آتما ملڻ

⁴⁴ پطرس اي باتون ڪرتو پيڙو، تو ايشور اوتون شجون ني پويتر آتما ڏينو جڪو اُوڻي ري باتون سٿئا پڙيا۔⁴⁵ پطرس پيڙا جترا پي يهودي وشواسي آيا هتام او شجائي حيرون هويا ڪه ايشور پيچي قومون ني پي پويتر آتما ڏينو هي۔⁴⁶ ڪيونڪه او ڌار ڌار بولي بولتا پڙيا هان ايشور ري بڪوڻ ڪرتا پڙيا۔ پيچي پطرس اوتون ني ڪهيو ڪه،⁴⁷ ”ايشور منڪون ني مهون آئي ڪار پويتر آتما مليو هي۔ همي ايشور ني پوڻي شون پويتر سنون ڏيون شون ڪيو پالشي؟“⁴⁸ پيچي پطرس حڪم ڏينو ڪه، ”اوتون ني يسوع مسيح ري نون شون پويتر سنون ڏينو جاوي۔“ پيچي اوتون پطرس ني ڪهيو ڪه، ”مهروني ڪري ڪئين ڏن مهون ڪيڍي ري۔“

پطرس رو يروشلم ري منڊلي ني خبرچار سٿاوڻ

¹ سنتون هان يهوديا صوبي ري وشواسيون سٿيو ڪه پيچي قومون آلا پي ايشور ري باتون سٿي وشواسي هويا هي۔² جڏي پطرس يروشلم شهر ۾ آيو، تو ڪتنو ڪيٿوڙا وشواسي اُوڻي شون اي بحث ڪري ڪيوڻ لاگا ڪه،³ ”ٿو بنا ڪتني آتون ڪيڍي ڪيون گيو هان اوتون پيڙي بائي ڪيون ڪاڏي؟“⁴ تو پطرس اوتون ني شروع شون لي جڪو ڪئين هويو هتو، او شجو اوتون ني سٿايو۔

5 پطرس ڪهيو ڪم، ”هون يافا شهر ۾ پراڻا ڪرتو پڙيوم، تو ايشور مهني شپني ۾ بتايو ڪه ڪينڪه شني موتي چادر آلي ڪار چارون ڪنڊون شون لٽڪيوڙي آڪاش شون اترې مهني ڪيڊي آئي. 6 جڏي مهني ڏهين شون ڏينوم، تو اوني ۾ هر نموني را چنار، شرڪ آلا جيرو چنار هان پڪي هئا. 7 پچي مهني هيڪ آواز شنيو ڪم، ’اي پطرس، ائي هان ايئون ني باڊي ڪا.‘ 8 پڻ مهني ڪهيو ڪم، ’اي پريوم هون ڪڏي پي ڪونهي ڪائون ڪيونڪه مهني ڪڏي پي حروم جون پليت شني ڪونهي ڪاڏي.‘ 9 پڙي آڪاش شون آواز آيو ڪم، ’جڪو شيون ايشور جلال ڪيني هي، تو ائون ني حروم ني ڪي.‘ 10 مهني تين گهمرا آي بات شني هان پچي او سجي شيون آڪاش ڏيشا پاچي ڪنيجي گئي. 11 اوني تيم تين آدمي جڪو قيصريا شهر شون مهني ڪيڊي ميليوڙا هئا، اوٽ پگا جيت مهني ريتا. 12 پويتر آتما مهني ڪهيو ڪم، ’تو بنا پي ائون پيڙو بوئو جا.‘ پچي آي چي وشواسي پائي پي مهني پيڙا ڪرنيليس ري گهري گيا. 13 اوٽ ڪرنيليس مهوني اوني فريشني ري باري ۾ شٽايو جڪو اوني آيري گهري ڏينو هتو. اوني فريشني اوني ني ڪهيو ڪم، ’ڪينڪه منڪ يافا شهر ڏيشا ميل جڪو اوٽ شون شمعون ني پيڙو ڪري لي آوي جڪي ني پطرس پي ڪي هي. 14 او تني اهڙي باتون شٽاشي جڪي شون تني هان تاري سجي گهر ني مگني ملشي.‘ 15 جڏي هون ايشور ري باتون ڪرڻ لاڳو، تو ايشور ائون ني اونيچ نموني پويتر آتما ڏينو جهڙي نموني شروع ۾ آيون ني ڏينو هتو. 16 تو مهني پريو يسوع ري ڪهيوڙي او بات ياد آئي ڪم، ’يوحنا تو پوئي شون پويتر سنون ڏينو پڻ توئي پويتر آتما شون پويتر سنون ڏينو جاشي.‘ 17 ايئي ري ڪري جڏي ايشور ائون ني اوج نعمت ڏيني هي جڪو مهوني پريو يسوع مسيح تي وشواس راکڻ شون ملي هتي، تو پچي هون ڪيو هتو جڪو ايشور ني پالون؟“ 18 او آي شني مات هويا هان ايشور ري ٻڌائي ڪري ڪيوڻ لاڳا ڪم، ”تو پچي شاجيلي ايشور پچي قوم ني پي موقعو ڏينو هي ڪه او آيري پاپون شون توبهون ڪري هان او ائون ني امر جيون ڏي.“

انطاڪيا شهر ري وشواسي مندلي

19 ايسٽيفنس ري ماريچڻ شون پچي يروشلم ري وشواسيون تي ڏڪ آيا هان ڏڪون ري ڪري منڪ بڪري گيا. ائون ۾ ڪئين فنيڪي علائقي، ڪئين ڪپرس بيت هان ڪئين انطاڪيا شهر توئي پگا. پڻ او يهوديون شون نال بيجو ڪيني پي ايشور ري باتون ڪونهي شٽاوتا. 20 پڻ ائون ۾ ڪئين ڪپرس بيت هان ڪرين شهر را ريوڻ آلا هئا جڪو انطاڪيا شهر ۾ آئي يونانيون ني پي پريو يسوع ري خوشي ري خبر شٽاوڻ لاڳا. 21 پرميشور ائون پيڙو هتو هان تموم گهڻي منڪون آي باتون منئي هان پريو يسوع تي وشواس راکيو.

22 جڏي يروشلم ري وشواسي مندلي ني ايئي بات ري خبر پڙي، تو ائون برنباس ني انطاڪيا شهر ڏيشا ميليو. 23 جڏي برنباس اوٽ پڳو، تو ايشور ري ڪريا جوئي تموم گهڻو خوش هويو. اوني سجون ني هدايت ڪي ڪم، ”پوري من شون پريو يسوع لاري بيتا رو.“ 24 برنباس هيڪ نيڪ منڪ هتو. او وشواس هان پويتر آتما شون پريجوڙو هتو. اوني ري پرچار ري ڪري تموم گهڻي منڪون پريو يسوع تي وشواس راکيو.

25 پڇي برنباس سائول ني جوئڙي ري شارو ترئس شهر ڏيئا گيو. 26 جڏي او مليوم تو اوئي ني انطاڪيا شهر ۾ لي آيو. اوٽ او پيئي شجو شال وشواسي مندلي پيڙا رهيا هان تموم گهڻي منڪون ني ايشور ري باتون شيڪاوتا رهيا. انطاڪيام بيلڪو شهر هتو جڪي ۾ پريو يسوع را چيلا ”مسيحي“ ڪهيجا.

27 اوئون ڏنون ۾ ڪئينڪه وشواسي جڪو اگڪتي ڪرنام او يروشلم شهر شون انطاڪيا شهر ۾ آيا. 28 اوئون ۾ هيڪي رو نون اگس هتو اوئي پويتر آتما ري مدد شون اُني ڪهيو ڪم ”شجي دنيا ۾ تموم گهڻو ڏڪال پڙشي.“ اي ڪلوديس بادشاه ري ڏنون ۾ هويو. 29 اي شئي چيلون صلاح ڪي ڪه آپري آپري پوهج شون يهوديا صوبي ۾ ريوڻ آلي وشواسيون ري مدد ري شارو ڪئين ميلي. 30 پڇي اوئون ايشور ڪيو هان برنباس هان سائول ري هائون اوٽ ري وشواسي مندلي ري اگوئون ري شارو امداد ميلي.

هيروديس بادشاه رو وشواسي مندلي تي ظلم

12

1 اوئون ڏنون ۾ هيروديس اگريا بادشاه وشواسي مندلي ري ڪئينڪه منڪون ني تنگ ڪرڻ شروع ڪيو. 2 اوئي يوحنا ري پائي يعقوب ني تلوار شون مراني چوڙيو. 3 جڏي اوئي ڏينو ڪه يهودي ايني بات شون خوش هويا هي، تو اوئي بنا ڪمير بائي ري پر تي پطرس ني پي بونڊايو. 4 هيروديس بادشاه پطرس ني بونڊاوڻ شون پڇي اوئي ني جيل ۾ قيد ڪرايو هان چار چار فوجيون را چار ٽولا اوئي تي پهرو ڏيوڻ ري شارو راکيا. هيروديس بادشاه ري مرضي هتي ڪه پطرس رو فيصلو منڪون ري روبرو فسح ري پر شون پڇي ڪري. 5 جيل ۾ پطرس تي پهرو هتو پڻ وشواسي مندلي اوئي ري شارو پوري من شون ايشور شون پراٿا ڪرتي رئي.

ايشور رو پطرس ني جيل شون چوڙاوڻ

6 جڏي هيروديس بادشاه پطرس ني منڪون ري روبرو لي اوڻ آلو هتو، تو اوئيج رات پطرس بيئون شونڪڙون شون باڏوڙو بيئون فوجيون ري بچ ۾ اونگاڙو هتو هان پهريدار جيل ري در تي پهرو ڏيئا پڙيا. 7 تو اوچتو پرميشور رو هيڪ فريشتو آيو هان اوئي ڪوني ۾ تيز اڃالو هويو. فريشتي پطرس ني شجاگ ڪري ڪهيو ڪم، ”چيڪو ائي.“ پڇي شونڪڙون اوئي ري هائون شون ڪلي گئي. 8 فريشتي اوئي ني ڪهيو ڪم، ”اپرو سندرو بوند هان آيرا جئا پير.“ اوئي ايشور ڪيو. پڇي فريشتي اوئي ني ڪهيو ڪم، ”اپرو جبو پير هان مهاري لاري آ.“ 9 او نڪري اوئي لاري بيوڻ لاگو. او اي سمجهو ڪه هون شپني ۾ هون هان اوئي ني ڪو پي خبر ڪونهي هتي ڪه جڪو ڪئين فريشتي ري وسيلي هوڙي پڙيو، او شاچي بات هي. 10 پڇي او بيلڪي هان بيچي پهري شون نڪري اوئي لوه ري در تي پڳام، جڪو شهر ڏيئا ڪلتو. او در هاڻي اوئون ري شارو ڪلي گيو. پڇي جڏي او اوٽ شون لنگهي گهتي ۾ جاوتا پڙيا، تو فريشتو اوچتو اوٽ شون بوڻو گيو.

11 جڏي پطرس ني خبر پڙي ڪه اي شپنو تو ڪونهي، پڻ حقيقت هي، تو اوئي ڪهيو ڪم، ”شاچيلي، پرميشور آيو فريشتو ميلي مهني هيروديس بادشاه ري هات شون بچايو هي هان يهودي قوم ري شجي اميدون تي پوڻي ڦيريو هي.“ 12 پڇي جڏي پطرس اي بات سمجهي گيو، تو او يوحنا

جكې نې مرقس پي كيتام اوئي ري ما مريم ري گهري آيو. اوت تموم گهڻا منك پيٽا هوئي پراتنا كرتا پٽيا. ¹³ جڏي اوئي در كركايو، تو گهر شون رڏي نون ري بونهي در تي آئي. ¹⁴ جڏي اوئي پطرس رو ٻولڻ شٽيوم، تو خوشي شون در كولڻ پونٽري هان آي شٽاوڻ ري شارو ناشتي پاچي گئي كه در تي پطرس اڀو هي. ¹⁵ اوئون اوئي نې كهيو كه، ”كي تو كالهې هوئي ري؟“ پڻ او پڪ شون اينوج كيتي رئي. اوئون كهيو كه، ”تي كو اوئي رو فريشتو ڏينو هوشي.“

¹⁶ پطرس در كركاوتو رهيو. جڏي اوئون در كوليم، تو اوئي نې جوئي حيرون هويا. ¹⁷ پطرس اوئون نې هات رو اشارو كري كهيو كه هاكو ني ڪرو. پچي اوئي اوئون نې شٽايو كه پرميشور مهني كهڙي نموني جيل شون ڪاڍيو هي. پچي اوئون نې كهيو كه، ”يعقوب هان بيجي وشواسيون ني آي بات شٽايا.“ پچي او اوت شون بئير هوئي بيجي جگها ڏيما گيو.

¹⁸ جڏي ڏن اگوم، تو فوجي پريشون هوئي گهرايا كه پطرس ڪيئا گيو. ¹⁹ پچي هيروديس بادشاه پطرس نې جوڻڻ رو حڪم ڏينو هان جڏي او ڪونهي لادوم، تو اوئي پهريدارون شون پوچا گاچا ڪي هان پچي حڪم ڏينو كه، ”اينون پهريدارون ني ماري چوڙو.“ پچي هيروديس، يهوديا رو علائقو چوڙي ڪئين نيم ري شارو قيصر يا شهر ۾ گيو.

هيروديس بادشاه ري موت

²⁰ هيروديس بادشاه صور هان صيدا شهر ري منڪون تي تموم گهڻو ڪاوڙيو. ايني ري ڪري اوئون منڪون بادشاه شون منوئي ري شارو آيت ۾ صلاح ڪي. پچي او بلسٽس ڪڍي گيا، جڪو بادشاه ري محل رو خاص نوڪر هتو كه اوئي ني آيو ڪري. او آي ايني ري ڪري ڪرتا پٽيا، ڪيونڪه اوئون رو ملڪ هيروديس بادشاه ري ملڪ شون ڪاوڻ پيڻڻ رو سيمون ليتو.

²¹ پچي هيروديس بادشاه هيڪ ڏن پڪو ڪيو هان بادشاهي پوشاڪ پيري آڀري گادي تي پيشي تقرير ڪرڻ لاگو. ²² تو منڪون زور شون كهيو كه، ”آي انسون نام پڻ ڏيونتا ٻولي پٽيو.“ ²³ اوئيچ نيم پرميشور ري فريشتي اوئي ني سزا ڏيني هان او بيمار هويوم، ڪيونڪه اوئي ايشور ري جگها آڀري بڪوڻ ڪرائي. پچي اوئي ري بيت ۾ ڪيٽا پٽيا هان ڪئين ڏنون شون پچي مري گيو.

²⁴ پڻ ايشور ري باتون تموم گهڻي بدتي گئي هان تموم گهڻا منڪ پريو يسوع تي وشواس راکتا گيا.

²⁵ برنباس هان سائول يروشلم ۾ امدادي ڏيونڻ رو كوم پورو ڪيو. پچي او يوحنا جڪي نې مرقس پي ڪيتام اوئي ني پيٽو لي پاچا انطاڪيا شهر ۾ گيا.

پويترا آتما رو برنباس هان سائول ني چوندڻ

¹ انطاڪيا شهر ري وشواسي مندلي ۾ تموم گهڻا نبي هان استاد هتا. اوئون ۾ برنباس، شمعون جڪي ني ڪالو پي ڪيتام لوڪيس ڪرني، محنايم، جڪو گليل صوبي ري چوڻي حصي ري گورنر، هيروديس انتپاس رو نئي ٿڪي رو دوست هتو هان سائول پي

پيٽو هتو. 2 جڏي او روزا راڪي بريميشور ري پگتي ڪرتا پڙيا، تو پويتر آتما اوتون ني ڪهيو ڪم، ”برنباس هان سائول ني اوتني خاص كوم ري شارو چوندوم جڪي ري ڪري مهني اوتون ني اٿايا هي.“

3 پچي اوتون روزا راڪيا هان برنباس هان سائول تي آيرا هات راڪي پرائنا ڪي هان پچي اوتون ني ميليا.

برنباس هان سائول رو ڪپرس بيت جاوڻ

4 ايئي نموني پويتر آتما برنباس هان سائول ني ميليا. پيل او سلوڪيا شهر ۾ گيا هان پچي اوت شون بيٽي ۾ چڙهي ڪپرس بيت ڏيشا گيا. 5 جڏي او سلميس شهر ۾ پڳام، تو يهوديون ري پگتي گهرون ۾ ايشور ري باتون رو پرچار ڪرڻ لاگا هان يوحنا مرقس اوتون ري مدد ري شارو پيٽو هتو. 6 پچي جڏي او شجي بيت ۾ ڦرنا ڦرنا پافس شهر ڪيڏي پڳام، تو اوتون ني اوت هيڪ يهودي جادوگر پيٽو هيو. اوتني رو نون بريسوع هتو هان او ڪوڙي اگڪي ڪرتو. 7 او بيت ري گورنر سرگيس پولوس پيٽو هتو، جڪو هيڪ شمجهدار منڪ هتو. گورنر برنباس هان سائول ني آپ ڪيڏي اٿايا، ڪيونڪ او ايشور ري باتون شٽن ري شارو ڪرتو. 8 پڻ جادوگر جڪي رو يوناني نون اليماس پي هتو، او برنباس هان سائول ري خلاف هيو هان گورنر ني پريو يسوع تي وشواس راڪڻ شون پالڻ ري ڪوشش ڪرڻ لاگو. 9 تو سائول جڪي ني پولوس پي ڪيتا، پويتر آتما شون پريجي گيو هان اوتني جادوگر ني ذهيون شون جوڻ لاگو. 10 پولوس اوتني ني ڪهيو ڪم، ”اي شيطون را اولاد، تو هر نموني ري نڪي هان پاپ شون پريوڙو هي هان هر نموني ري نيڪي رو دشمن هي. ڪي تو پريميشور رو شدو مارگ خراب ڪرڻ ڦٽو ڪونهي ڪري؟“ 11 همي ايشور تني سزا ڏيشي. تو اونڌو هوي هان ڪئين ڏنون توڻي ڪئين ڪونهي ڏيڪي.“ پچي اوتنيج تيم جادوگر اونڌو هيو هان او آيرا هات اينا اوتنا ڪرڻ لاگو ڪه اوتني رو هات جهالي لي جاوي. 12 جڏي گورنر اي شجو ڪئين ڏينو، تو اوتني وشواس راڪيو، ڪيونڪ او برنباس هان پولوس شون پريو يسوع ري باري ۾ شٽي حيون هتو.

انطاڪيا شهر ۾ پرچار

13 پچي پولوس هان اوتني را ساٿي پافس شهر شون بيٽي ۾ چڙهي بئير هويا هان پمفليا صوبي ري شهر پرگا ۾ پڳام. پچي يوحنا مرقس اوتون ني اوت چوڙي پاچو يروشلم شهر ڏيشا گيو. 14 پڻ پولوس هان برنباس پرگا شهر شون بني پسديا علائقي ري انطاڪيا شهر ۾ پڳام. اوت او چنچر يعني پويتر ڏن تي پگتي گهر ۾ گيا. 15 توريت شاستر هان بيچي نبيون رو لڪيوڙو شاستر پڙهڻ شون پچي پگتي گهر ري سردارون اوتون ني ڪئي ميلو ڪم، ”اي پايون، جي منڪون ني همت ڏيوڻ ري شارو تونري من ۾ ڪو پي بات هي، تو شٽائو.“ 16 ايئي تي پولوس اوتني هان اوتون ني هاتون ري اشارون شون مات ڪرايا هان ڪهيو ڪم، ”اي اسرائيليون هان بيچي قوم آتون، تي جڪو ايشور ني منو هوم مهاري بات ذهيون ڏي شٽو.“ 17 آڀڻي اسرائيلي قوم ري ايشور آڀڻي باب ڏاڏون ني چونديا. جڏي آڀڻي قوم مصر ملڪ ۾ پرديسي هتي، تو اوتني ني هيڪ موتي قوم نائي هان آيري قدرت شون اوت شون ڪاڍي لي آيو. 18 او اندازن چاليهه شالون توڻي رڻ پٽ ۾ اوتون ري شجي باتون برداش ڪرتو رهيو. 19 پچي ڪنعان ملڪ ۾ شات قومون ني مٿائي آڀڻي قوم ني اوتون ري ملڪ را ڏئي ڪيئا. 20 ايئنون باتون ني اندازن شادي چار شئو هويا هي. پچي سيموئيل نبي ري زموني توڻي اوتون ۾

جج راکيا. ²¹ اُوئي شون پچي اُونون بادشاه رو كهيو هان ايشور بنيامين ري قبيلي شون قيس ري ذيكري سائلو ني چاليه شالون توئي اُونون رو بادشاه ناهيو. ²² پچي اُوئي ني هتائي داؤد ني اُونون رو بادشاه ناهيوم، جگي ري باري م ايشور اي كهيو كم، 'جگو مهاري من ني وئوم، يسي رو ذيكرو داؤد اهزوج هي هان داؤد اوج كرشې جگو هون اُوئي ني كئين-،' ²³ اُوئي ري پيژهي شون ايشور آپري واعدي تي اسرائيلي قوم كيدي هيڪ مگني داتا يعني پريو يسوع ني ميليو. ²⁴ جگي ري اوڻ شون پيل پويتر سنون ذيوڻ آلي يوحنا سحي اسرائيلي قوم ري شومهو توبهون ري پويتر سنون رو پرچار كيئو. ²⁵ پچي جدي يوحنا آپرو كوم پورو كرڻ آلو هتوم، تو اُوئي كهيو كم، 'تي مهنې جگو شمجهو هوم، هون او كونهي هون- پڻ شوم، مهې شون پچي جگو اوڻ آلو هي، هون اُوئي ري جتي را كشا كولڻ جهڙو پي كونهي هون-،' ²⁶ اي پايون، تي جگو ايراهيم را اولاد هو هان بيجي قوم آتون، تي جگو ايشور ني منو هوم، اُوئي مگني رو اي نياپو آيون كيدي ميليو هي. ²⁷ يروشلم آتون هان اُوئي ري سردارون نكو پريو يسوع ني اولكيو هان نكو نبون ري باتون شمجهي، جگو هر هيڪ پويتر ڏن تي شتائي جاوي هي-، ايئي ري كري اُونون پريو يسوع تي الزوم هئي اُوئي ني موت ري سزا ڏيرائي. ²⁸ اُونون ني پريو يسوع ني مارڻ رو كو پي ثبوت كونهي مليوم، تو پي اُونون رومي گورنر پلاطس ني منڌ كې كم، 'اُوئي ني ماري چوڙو-،' ²⁹ جدي اُونون ري وسيلي پريو يسوع ري باري م شاستر ري لڪيوڙي سحي باتون پوري هوئي، تو اُوئي ني شولي شون اتاري مكوم م راکيو. ³⁰ پڻ ايشور اُوئي ني موٽوڙون شون جيتو كيئو. ³¹ او تموم گهڻي ڏنون توئي اُونون ني درشن ڏيتو رهيو، جگو اُوئي پيڙا گليل صوبي شون يروشلم شهر م آيا هتا. همي آبي اسرائيلي قوم ري آگهي اوج اُوئي را گواه هي. ³² مهې توني اُوئي واعدي ري باري م خوشي ري خبر شتائون هون، جگو آبي باپ ڏاڏون شون كيئوڙو هتو ³³ كه ايشور، پريو يسوع ني جيتو كيئو هان اُونون ري اولاد ري شارو يعني آبي شارو، او واعدو پورو كيئو. ايئي ري كري زبور شاستر ري بيجي آڏيا م لڪيوڙو هي كم،

'تو مهارو ذيكرو هي،

آج شون هون تارو پتا هون-،'

³⁴ باقي اي بات كه ايشور پريو يسوع ني موٽوڙون شون جيتو كيئو كه او كڏي پي كونهي مري-، اُوئي ري باري م اينون لڪيوڙو هي كم،

'هون او پويتر هان ساچي برڪتون توني ڏئين،

جگي رو مهې داؤد شون واعدو كيئو هتو-،'

³⁵ ايئي ري كري او زبور شاستر ري هيڪي بيجي آڏيا م كي هي كم،

'تو آپري پويتر شيواداري ني مكوم م گڙڻ كونهي ڏي-،'

³⁶ داؤد بادشاهم آپري تيم تي ايشور ري مرضي پوري كري مري گيو هان جائي آپري باپ ڏاڏون پيڙو بوريجو هان گليو. ³⁷ پڻ پريو يسوع جگي ني

ايشور جيتو كيئو، اُوئي رو شرير كونهي گليو. ³⁸ ايئي ري كري پايون، جگو بات مهې شتائون پڙيا، او شني نموني شمجهو كه پريو يسوع ري

وسيلي ٿوئي پاپون ري معافي ملي هي. ³⁹ موسي ري شريعت تي بيوڻ شون ٿوئي پاپون شون معافي ڪونهي ملتي، پڻ پريو يسوع تي وشواس راڪڻ

شون ٿوئي پاپون ري معافي ملي هي. ⁴⁰ ايني ري ڪري هوشيار روم ايتون ني هووي ڪه جڪو باتون نبين ڪئي هي، او ٿون ۾ پوري هووي ڪم،

⁴¹ اي ننولي ڪرڻ آتون جوئوم

تي حيرت ۾ پڙشو هان متي جاشوم

ڪيونڪه هون ٿونري زموني ۾ هيڪ اهڙو ڪوم ڪرين

ڪه جي ٿوني ڪو شٽاوي،

تو ٿي اوئي رو ڪڏي پي پروسو ڪونهي ڪرو.“

⁴² پچي جڏي پولوس هان برنباس پگتي گهر شون باهر جاوڻ لاڳام، تو منڪ منت ڪري ڪيوڻ لاڳا ڪم، ”تي اوڻ آئي پويتر ڏن تي پي مهوني اهڙي

باتون شٽايا.“ ⁴³ پگتي شون پچي تموم گهڻا يهودي هان ايشور تي وشواس راڪڻ آلا ٺوئا يهودي پولوس هان برنباس لاري بيوڻ لاڳا. پچي پولوس هان

برنباس اوئون شون باتون ڪئي هان اوئون ني پروسو ڏيرايو ڪم، ”ايشور ري ڪريا تي وشواس راڪو.“

⁴⁴ پچي پويتر ڏن تي اندازن شجو شهر پرميشور ري باتون شٽڻ ري شارو پيڙو هويو. ⁴⁵ پڻ يهودي اتر منڪ ڏيڪي ريشي ٻليا هان او پولوس ري باتون

ري خلاف هويا هان اوئي ني گال گند ڏيوڻ لاڳا. ⁴⁶ پولوس هان برنباس دليري شون ڪيوڻ لاڳا ڪم، ”اي ضروري هتو ڪه ايشور ري باتون پيل

ٿون يهوديون ني شٽائي جاوي، پڻ ٿي اي ڪونهي منتا هان نڪو امر جيون ليوڻ ري شارو ڪرنا، ايني ري ڪري مهني پچي قوم ڏينما جائون پڙيا.

⁴⁷ ڪيونڪه پرميشور مهوني اي حڪم ڏينو هي ڪم

’مهني ٿني پچي قوم ري شارو اڃالو ڪري راڪيو هي

ڪه شجي ڏنيا ري منڪون ني مگتي ملي.“

⁴⁸ اي بات شٽي پچي قوم آلا خوش هويا هان پريو يسوع ري باتون ري بڪوڻ ڪرڻ لاڳا هان جڪون ني ايشور امر جيون ري شارو چونديا هتا

اوئون وشواس راڪيو. ⁴⁹ ايني نموني اوئي شجي علائقي ۾ پريو ري باتون بدتي گئي. ⁵⁰ پڻ يهوديون، ايشور تي وشواس راڪڻ آئي امير لڳايون هان

شهر ري سردارون ني پڙڪائي پولوس هان برنباس ني تموم گهڻا پريشون ڪينا هان اوئون ني اوئي علائقي شون دڙڪا ڏي تگڙي ڪاڍيا. ⁵¹ ايني تي

پولوس هان برنباس آڀري پگون ري متي اوئون ري آگهي چنڊي اڪنيم شهر ڏينما ڳيا. ⁵² پڻ انطاڪيا شهر ۾ ريوڻ آلا چيلا خوشي هان پويتر آتما

شون پريجوڙا هتا.

پولوس هان برنباس رو اکنيم شهر ۾ پرچار

14

¹ جڏي پولوس هان برنباس اکنيم شهر ۾ پڳام، تو اوت پي يهوديون ري پگتي گهرون ۾ گيا. اوت اوتون اهڙو پرچار ڪيو ڪه تموم گهڻا يهودي هان يوناني وشواسي هويا. ² پڻ جڪون يهوديون وشواس ڪونهي راڪيوم اوتون بيچي قوم آتون ني پڙڪايا هان اوتون ني وشواسيون ري خلاف ڪيا. ³ تو پي پولوس هان برنباس تموم گهڻي ڏنون توڻي اوتج رهيا هان پريو يسوع تي وشواس راڪي دليري شون پرچار رو ڪوم ڪرتا رهيا. پريو يسوع اوتون ري هاتون پرچا هان عجيب ڪوم ڪرائي آي ثابت ڪرتو رهيو ڪه اوتني ري ڪريا ري باتون شاچي هي. ⁴ پڻ شهر ري منڪون را بي ٽولا هوئي گيا. ڪئينڪه يهوديون ري پاشي هان ڪئينڪه سنتون ري پاشي هويا.

⁵ پچي يهودي هان بيچي قوم آلا اوتون ري بي عزتي ڪرڻ لاگا هان پتر هڻي مارڻ ري شارو آپري سردارون شوڏا اوتون تي حملو ڪرڻ آيا. ⁶ جڏي اوتون ني آي خبر پڙي، تو او لڪانيا علائقي ري شهرن لسترا هان دربي هان اوتون ري آشي پاشي ري علائقي ڏيشا ناشي گيا. ⁷ اوت پي او خوشي ري خبر سٿاوتا رهيا.

پولوس هان برنباس رو لسترا هان دربي شهرن ۾ جاوڻ

⁸ لسترا شهر ۾ هيڪ منڪ هتوم جڪو جنم شون پونگڙو هتو هان او ڪڏي پي بني ڪونهي شگهتو. ⁹ او پولوس ري باتون سٿتو پڙيو. جڏي پولوس اوتني ني چتائي ڏينو ڪه اوتني رو اترو وشواس هي ڪه او شاجو هوئي شگهي هي، ¹⁰ تو اوتني ني زور شون ڪهيو ڪه، ”آپري پگون تي آپ.“ تو او تپ ڏي اٿيو هان بيوڻ لاگو. ¹¹ جڏي منڪون پولوس رو آي ڪوم ڏينوم، تو لڪانيا بولي ۾ زور شون ڪهيو ڪه، ”منڪون ري روپ ۾ مهون ڪيڏي ڏيوتا اٿري آيا هي.“ ¹² اوتون برنباس ني يوناني ڏيوتا ”زيوس“ ڪهيو هان پولوس ني ”هرميس“ ڏيوتا ڪهيو، ڪيونڪه پولوس بولڻ ۾ برنباس شون وڌيڪ هتو.

¹³ اوتون ري زيوس ڏيوتا رو مندر شهر شون باهر هتوم اوتني رو پوجاري ڊگا هان گلون را هار لي شهر ري در تي آيو ڪه منڪون پڙيو بليدون ڪري. ¹⁴ پڻ جڏي سنت برنباس هان سنت پولوس آي سٿيوم، تو آيرا گايا قازيا هان ناشي منڪون ري بچ ۾ گيا هان زور شون ڪيوڻ لاگا ڪه، ¹⁵ ”پايون، تي آي ڪي ڪرو هو؟ مهني پي تون جهڙا انسون هون هان تونني خوشي ري خبر سٿاوت آيا هون ڪه تي آي ڪوڙا ڏيوتا ڦٽا ڪرو هان اوتني جيتي ايشور ني منوم جڪي شجو ڪئين ناهيو هي، يعني آڪاش، ڌرتي، سمندر هان جڪو ڪئين اوتون ۾ هي. ¹⁶ اوتني اگلي زموني ۾ سجي قومون ني آپري آپري مرضي تي بيوڻ ڏينا. ¹⁷ تو پي او هميشا منڪون تي مهربوني ڪري آپري باري ۾ گواهي ڏيتو ري هي. او آڪاش شون تونري شارو مي برشاوي هي هان پوک ري شارو مندون هان تونني بائي ڏي هي هان تونرا من خوشي شون ڀري هي.“ ¹⁸ آي بات ڪري اوتون تموم گهڻو زور ڏي منڪون ني آپري شارو بليدون ڪرڻ شون پاليا.

19 پڄي ڪئين يهودي انطاڪيا هان اڪنيم شهر شون آيا هان منڪون ني آيرا ڪري پولوس ني پتر هڻيا. اوتون اوتني ني موٽرو سمجهو هان گيشلنا شهر شون باهر لي گيا. 20 پڻ جڏي چيلا آيا هان اوتني ري چوڌاري اُپام، تو او اوتجو اُنيو هان شهر ڏيشا پاچو آيو. پڄي او بيڄي ڏن برنباس پيٽو دربي شهر ڏيشا گيو.

پولوس هان برنباس رو انطاڪيا شهر پاچا جاوڻ

21 پولوس هان برنباس دربي شهر ۾ خوشي ري خبر سٿائي هان تموم گهڻا منڪ پريو يسوع را چيلا هويا. پڄي او لسترام اڪنيم هان انطاڪيا شهر پاچا گيا. 22 او وشواسيون ني تسلي ڏينا هان آي سمجهاوتا ڪم، ”پڪو وشواس راڪوم، ڪيونڪه آي ضرور هي ڪه آبي تموم گهڻا ڏڪ ڏيڪي ايشور ري بادشاهي ۾ جائون.“ 23 اوتون هر هيڪ وشواسي مندلي ۾ اوتون ري شارو اگورڻ چوندي راڪيا هان روزا راڪي پراٿنا ڪي ڪم، ”پريو يسوع جڪي تي اوتون وشواس راڪيو هي، اوج اوتون ني سنپالي.“

24 پڄي پولوس هان برنباس پسديا علائقون شون هوئي پمفليا صوبي ۾ پگا. 25 پرگا شهر ۾ پريو يسوع رو پرچار ڪري اتليا شهر ڏيشا گيا. 26 پڄي اوت شون پيٽي ۾ چڙهي انطاڪيا شهر ڏيشا گيا، جيت پيل اوتون ني ايئي ڪوم ري شارو ايشور ري ڪريا آئي هاٿون ۾ ڏينا هتا هان همي اوتون آي ڪوم پورو ڪيو هتو.

27 جڏي او انطاڪيا شهر ۾ پگا، تو اوتون وشواسي مندلي ري منڪون ني پيٽا ڪري اوتني سڄي ڪوم ري باري ۾ سٿايو، جڪو ايشور اوتون ري هاٿون ڪرايا هتا هان اوتون آي پي سٿايو ڪه ايشور بيڄي قومون ري شارو در ڪوليو هي ڪه او پي وشواسي هووي. 28 پڄي پولوس هان برنباس تموم گهڻا ڏن وشواسيون ڪيڍي اوتج رهيا.

يروشله شهر ۾ اجلاس

1 پڄي ڪئينڪه منڪ يهوديا صوبي شون انطاڪيا شهر ۾ آيا هان وشواسيون ني آي شيڪاوڻ لاگا ڪم، ”جتري توڻي تي موسي ري شاستر تي ڪتنو ڪونهي ڪراو، تو توڻي مگتي ڪونهي ملي.“ 2 ايئي بات تي پولوس هان برنباس ري اوتون منڪون شون تموم گهڻي بحث هوئي. پڄي انطاڪيا شهر ري وشواسي مندلي فيصلو ڪيو ڪه پولوس هان برنباس هان ڪئين بيجا منڪ يروشلم شهر ميليا جاوي ڪه اوت جائن سنتون هان وشواسي مندلي ري اگورڻون شون ملي هان ايئي مسئلي رو فيصلو ڪراوي.

15

3 پڄي وشواسي مندلي اوتون ني ميليا. جڏي او فنيڪي هان سامريا علائقون شون جاوتا پٽيا، تو اوت اوتون وشواسيون ني سٿايو ڪه بيڄي قوم ري تموم گهڻي منڪون پريو يسوع تي وشواس راڪيو هي. آي بات سٿي، او سڄائي تموم گهڻا خوش هويا. 4 جڏي او يروشلم ۾ پگا، تو اوت ري وشواسي مندلي، سنت هان اگورڻ اوتون شون خوشي شون مليا. اوتون سڄي ڪوم ري باري ۾ اوتون ني سٿايو، جڪو ايشور اوتون ري وسيلي ڪرايا هتا. 5 پڻ ڪئينڪه فريسي منڪ، جڪو وشواسي هويا هتا، ابي ڪهيو ڪم، ”بيڄي قوم آلا جڪو وشواسي هووي هي، اوتون رو ڪتنو هوڻ ڪيي

هان ائون ني موسي ري شريعت تي بيوڙ رو حڪم ڏيوڙ ڪبي۔“⁶ تو سنت هان اگوڙ ايني بات تي شوچ بيچار ڪرڙ ري شارو پيڙا هويا۔⁷ پچي تموم گهڙي بحث شون پچي پطرس ايو هان ائون ني ڪيوڙ لاگو ڪم، ”اي وشواسيون، توني خبر هي ڪه ڪئين تيم اگي ايشور تون ۾ مهني ايني ري ڪري چونديو ڪه هون بيحي قومون ني پي خوشي ري خبر شئون ڪه او پي پريو يسوع تي وشواس راڪي۔⁸ ايشور جڪو من را پيد جوڙي هي، اوني آيون آلي ڪار ائون ني پي پويتر آتما ڏينو هان ايني بات ري ثابوتي ڏيني ڪه اوني بيحي قومون ني پي چونديا هي۔⁹ ايشور آيون ۾ هان ائون ۾ ڪو پي فرق ڪونهي راڪيوم، ڪيونڪه جڏي ائون پريو يسوع تي وشواس راڪيوم، تو ايشور ائون را من آچا اوجلا ڪيئا۔¹⁰ تو پچي تي ڪيئون ايشور رو آزموتو ليوڙ ري شارو ائون چيلون تي اهڙا پار راکو هوم، جڪي ني مهورا باب ڏاڏا پي ڪي ڪونهي شگهيا؟¹¹ مهوني پڪو وشواس هي ڪه جهڙي نموني ائون ني پريو يسوع ري ڪريا شون مگتي ملشي، اويح نموني آيون ني پي ملشي۔“

¹² پچي سجي وشواسي مندلي مات هوني هان پولوس هان برناس ري باتون شئن لاگا ڪه ايشور ڪيڪر ائون ري هاتون بيحي قوم ۾ تموم گهڙا پرچا هان عجيب ڪوم ڪرايا هي۔¹³ جڏي او مات هويا، تو يعقوب ڪيوڙ لاگو ڪم، ”اي وشواسيون، مهاري بات شوم،¹⁴ شمعون پطرس هتون شتايو ڪه ايشور پيل شون ڪهڙي نموني بيحي قوم تي نظر ڪي هان ائون ۾ پي آري شارو منڪ چونديا۔¹⁵ نيون آي باتون پيل شون شاستر ۾ شتائي ڪم،

¹⁶ پرميشور ڪي پريو ڪم،

’ايئون باتون شون پچي هون پاچو آئين

هان دائود ري ڪريوڙي گهر ني نائين۔

اوني ري برباد ڪيوڙي ٽڪڙون ني پيڙا ڪرين

هان اوني ني پري نائي ايو ڪرين،

¹⁷ ڪه سجي بيحي قومون آلام

جڪو مهاري نون شون ڪهيجي هي،

او مهني جووي۔

¹⁸ آي هون پرميشور ڪونه هون،

جڪو جگت ري شروع شون ايئون باتون ري بازي ۾ شتوتو ائون پريو۔‘

¹⁹ ايني ري ڪري مهارو فيصلو آي هي ڪه آبي ائون ني ڏڪ ني ڏيئون، جڪو بيحي قوم شون ايشور تي وشواس راڪي هي۔²⁰ پڻ ائون ني آي

پي لڪي ميلو ڪه او مورتيون تي چاڙهيوڙا چڙهاوا ني کاوي، ني زنا ڪري هان ني اهڙا گهڙا ڏينوڙا جنار کاوي هان ني ائون رو لويي پئي، جون

ڪاوي،²¹ ڪيونڪه پروٽي زموني شون هر هيڪ شهر ۾ موسي نبي زي شاستر رو پرچار هوتو رهيو هي هان او هر هيڪ پويتر ڏن تي پگني گهرون ۾ شٽايو جاوي هي.“

بيجي وشواسي قومون زي نون خط

²² پيحي سنت هان اگوو هان شجي وشواسي مندلي آلا پيٽا هويا هان اوئون اي فيصلو ڪيو ڪه آيون ۾ ڪئين اهڙا منڪ چوندون، جڪو پولوس هان برنباس پيٽا انطاڪيا شهر ڏيشا جاوي. اوئون يهودا جڪي ني برسبا پي ڪي هي هان سيلاس ني چونديوم ڪيونڪه اوئون ري وشواسي منڪ تموم گهڻي عزت ڪرتا. ²³ اوئون اي لڪي اوئون ري هاتون ميلو ڪم.

”اي وشواسيون، ٿي جڪو پيحي قوم آلا هوم انطاڪيا شهر هان سوريا هان ڪلڪيا صوبون ۾ رو هوم شجون ني مهون پايون يعني سنتون هان اگووون ري طرفون جئي پريو ري. ²⁴ مهون شٽيو هي ڪه مهون ۾ ڪئينڪه منڪ بنا پوجي تون ڪيدي آيا هتا هان اوئون توني آپري باتون شون پريشون ڪيا هان تونرا من ڏڪايا هتا. ²⁵ ايئي ري ڪري مهون شجون صلاح ڪري اي فيصلو ڪيو هي ڪه ڪئينڪه منڪ چوندون هان تون ڪيدي آپري پياري پايون برنباس هان پولوس پيٽا ميلون. ²⁶ اي بيئي اهڙا منڪ هي، جڪون آپري زندگي آڻي پريو يسوع مسيح ري شارو خطري ۾ گهاتي چوڙي هي. ²⁷ ايئي ري ڪري مهون يهودا هان سيلاس ني ميليا هي. او پي شاگي باتون توني شٽاشي. ²⁸ ڪيونڪه پويتر آتما ري مدد شون مهون اي فيصلو ڪيو هي ڪه ايئون ضروري باتون شون نال بيجو ڪو پي پار تون تي ني راڪون. ²⁹ ٿي مورتيون تي چاڙهيوڙي شيون ني ڪايا هان ني لويي پيٽام جون ڪايا هان اهڙا جنار ني ڪايا، جڪون ني گهتا ڏينوڙا هووي هان ني زنا ڪريا. جي ٿي ايئون شيون شون انگا ريشوم تو تونري شارو پلو هوشي. ايشور توني شاجا شورا راڪي.“

³⁰ پيحي او بئير هويا هان او انطاڪيا شهر ۾ پگا. اوت وشواسي مندلي ني پيٽي ڪري اوئون ني خط ڏينو. ³¹ جڏي اوئون او خط پڙهيو، تو اوئون ني همت ملي هان او تموم گهڻا خوش هويا. ³² يهودا هان سيلاس جڪو آپ نيبي هتام وشواسيون ني تموم گهڻي باتون سمجھائي اوئون رو وشواس پڪو ڪيو. ³³ او اوئون پيٽا ڪئين ڏن اوت رهيا هان پيحي وشواسيون ني خير خيريت ري پراٿنا شون اوئون ني بئير ڪيا. يهودا آپري منڪون ڏيشا پاچو گيو، جڪون اوئون ني ميليا هتا. ³⁴ [پڻ سيلاس آپري مرضي شون اوتج رهيو.]

³⁵ پولوس هان برنباس انطاڪيا شهر ۾ رهيا هان بيجي تموم گهڻي منڪون پيٽا پريو يسوع ري باتون شيڪاوتا هان پرچار ڪرتا رهيا.

پولوس هان برنباس رو آپت ۾ ضد هان ڌار هوئڻ

³⁶ ڪئينڪه ڏنون شون پيحي پولوس، برنباس ني ڪهيو ڪم، ”جتري شهرون ۾ آيون پريو يسوع ري باتون رو پرچار ڪيو هتوم، حال اوت هالي وشواسيون ري خبر چار لي ائون.“ ³⁷ برنباس ري مرضي هتي ڪه يوحنا مرقس ني پي آپ پيٽو لي هالي. ³⁸ پڻ پولوس ڪهيو ڪم، ”جڪو منڪ پمفليا صوبي ۾ آيون ني چوڙي گيو هتو هان پرچار ري شارو آيون پيٽو ڪونهي هاليوم، همي آبي اهڙي منڪ ني ڪيڪر پيٽو لي هالون؟“ ³⁹ ايئي تي

اُئون رو آيت ۾ ايترو تو ضد هويو ڪه او هيڪي بيڃي شون ڌار هئي ڳيا. برنباس ۾ يوحنا مرقس ني لي پيڙي ۾ چڙهي ڪپرس بيت ڏيما بئير هويو. 40 پڻ پولوس ۾ سيلاس ني ليئو هان وشواسيون ائون ني پرميشور ري هات ۾ ڏينو ڪه او ائون تي ڪريا ڪري. پڇي او اوت شون بئير هويو. 41 پولوس سوري هان ڪلڪيا صوبي شون هوتو ۾ وشواسي مندليون ۾ منڪون ري وشواس ني پڪو ڪرتو ڳيو.

تيمٿيس رو پولوس هان سيلاس پيڙو جاوڻ

16 1 پڇي پولوس دربي شهر هان اُسترا شهر ۾ پي ڳيو. اوت تيمٿيس نون رو پريو يسوع رو هيڪ چيلو هتو. اُئي ري ما يهودي قوم ري هتي هان او پريو يسوع تي وشواس لي آئي هتي ۾ پڻ اُئي رو باپ يوناني قوم رو هتو. 2 اُسترا هان اڪنيم شهرن ۾ وشواسي تيمٿيس ري تموم گهڻي عزت ڪرتا. 3 پولوس ري مرضي هتي ڪه او تيمٿيس ني آپ پيڙو لي جاوي. ائي ري ڪري اُئي رو ڪتنو ڪرايو ڪيونڪه اُئي علائقي ري سڃي يهوديون ني خبر هتي ڪه اُئي رو باپ يوناني قوم رو هي. 4 پڇي او شهر شهر ڳيا هان اُئي فيصلي ري باري ۾ سٿايوم جڪو يروشلم ري سنتون هان اڳوڻون ڪيو هتو هان آي پي ڪهيو ڪه ”ايئون باتون تي بيوڻ ڪبي.“ 5 ائي نموني وشواسي مندلي هرور وشواس ۾ پڪي هان بدتي گئي.

ترواس شهر ۾ ايشور رو پولوس ني درشن

6 پڇي پولوس هان اُئي را ساڻي فروڳيا هان گلتيا ري علائقي شون بُوام ڪيونڪه پويتر آتما ائون ني آسا صوبي ۾ ايشور رو پرچار ڪرڻ شون پاليا هتا. 7 پڇي ائون موسيا علائقي ري نيڙا پڳي ۾ بتونيا صوبي ۾ جاوڻ ري ڪوشش ڪي ۾ پڻ پريو يسوع ري آتما ائون ني جاوڻ ڪونهي ڏينو. 8 ائي ري ڪري او موسيا شون هئي ترواس پڳا. 9 اوت اُئي رات ايشور پولوس ني درشن ڏينو ڪه مڪڏونيا صوبي رو هيڪ منڪ اُيو هي هان اُئي ني منٽ ڪري ڪي پيڙو ڪه ”شموندر پار ڪري مڪڏونيا ۾ آئي مهوري مدد ڪر.“ 10 درشن شون پڇي اُئيچ تيم مهون مڪڏونيا جاوڻ رو فيصلو ڪيو هان مهني آي سمجها ڪه ايشور ائون ني خوشي ري خبر ڏيوڻ ري شارو مهوني اوت اُتيا هي.

فلپي شهر ۾ لڏيا ٻائي رو وشواس

11 پڇي ترواس شهر شون پيڙي تي چڙهي مهني سڌا سمترڪي بيت ۾ پڳا هان بيڃي ڏن نياپلس شهر ۾ ڳيا. 12 پڇي اوت شون فلپي شهر ۾ پڳا جڪو مڪڏونيا صوبي رو هيڪ خاص شهر هي هان روم ملڪ را منڪ اوت ريتا. مهني ڪننيڪه ڏن اُئي شهر ۾ رهيا. 13 پڇي مهني پويتر ڏن تي شهر ري در ري ٻاهر دريا ري ڪپ تي ڳيا. مهني سمجها ڪه اوت پراٿا ڪرڻ ري جگها هوشي. اوت ڪئين لڳائي پي پراٿا ڪرڻ ري شارو پيڙي هئي هان مهني ائون شون باتون ڪرڻ لاڳا. 14 ائون لڳايون ۾ تواتيرا شهر ري لڏيا نون ري هيڪ لڳائي هتي. او بيگنائئي رنگ را قيمتي ڳايا بيچتي. او ايشور تي وشواس راکتي. جڏي اُئي پولوس ري باتون سٿي ۾ تو ايشور اُئي رو من ڪوليو ڪه او پولوس ري باتون تي دهيون ڏي. 15 پڇي

اُوئي آڀري خاندان شُودو پوٽر سنون ليئو هان منٽ ڪي ڪم، ”جي ٿي مهني پريو يسوع تي وشواس راڪڻ آئي شمعجو هوم، تو هالي مهاري گهري رو.“ پڇي اُوئي مهوني مجبور ڪيئا هان آڀري گهري لي گئي.

پولوس هان سيلاس فليبي شهر ۾ قيد

16 هيڪ ڏن جڏي مهني اُوئي پراٽنا ڪرڻ آئي جگها ڏيشا جاوتا پٽيام، تو ايئون هويو ڪه مهوني هيڪ بونهي چوڪري پيٽي هوني، جڪي ۾ اهڙو پوت هوم جڪي شون او منڪون رو پاگ شتاوتي هان او آڀري مالڪون ني تموم گهئا رپيا ڪمائي ڏيتي. 17 او پولوس هان مهوري لاري آئي هان زور شون ڪيوڻ لاگي ڪم، ”اي منڪ پرميشور را بونهي هي، جڪو ٿوني مگني رو مارگ بناوي هي.“ 18 او تموم گهئا ڏن ايئوج ڪيتي رئي. نيٺ پولوس بيزار هويو هان اُوئي پاچل قوري پوت ني ڪهيو ڪم، ”هُون ٿني يسوع مسيح ري نون شون حڪم ڏيون هون ڪه ايئي شون نڪري جا.“ اُوئيج تيم او پوت اُوئي شون نڪري گيو.

19 جڏي چوڪري ري مالڪون ڏينو ڪه مهوري ڪمائي تو بند هوني ري، تو اُوئون پولوس هان سيلاس ني جهالبا هان گيشلي رومي اگووئون ڪيڏي چوڪ تي لي گيا. 20 پڇي اُوئون اگووئون ڪيڏي لي جائي ڪهيو ڪم، ”اي منڪ يهودي هي هان آڀري شهر ۾ تموم گهڻو ڪوڙ ڪرايو هي 21 هان اهڙي ريتون شتاوي هي، جڪو آبي رومي منڪ آڀري قانون تي نڪو منٽا هان نڪو اُوئون تي بي شگهتا.“ 22 ايئي تي شهر را بيجا منڪ پي اُوئون پيٽا مليا هان سيلاس هان پولوس ري خلاف هويو. پڇي رومي اگووئون اُوئون را گايا ڦاڙي اُناريا هان اُوئون ني ست پُرا هڻڻ رو حڪم ڏينو. 23 پڇي فوجيون اُوئون ني تموم گهئا چاڪ هڻي جيل ۾ گهاتيا. پڇي اگووئون جيلر ني حڪم ڏينو ڪه اُوئون تي تموم سخت پهرو ڏينو جاوي. 24 اي حڪم شئي جيلر اُوئون ني جيل ري مئيلي ڪوني ۾ بند ڪيئا هان اُوئون را پگ بيئون لڪڙون ۾ هڻي ڪاڻو ڪيئا.

25 اندازن آڏي رات رو سيلاس هان پولوس پراٽنا ڪرڻا پٽيا هان پجن گائي ايشور ري بدائي ڪرڻا پٽيا هان بيجا قيدي شتا پٽيا. 26 اُوئيج تيم اوچتو موتو زلزلو آيو، جڪي شون جيل رو بُنياد لڏي گيو هان شجائي در کلي گيا هان شجون ري شونڪڙون کلي گئي. 27 ايئي تي جيلر ري اُونگ اڏي هان جيل را در کليوڙا جوئي شمعجو ڪه قيدي ناشي گيا را. او تلوار ڪاڏي آڳهات ڪرڻ لاگو. 28 پڻ پولوس زور شون ڪهيو ڪم، ”آڀرو آڀري، مار ني، ڪيونڪه مهني شجائي ايت هون.“ 29 جيلر بتي اٿائي ناشتو جيل ۾ گيو هان ڏڪتو ڏڪتو پولوس هان سيلاس ري پگون ۾ ڪريو. 30 پڇي او اُوئون ني باهر لي گيو هان پوچو ڪم، ”سائين، هون ڪي ڪرون ڪه مهني مگني ملي؟“ 31 اُوئون ڪهيو ڪم، ”پريو يسوع تي وشواس راڪ، تو ٿني هان ٿاري گهر ني مگني ملشي.“ 32 پڇي اُوئون اُوئي ري شجي گهر ني پريو يسوع ري باتون شتاڻي. 33 پڇي جيلر رات رو اُوئيج تيم سيلاس هان پولوس ني لي گيو هان اُوئون را ڦٽ ڏوئي آڇا ڪيئا هان اُوئيج تيم آڀري شجي منڪون شُودو پوٽر سنون ليئو. 34 پڇي او اُوئون ني آڀري گهر لي گيو هان اُوئون ري ميموٽي ڪي. او هان اُوئي رو شجو خاندان تموم گهڻو خوش هوم ڪيونڪه اُوئون ايشور تي وشواس راڪيو هتو. 35 جڏي ڏن اگو، تو رومي اگووئون فوجيون ني اي حڪم ڏي جيلر ڏيشا مليا ڪه اُوئون منڪون ني ڦٽا ڪرو. 36 جيلر، پولوس ني ايئي بات ري خبر ڏيني ڪم،

”رُومي اڳوڻون ٿوئي چوڙڻ رو حُڪم ڏينو هي. ايئي ري ڪري همي ٿي خير خيريت شون بُوئا جائو.“³⁷ پڻ پوئوس اُوئون ني ڪهيو ڪم، ”اُوئون مهوني مهني جڪو رُومي شهري هون، بنا ڏوه شجون ري شومهو چاڀڪ هڻائي جيل ۾ گهاتيا هان همي مهوني مات مات ۾ چوڙي هي؟ اي ايئون هوئي ڪونهي شگهي، رُومي اڳوڻ آپ ايت آئي مهوني باهر ڪاڏي.“

³⁸ فوجيون رُومي اڳوڻون ني ايئي بات ري خبر ڏيني. جڏي اُوئون ني خبر پڙي ڪه او رُومي هي، تو پيئاجا. ³⁹ اُوئون جائي اُوئون شون معافي مونگي هان جيل شون باهر لي جائي اُوئون ني منٿ ڪي ڪه ٿي شهر شون بُوئا جائو. ⁴⁰ پيچي پوئوس هان سيلاس جيل شون نڪري لُديا ري گهري گيا هان اوت وشواسيون شون مليا هان اُوئون ري همت بدائي هان پيچي اوت شون بئير هويا.

پوئوس هان سيلاس رو ٿيسلينڪي شهر ۾ جاوڻ

17 ¹ پيچي پوئوس هان سيلاس امفيلس هان ابلونيا شهرون شون هوئي ٿيسلينڪي شهر ۾ آيا، جيت يهوديون رو هيڪ پگتي گهر هتو. ² پوئوس اڳي آئي ڪار اوت گيو هان تينون هفتون توڙي هر هيڪ پوپتر ڏن تي شاستر شون يهوديون شون بحث ڪرتو رهيو. ³ او شاستر ري باتون رو مطلب شمجھائي ثابت ڪرتو ڪم، ”مسيح رو ڏڪ ڏيڪڻ هان مونوڙون شون جيتو هوڻ ضروري هتو هان ائيج پريو يسوع، جڪي ري باري ۾ هون شٽائون پريو، مسيح هي.“ ⁴ اُوئون يهوديون ۾ ڪئينڪ منڪون پوئوس ري باتون منئي هان او پوئوس هان سيلاس پيڙا شامل هويا هان ايشور تي وشواس راکڻ آئي يونانيون رو هيڪ موتو تولو هان تموم گهڻي امير لڳائي پي اُوئون پيڙي شامل هوئي. ⁵ پڻ تموم گهڻا يهودي ريشي بلڻ لاڳا هان او شهر ۾ گيا هان ڪني منڪون ۾ تموم گهڻا لوقر آپ پيڙا ليئا هان هيڪ موتو تولو نائي شهر ۾ جهيڙا ڪرڻ لاڳا. پيچي اُوئون ياسون نون ري منڪ ري گهر تي حملو ڪيو هان او پوئوس هان سيلاس ني جوڻ لاڳا ڪه اُوئون ني منڪون ڪيڏي لي آوي. ⁶ جڏي او اوت ڪونهي لاڏام، تو او ياسون هان وشواسيون ني گيشلي شهر ري حاڪمون ڪيڏي لي گيا هان زور شون ڪيوڻ لاڳا ڪم، ”جڪون منڪون شجي ڏنيا ۾ جهيڙا ڪيا هي، او ايت پي آيا هي. ⁷ ياسون اُوئون ني آڀري گهري پيشاڙيا هي هان اي شجائي قيصر بادشاه ري حڪمون ري مخالفت ڪري ڪي هي ڪم، ’بادشاه تو ڪو بيجو هي، جڪي رو نون يسوع هي.“ ⁸ اي شئي عام منڪ هان شهر را حاڪم پريشون هويا. ⁹ پيچي حاڪمون ياسون هان بيجي منڪون ري زمونت لي ڦٽا ڪيا.

بيريا شهر ۾ تموم گهڻي يهوديون رو وشواس

¹⁰ رات هوئي، تو وشواسيون پوئوس هان سيلاس ني بيريا شهر ڏيشا ميلي چوڙيا. او اوت پڳي يهوديون ري پگتي گهر ۾ گيا. ¹¹ اي منڪ ٿيسلينڪي شهر ري يهوديون شون وڌيڪ پلا هتام، ڪيونڪه اُوئون گهڻي شوق شون ايشور ري باتون منئي هان هرور شاستر پڙهي جوتا ڪه اي باتون شاچي هي، جون نا؟ ¹² پيچي اُوئون ۾ تموم گهڻي منڪون وشواس راکيو هان يونانيون شون پي تموم گهڻي امير لڳائي هان آدمي وشواسي هويا. ¹³ جڏي ٿيسلينڪي شهر ري يهوديون ني خبر پڙي ڪه پوئوس بيريا شهر ۾ پي ايشور ري باتون شٽاوي هي، تو اوت جائي منڪون ني پيڙڪايا هان اُوئون ۾ گوڙ گهاتيو.

14 اُوئي تيم وشواسيون چيڪائي ڪري پوئوس نِي شَموندر ري ڪپ توڻي ميلي چوڙيوم پڻ سيلاس هان تيمتيس بيريا شهر ۾ رهيا. 15 پوئوس پيڙا جاوڻ آلا منڪ اُوئي نِي آئيني شهر توڻي چوڙي پاڇا بيريا شهر ڏيشا ڳيا. پوئوس اُوئون نِي آي نياپو ڏي ميليو ڪم ”سيلاس هان تيمتيس چيڪائي ڪري مهِي ڪيڏي آوي.“

پوئوس رو آئيني شهر ۾ پرچار

16 آئيني شهر ۾ سيلاس هان تيمتيس رو انتظار ڪرنا، جڏي پوئوس شجِي شهر نِي مورتيون شون پريجوڙو ڏينوم، تو اُوئي رو جي پلڻ لاگو. 17 اِيئي ري ڪري او يهوديون ري پگني گهر ۾ يهوديون هان وشواسيون هان بيچي منڪون شون جڪو اُوئي نِي چوڪ ۾ ملتا، اُوئون شون هرور بحث ڪرتو. 18 اوڻ ڪئين آپڪوري پنت هان سئوئيڪي پنت را گرو اُوئي شون بحث ڪرڻ لاگا. اُوئون ۾ ڪئينڪ منڪون ڪهيو ڪم ”آي جت ڪهڙي بيڪار باتون ڪري پڙيو؟“ بيچي منڪون ڪهيو ڪم ”آي بيچي ڏيوتائون رو پرچار ڪرڻ آڻو لاڳي هي.“ ڪيونڪ پوئوس، پريو يسوع هان پڙي جيتا هوڻ ري باري ۾ خوشي ري خبر رو پرچار ڪرتو. 19 پچي او پوئوس نِي آريوپگس نون ري جبل تي شهر ري پنجائيت ڪيڏي لي ڳيا هان ڪهيو ڪم ”تو جڪو نوني باتون شيڪاوي هي، اُوئي ري باري ۾ مهوني شمجهام 20 ڪيونڪ تو مهوني اهڙي باتون سئواي هي، جڪو مهون ڪڏي پي ڪونهي سئئي. اِيئي ري ڪري مهوني سئتا ڪه ايتون باتون رو مطلب ڪي هي؟“ 21 آئيني شهر را منڪ هان پرديسي منڪ ووندڪائي ۾ نوني نوني باتون سئتا هان سئتا. 22 پچي پوئوس، آريوپگس شهر ري پنجائيت ري بچ ۾ اُئي ڪهيو ڪم ”اي آئيني آئون، هون جوئون پڙيو ڪه تي هر هيڪ بات ۾ تموم گهڻا درمي هوم. 23 ڪيونڪ مهِي بيتي بيتي تونري ڏيوتائون نِي دهيون شون ڏينا هان هيڪ اهڙي چڙهاوي ري جگها ڏيني، جڪي تي لڪيوڙو هتو ڪم، اهڙو ڏيوتا جڪي ري خبر ڪونهي.“ اِيئي ري ڪري جڪي نِي ٿي اولڪڻ بنا پوجو هوم، هون توني اُوئي ري باري ۾ سئتاون هون. 24 ايشور او هي، جڪي آي جگت هان جگت ري شجِي شيون ناهئي. او آڪاش هان ڌرتي رو مالڪ هوئي هات ري ناهيوڙي مندرون ۾ ڪيڪر ري شگهي هي؟ 25 انسون اُوئي ري ڪهڙي شيوا ڪرشي، ڪيونڪ او ڪيرو پي محتاج ڪونهي. او آپ شجون نِي زندگي، شاش هان هر هيڪ شئي ڏي هي. 26 اُوئي هيڪي آدمي شون شجِي قومون پيدا ڪيئي ڪه او شجي ڌرتي تي ري. اُوئي شروع شون اُوئون ري شارو خاص تيم هان ريوڻ ري حدون نائي. 27 ايشور انسون نِي اِيئي ري ڪري ناهيو ڪه او اُوئي نِي جوئي هات ڪري هان اُوئي نِي اولڪي هان اُوئي تي وشواس راڪي. پڻ حقيقت ۾ او آپون ۾ ڪي شون پي انگو ڪونهي هي، 28 ڪيونڪ اُوئي ري مرضي شون آبي جيتا هون، گهمون قرون هون هان جڪو ڪئين آبي هون، او اُوئي ري ڪري هي. اِيئي نموني تونري ڪي بيچي شاعر پي ڪهيو هي ڪم.

’آبي پي ايشور را اولاد هون.‘

29 جي آبي ايشور را اولاد هون، تو آپون نِي آي ني شمجهڻ ڪپي ڪه ايشور ري ذات شوني، چوندي جون پتر آڻي ڪار هي، جڪي نِي ڪي انسون آپري هنر هان ڪاريگري شون ناهيو هوڙي. 30 جڪي زموني ۾ انسون نِي ايشور ري باري ۾ خبر ڪونهي هتي، اُوئي زموني ۾ ايشور اُوئون

ٺي پاپون ري سزا ڪونهي ڏيئي. پڻ ايتي زموني ۾ ايشور سڄي دنيا ري سڄي منڪون ني حڪم ڏي هي ڪم، ’آپري پاپون شون توبهون ڪرو-‘
 31 ڪيونڪه اوئي هيڪ ڏن راکيو هي، جڪي ۾ او سڄائي شون دنيا رو انصاف آپري چونڊيوڙي منڪ ري هائون ڪراشي، جڪي ني اوئي مؤوڙون
 شون جيتو ڪري، اي بات شجون تي ثابت ڪي هي.“

32 جڏي اوئون مؤوڙون رو جيتا هوڻڙي ري باري ۾ شٽيوم، تو ڪئينڪه منڪ هاشا ڪرڻ لاڳام، پڻ ڪئينڪه منڪون ڪهيو ڪم، ”ايتي بات ري باري
 ۾ مهني ڪي بيجي ڏن تي وڌيڪ ششون.“ 33 پچي پولوس پنچائيت شون نڪري بوڻو گيو.

34 پچي ڪئينڪه آدمي پولوس شون مليا هان پريو يسوع تي وشواس راکيو. اوئون ۾ ديونسيس نون رو هيڪ منڪ جڪو آريوپگس ري پنچائيت رو
 ميمبر هتو هان بيجي دمرس نون ري هيڪ لڳائي هتي هان ڪئينڪه بيجا منڪ پي اوئون پيڙا هتا.

پولوس رو ڪرنٽس شهر ۾ جاوڻ

1 ايتي شون پچي پولوس ايتني شهر شون بئير هوئي ڪرنٽس شهر ۾ گيو. 2 اوت اوئي ني اڪولا نون رو هيڪ يهودي پيڙو هويم،
 جڪو پينطس صوبي رو هتو. او آپري لڳائي پرسڪلا شوڏو ايتلي ملڪ ري روم شهر ۾ نونو نونو آيو هتو، ڪيونڪه رومي بادشاه
 ڪلوديس حڪم ڏينو هتو ڪم، ”سڄائي يهودي روم شهر شون نڪري جاوي.“ پولوس اوئون ري گهري گيو. 3 ڪيونڪه پولوس، اڪولا هان اوئي
 ري لڳائي پيڙو تنبو ناوڻ رو ڪوم ڪرتو. ايتي ري ڪري پولوس اوئون پيڙو رهيو هان او پيڙا هوئي تنبو ناوڻ لاڳا. 4 هر هيڪ پويتر ڏن تي پولوس يهوديون
 ري پگتي گهر ۾ جائ يهوديون هان يونانيون ني پريو يسوع ري باري ۾ شيڪاوتو هان اوئون شون بحث ڪري آپري بات مناوڻ ري ڪوشش ڪرتو.
 5 جڏي سيلاس هان تيمٽيس مڪڏونيا صوبي شون اوت آيا، تو پولوس پورو تيم ايشور ري باتون رو پرچار ڪرڻ لاڳو. او يهوديون ني ايتي بات ري
 گواهي ڏيتو ڪم، ”پريو يسوع ئي مسيح هي.“ 6 جڏي منڪ اوئي ري خلاف هويا هان اوئي ني ٻرو پلو ڪيوڻ لاڳام، تو پولوس اوئون شون واسطو
 ختم ڪرڻ ري شارو آيا گايا چنڊيا هان اوئون ني ڪهيو ڪم، ”همي جي ايشور توني سزا ڏي، تو تونرو ڏوه تون تي هوشي. مهارو ايتي ۾ ڪو پي
 ڌمو ڪونهي. آج شون هون بيجي قومون ڏيشا جائين.“ 7 پچي پولوس يهوديون رو پگتي گهر چوڙي طيطس يوسف نون ري هيڪي منڪ ري گهري
 گيو، جڪو ايشور ني منتو هان اوئي رو گهر پگتي گهر ري پاشي ۾ هتو. 8 ڪرسپس نون رو منڪ پگتي گهر رو سردار هتو. اوئي آپري سڄي گهر
 شوڏو پريو يسوع تي وشواس راکيو. ڪرنٽس شهر ري تموم گهڙي منڪون پولوس ري باتون شئي پريو يسوع تي وشواس راکيو هان پويتر سنون ليئو.

9 پريو يسوع رات رو پولوس ني شپني ۾ ڪهيو ڪم، ”ني بيٺاج، ايشور رو پرچار ڪرتو ري هان ماڻ ڪري ني پيش. 10 هون تي پيڙو هون هان ڪو
 پي منڪ ئي تي حملو ڪري ڪونهي شگهي، ڪيونڪه ايتي شهر ۾ مهارا تموم گهڙا منڪ هي.“ 11 پچي پولوس ڏوڍ شال اوت رهيو هان ايشور
 ري باتون شيڪاوتو رهيو.

12 اُونون ڏنن ۾ گلبو نون رو هيڪ منڪ هتوم جڪو رومي صوبي آخيا رو گورنر هتو. يهوديون ٻڌي ڪي هان پولوس ني جهالي ڪورٽ ۾ گورنر ڪيڏي لي ڳيا. 13 او ڪيوڻ لاڳا ڪم ”آي آڌمي منڪون ني اهڙي نموني ايشور ري پگتي ڪرڻ شيڪاوي هي، جڪو شريعت ري خلاف هي.“

14 جڏي پولوس ٻولڻ آڻو هتوم، تو گورنر گلئي يهوديون ني ڪهيو ڪم ”اي يهوديون، جي ايني قانون ري خلاف ڪو بات ڪي هي، جون ڪو خراب ڪوم ڪيو هي، تو هون تونري بات پلي نموني شونت، 15 پڻ جڏي آي اهڙي باتون هي، جڪي رو واسطو ٻول، نون هان خاص ڪري تونري شريعت شون هي، تو پڇي ٿي جوڻو، تونرو ڪوم. هون اهڙي باتون رو فيصلو ڪونهي ڪرون.“ 16 پڇي اوني اُونون ني ڪورٽ شون ٻاهر ڪڍرائي چوڻيا. 17 پڇي شجي منڪون سوسٽيس نون ري منڪ ني، جڪو پگتي گهر رو سردار هتوم اوني ني جهالي ڪورٽ ري شومهو ماريو ڪوٽوم، پڻ گورنر گلئي اينيون باتون تي ڏهيون ڪونهي ڏينو.

پولوس رو انطاڪيا شهر پاڇو جاوڻ

18 پولوس تموم گهڻا ڏن ڪرنٽس شهر ۾ رهيو. پڇي اوني وشواسيون شون موڪلايو. پڇي ڪنخريا شهر ۾ جائني آڀرو ماڻو ڪٿاريم، ڪيونڪه اوني ايشور ري نون ري باش باشي هتي. پڇي او آڪولا هان اوني ري لڳائي پرسڪلا پيڙو پيڙي ۾ چڙهي سوريا صوبي ڏيشا ڳيو. 19 پڇي او افسس شهر ۾ پڳو هان اُونون شون موڪلائي پگتي گهر ۾ ڳيو هان يهوديون شون بحث ڪرڻ لاڳو. 20 يهوديون اوني ني منڪ ڪي ڪه ڪئين ڏن پيجا مهون ڪيڏي ري، پڻ اوني ڪونهي منيو. 21 او اُونون ني آي ڪئي موڪلايو ڪم، ”جي ايشور ري مرضي هوئي، تو هون تون ڪيڏي پاڇو آئين.“ پڇي او افسس شهر شون پيڙي ۾ چڙهي ٿوڻو ڳيو.

22 پڇي او قيصر يا شهر ۾ پڳو هان اوڻ شون يروشلم شهر ڏيشا ڳيو هان اوڻ وشواسي منڊلي ري منڪون شون مليو. پڇي او انطاڪيا شهر ڏيشا ڳيو. 23 او ڪئينڪه ڏن اوڻ رهيو. پڇي او بئير هوڻو هان گلٽيا هان فروگيا علائقي شون هوئي، شجي چيلون ري همت ٻڌائي اُونون رو وشواس پڪو ڪرتو ڳيو.

اپلوس رو پريو يسوع ري باري ۾ شيڪاوڻ

24 اُونون ڏنن ۾ اپلوس نون رو هيڪ يهودي منڪ افسس شهر ۾ آيو. او اسڪندريا شهر رو هتو. او ٻولڻ رو هوشيار هتو هان اوني ني شاستر ري جاڻ هتي. 25 ايني منڪ پريو يسوع ري بتايوڙي مارگ ري باري ۾ شيڪيو هتو. او تموم گهڻي خوشي هان شوق شون پريو يسوع ري باتون سڻي نموني سڻاوتو هان شيڪاوتو. پڻ اوني ني رگو يوحنا ري پويتر سنون ري باري ۾ خبر هتي. 26 او پگتي گهر ۾ جائني دليري شون ٻولڻ لاڳو. جڏي آڪولا هان اوني ري لڳائي پرسڪلا اوني ري باتون سڻي، تو او اوني ني آڀري گهر لي ڳيا هان اوني ني ايشور ري مارگ ري باري ۾ سڻي نموني سمجهايو.

27 پڇي جڏي اپلوس آخيا صوبي ۾ جاوڻ رو شوچوم، تو وشواسيون اوني ني همت ڏيني هان اوني ري هاڻون اوڻ ري چيلون ري نون خط ڏي مليو ڪه او اپلوس ري عزت ڪري. اپلوس اوڻ پڳي اوڻ ري منڪون ري تموم گهڻي مدد ڪي، جڪون ايشور ري ڪريا شون پريو يسوع تي وشواس

راڪتو هتو،²⁸ ڪيونڪه او شجعي منڪون زي شومهو تموم گهڻي جوش شون يهوديون زي باتون ني ڪوڙي ڪرتو هان شاستر شون ثبوت ذي شيڪاوتو ڪم، ”يسوع ئي مسيح هي.“

پولوس رو افسس شهر ۾ جاوڻ

19

¹ جڏي اپلوس ڪرنٽس شهر ۾ هتو، تو پولوس ماٿلي مارگ شون هوئي افسس شهر ۾ ڀڳو. اوٽ اوئي ني ڪئينڪه چيلا پيڙا هوبا. ² اوئي اوئون شون پوڇو ڪم، ”ڪي ٿوئي وشواس راڪڻ زي تيم پويتر آتما مليو هتو؟“ اوئون بلتي ڏيني ڪم، ”مهون تو ڪڏي پي پويتر آتما رو نون پي ڪونهي شٿيو.“ ³ تو پولوس پوڇو ڪم، ”تو پڇي ٿون ڪيرو پويتر سنون ليئو هتو؟“ اوئون ڪهيو ڪم، ”يوحنا رو پويتر سنون.“ ⁴ پڇي پولوس ڪهيو ڪم، ”يوحنا تو توبهون رو پويتر سنون ڏيتو هان منڪون ني شٿاوتو ڪه مهني شون پڇي اوڻ آلي پريو يسوع تي وشواس راڪيا.“ ⁵ اوئون آي شٿي پريو يسوع زي نون رو پويتر سنون ليئو. ⁶ پولوس اوئون تي هات راڪيو، تو پويتر آتما اوئون تي اٿرو هان او ڌار ڌار ٻولي ٻولڻ لاگا هان ايشور رو پرچار ڪرڻ لاگا. ⁷ او شجائي ٻارهي آڌمي هتا.

⁸ پڇي پولوس اوٽ يهوديون زي پگتي گهر ۾ جاوڻ لاگو هان تينون مهيتون توڻي موتي دليري شون منڪون شون بحث ڪرتو رهيو هان اوئون ني ايشور زي بادشاهي زي باري ۾ آپري باتون مناوڻ زي ڪوشش ڪرتو رهيو. ⁹ پڻ ڪئينڪه ضدي منڪون ڪونهي منيو، پڻ او منڪون زي شومهو پريو يسوع زي بتاويڙي شاجي مارگ ري گلا ڪرڻ لاگا. ايتي زي ڪري پولوس اوئون منڪون ني ڦٽا ڪيئا. پڇي اوئي چيلون ني اوئون منڪون شون ڌار ڪيئا هان اوئون ني آپ پيڙا ٽرنس نون زي هيڪي منڪ ري اسڪول زي هيڪي موتي ڪمري ۾ هروز شيڪاوڻ لاگو. ¹⁰ پولوس بيتون شالون توڻي، ايئوج شيڪاوتو رهيو. ايتي نموني آسيا صوبي زي شجعي منڪون يعني يهوديون هان پيڇي قومون ني پي پريو يسوع زي باري ۾ خبر پڙي.

سڪوا را ڏيڪرا هان پوت

¹¹ ايشور، پولوس زي هاتون موتا موتا پرچا بتاوتو. ¹² اتر تي توڻي ڪه منڪ پولوس را استعمال ڪيئوڙا زمال هان گايا لي بيمارون ماٿي ڍاڙتام، تو بيمار شاجا هوئي جاوتا هان پوت اوئون شون نڪري جاوتا. ¹³ يهوديون ۾ ڪئين اهڙا منڪ پي هتا، جڪو هر جگهه ڦرنا هان او پوپا هتا. او پي پريو يسوع رو نون لي پوت ڪاڍڻ ري ڪوشش ڪرڻ لاگا. او پوتون ني ڪيئا ڪم، ”هون اوئي يسوع زي نون شون جڪي رو پرچار پولوس ڪري هي، ٿوئي نڪرڻ رو حڪم ڏيئون هون.“ ¹⁴ يهوديون ۾ هيڪ ايشور زي پوجاريون رو سردار هتو، جڪي رو نون سڪوا هتو. اوئي را شات ڏيڪرا پي ايئوج ڪئي پوت ڪاڍڻ ري ڪوشش ڪرتا. ¹⁵ هيڪ ڏن هيڪي پوت اوئون ني بلتي ڏيني ڪم، ”يسوع هان پولوس ني تو هون اولڪون هون، پڻ ٿي ڪن هو؟“ ¹⁶ پڇي جڪي آڌمي ۾ پوت هتا، اوئي اوئون تي حملو ڪيو هان اوئون ني هينا نوڪي، اٿرا تو گهايل ڪيئا ڪه او قنبيجي گيا هان اوئون را گايا ليرون ليرون هوئي گيا هان اوئي گهر شون ناشي گيا. ¹⁷ جڏي افسس شهر ري شجعي يهوديون هان پيڇي قومون ني ايتي بات ري خبر پڙي، تو او بيتاجڻ لاگا هان پريو يسوع زي نون ري تموم گهڻي عزت هوئي. ¹⁸ پڇي پريو يسوع تي وشواس راڪڻ آلا تموم گهڻا منڪ آني شجون ري

شومها سُٿاوتا ڪه اُوئون ڪترا ني بچڙا ڪوم ڪينا هئا. ¹⁹ تموم گهڻي جاڏوگرون آڀرا ڪتاب پڙا ڪري شجون منڪون ري زوڀرو ٻالبا هان جڏي اُوئون ڪتابون رو حساب ڪيئو، تو اُوئون رو مول چونڊي ري پنجاه هزار شڪون ري برابر هتو. ²⁰ ايئي نموني پريو يسوع ري باتون آجون پي وڌيڪ بدتي هان مشهور هوتي گئي.

اڀيس شهر ۾ جهيڙا جهڳڙا

²¹ ايئون باتون شون پچي پولوس مڪڏونيا هان آخيا صوبي شون هوئي يروشلم شهر ڏيشا جاوڻ رو فيصلو ڪيو. اُوئي آي پي ڪهيو ڪم، ”اُوئي شون پچي هون زوم شهر ڏيشا ضرور جائين.“ ²² ايئي ري ڪري اُوئي آڀري سائون ۾ بي چڻا يعني تيمتيس هان اراستس ني مڪڏونيا صوبي ڏيشا ميليام پڻ آپ ڪئينڪ ڏنون ري شارو آسيا صوبي ۾ رهيو. ²³ ايئون ڏنون ۾ اڀيس شهر ۾ پريو يسوع ري بتايوڙي شاجي مارگ ري باري ۾ تموم گهڻو گوڙ هيو. ²⁴ ڪيونڪه اوٽ ڊيميٽرس نون رو هيڪ شونارو هتو، جڪو ارتمس ڏيو ري مندر جهڙا چونڊي را نيا نيا مندر ناوتو. اُوئي ڪيڏي ڪوم ڪرڻ آلا ڪاريگر ايئي ڪوم شون تموم گهڻو ڪماوتا. ²⁵ ڊيميٽرس آڀري ڪاريگرون ني هان ايئي ڪوم ڪرڻ آي پيچي ڪاريگرون ني پڙا ڪري ڪهيو ڪم، ”پايون، ٿوني تو خبر هي ڪه آڀي ايئي ڪوم ري تموم گهڻي ڪمائي هي.“ ²⁶ تي آپ ڏيڪو هان شڻو پڙيا ڪه ني رگو اڀيس شهر ۾ پڻ گهڻو ڪري شجي آسيا صوبي ۾ ايئي منڪ پولوس منڪون ني برگلايا هي هان اُوئون ني آي شيڪاوي هي ڪه هات ري ناهيوڙي مورتِي ايشور ڪونهي هي. ²⁷ همي ني رگو آي خطرو هي ڪه آڀي ڪوم ري ڪو پي عزت ڪونهي هوڙي، پڻ آڀي موني ڏيو ري ارتمس جڪي ني آسيا صوبي را شجائي منڪ پڻ شجي ڏنيا را منڪ پوجي هي، ايئي ري عزت ختم هوئي جاشي هان منڪ ارتمس ڏيو ري مندر ني ڪئين ڪونهي شمجهي.“ ²⁸ آي بات شڻي اُوئون منڪون ني تموم گهڻي ريش آي هان زور شون ڪيوڻ لاگا ڪم، ”ارتمس ڏيو ري جڻي هوم اڀيس ري ارتمس ڏيو ري جڻي هو.“ ²⁹ ايئي نموني شجي شهر ۾ گوڙ هيو. منڪون پولوس پڙا بيوڻ آي پيئون سائون، گيس هان ارسترس ني جهالام جڪو مڪڏونيا صوبي را هتام اُوئون ني جهالي اُوئي ميدون ۾ لي گيا، جيٽ هر تيم تقريرون هان ڪيل تماشا هوتا. ³⁰ پولوس ري مرضي هتي ڪه او اُوئون منڪون ڪيڏي جاوي، پڻ چيلون اُوئي ني پاليو. ³¹ آسيا صوبي ري حاڪمون ۾ ڪئين پولوس را دوست هتا. اُوئون پي پولوس ني آي نياپو ڏي ڪهيو ڪم، ”مهريوني ڪري اُوئي ميدون ڏيشا ني جائي.“

³² اُوئي تيم ميدون ۾ تموم گهڻو گوڙ هتو، ڪئينڪ منڪ هيڪ بات ڪرتا پڙيا، تو ڪئين منڪ پيچي بات ڪيتا پڙيا، ڪيونڪه تموم گهڻي منڪون ني آي پي خبر ڪونهي هتي ڪه او ڪيئون پڙا هويا هي. ³³ تو يهوديون سڪندر نون ري منڪ ني شجي منڪون ري شومهو اڀاڙيو هان منڪون شمجهو ڪه شجو گوڙ ايئي ري ڪري هيو هي. پڻ سڪندر هات رو اشارو ڪري منڪون ني مات ڪراوڻ ري ڪوشش ڪي ڪه او آڀري بجا ۾ ڪئين ڪي. ³⁴ پڻ جڏي منڪون اولڪيو ڪه آي يهودي هي، تو شجائي هيڪ هوئي زور شون اندازن بي ڪلاڪ هل ڪري ڪيتا رهيا ڪم، ”ارتمس ڏيو ري جڻي هوم اڀيس ري ارتمس ڏيو ري جڻي هو.“

35 نيت شهر ري پنجائيت ري مُنچي منڪون ني مات ڪرائي ڪهيو ڪم، ”اڻيس آلون، ڪيو هي، جڪي ني خبر ڪونهي ڪه اڻيس شهر ري موٽي ڏيوي ارتمس ري مندر رو هان اُوئي پويتر پتر رو رڪالو هي، جڪو آڪاش شون ڪريو هتو. 36 ڪيونڪه ڪو پي ايئون باتون رو انڪار ڪري ڪونهي شگهتو، ايئي ري ڪري پلو آي هي ڪه ٿي مات ڪرو هان بنا شوچي سمجهي ڪئين ني ڪرو. 37 ڪيونڪه جڪي منڪون ني ٿي ايت لي آيا هوم ني تو او مندرون ني ڦرڻ آلا هي هان نڪو تو آڻي ڏيوي ري ڳلا ڪرڻ آلا هي. 38 ايئي ري ڪري همي ديميتريس هان اُوئي ري ڪاريگرون ني جي ڪي شون ڪو ڳلا هي، تو ڪورت آڀري تيم تي ڪلي ري هي هان حاڪم پي اوت هووي هي. اوت هيڪي پيجي ني ڏوهي ڪري شگهو هو. 39 پڻ جي بات ايئي شون گهڻي هوئي جاوي، تو پچي اُوئي رو فيصلو پنجائيت ۾ هوئي. 40 ڪيونڪه آج ايئي گوڙ ري ڪري خطرو هي ڪه جڏي مهون شون پوچو جاشي، تو مهني ڪهڙي بلتي ڏيشون.“ 41 اترو ڪئي اُوئي منڪون ني جاوڻ رو ڪهيو.

پولوس رو پڙي مڪڏونيا هان آخيا صوبي ۾ جاوڻ

20

1 جڏي اڻيس شهر ۾ گوڙ ختم هويم، تو پولوس چيلون ني هيلو ڪرائي اُوئون ني همت ڏيني هان اُوئون شون موڪلائي مڪڏونيا صوبي ڏيشا بئير هويم. 2 جاوتي بلا او جڪي پي علائقي ۾ گيوم، تو اوت ري منڪون ني تموم گهڻي همت ڏيتو يونان صوبي ۾ پڳو. 3 اوت او تين مهينا رهيو. پچي او پڙي ۾ چڙهي سوريا صوبي ڏيشا جاوڻ آلو هتو، تو اُوئي شڻيو ڪه ڪئين يهوديون اُوئي ري خلاف بگاوت ڪي هي. ايئي ري ڪري اُوئي آڀرو اڀرو بدلائي مڪڏونيا صوبي ري مارگ شون پاچو جاوڻ رو فيصلو ڪيو. 4 تموم گهڻا منڪ پولوس پڙا بوئا يعني پُرس رو ڏيڪرو سوڀترس جڪو بيريا شهر رو هتو، ٿيسلينڪيون شون ارسترخس هان سڪندس، گيس جڪو دري شهر رو هتو، تيمتيس هان آسيا صوبي شون تجڪس هان ٽرفمس. 5 ايئون منڪون آگهي جائي ترواس شهر ۾ مهورو انتظار ڪيو. 6 جڏي بنا ڪمير آلو ڀرڀ هويم، تو مهني فليبي شهر شون پڙي تي چڙهي بئير هويا هان بونچون ڏنون شون پچي ترواس شهر ۾ اُوئون شون مليا هان مهني هيڪ هفتو اوڻج رهيا.

پولوس رو ترواس شهر ۾ نوجوان ني جيتو ڪرڻ

7 هفتي ري پيلڪي ڏن آچر رو مهني ڀرڀو يسوع ري يادگيري آلي ٻائي ڪاوڙ ري شارو پڙا هويا. ڪيونڪه پيجي ڏن پولوس ني جاوڻو هتو، ايئي ري ڪري او آڏي رات توڻي منڪون شون باتون ڪرتو رهيو. 8 مهني شجائي ماتلي ڪمري ۾ پڙا هتا، جيت تموم گهڻا ڏينا بلتا پڙيا. 9 اوت يوتخس نون رو هيڪ نوجوان دري ۾ پينو هتو. ڪيونڪه پولوس گهڻي دير شيڪاوتو رهيو، ايئي ري ڪري يوتخس اُونگاجڻ لاگو هان نيت اُوئي ني اُونگ آئي هان او تيچي ماڙ شون هيٺو ڪريو. جڏي منڪون اُوئي ني ڏينم، تو او موٽڙو هتو. 10 پڻ پولوس هيٺا گيو هان نيمي اُوئي ني ٻاٺ گهاتي هان ڪهيو ڪم، ”پريشون ني هوئو، آي آجون جيتو هي.“ 11 پچي پولوس ماتي گيو هان ڀرڀو يسوع ري يادگيري آلي ٻائي ڪاڏي. او شاڪلي توڻي اُوئون شون باتون ڪرتو رهيو. پچي اوت شون بئير هويم. 12 پچي منڪ اُوئي چوڪري ني شاجو شورو گهري لي ڪيا. ايئي نموني اُوئون ني تموم گهڻي همت ملي.

اڻيس شهر ري اڱوٽون آڱهي پوٽوس ري آخري تقرير

13 پڇي مهڙي پڙي ۾ چڙهي اسس شهر ڏيڻا بئير هويا ڪه اوت پڱي پوٽوس ني آپ پيڙو لي، ڪيونڪه اوتني ري مرضي هتي ڪه او پنڌ اسس شهر ڏيڻا جاوي. 14 پڇي جڏي پوٽوس مهوني اسس شهر ۾ پيڙو هويو، تو او پي مهون پيڙو پيڙي ۾ آيو هان پڇي مهڙي مثليتي شهر ڏيڻا گيا. 15 پڇي اوت شون پيڙي ۾ بئير هوني پيڇي ڏن خيس نون ري بيت تي پڱا. پڇي تيجي ڏن اوت شون سامس بيت توڻي پڱا هان چوڻي ڏن ميليتس شهر ۾ پڱا. 16 پوٽوس اي فيصلو ڪيو هتو ڪه اڻيس شهر ۾ ني اڻي، ڪيت ايتون ني هووي ڪه آسيا صوبي ۾ گهڙي دير ني هوني جاوي. او ايتي ري ڪري چيڪائي ڪرو پيڙو ڪه جي هوني شگهي، تو پينتيڪوست رو پرب يروشلم شهر ۾ ڪري.

17 پوٽوس ميليتس شهر شون اڻيس شهر ۾ نياپو ڏي وشواسي منڊلي ري اڱوٽون ني آپ ڪيڏي آتيا. 18 جڏي او منڪ اوت پڱا، تو اوتني اوتون ني ڪهيو ڪه، ”تون خبر هي ڪه جڪي ڏن شون هون آسيا صوبي ۾ آيو هون، اوتني ڏن شون لي آج توڻي هون تون پيڙو ڪيڪر رهيو هون.“ 19 هون تموم گهڙي نوڙت شون پريو يسوع ري شيوا ڪرو رهيو، اتر تي توڻي ڪه يهوديون مهڙي شون جنون ڪي هان مهڙي تموم گهڙا ڏک ڏيڻا هان رُونو. 20 جڏي هون شجون ري شومهو هان گهر گهر جائي پرچار ڪرو هان شيڪاوتوم تو مهڙي تونري فائدي ري باتون تون شون ڪڏي پي ڪونهي لڪائي. 21 پڻ هون يهوديون هان يونانيون ني شمجهاوتو رهيو ڪه او توبهون ڪري هان ايشور ري باتون تي بي هان آڻي پريو يسوع تي وشواس راڪي. 22 آج پي هون پويتر آتما ري حڪم شون يروشلم ڏيڻا جاڻون پيڙو، پڻ خبر ڪونهي ڪه اوت مهڙي شون ڪي هوشي. 23 هاوي، اي تو مهڙي خبر هي ڪه پويتر آتما هر شهر ۾ مهڙي هوشيار ڪري هي ڪه منڪ مهڙي قيد ڪرشي هان ڏک ڏيڻي. 24 تو پي مهڙي آڻي جان رو پي ڪونهي، پڻ رڱو ايتي بات ري گهڙي هي ڪه هون آڻو تيم هان شيوا رو ڪوم جڪو پريو يسوع مهڙي ڏينو هي، اوتني ني پورو ڪرون، يعني ايشور ري ڪريا ري باري ۾ خوشي ري خبر سٿائون. 25 همي مهڙي خبر هي ڪه تون شجون ني مهڙي ايشور ري بادشاهي ري باتون سٿائي ري، پڇي تي مهڙي ڪڏي پي ڪونهي ڏيڪو. 26 ايتي ري ڪري آج هون تون شجون ري روبرو اي ڪونه هون ڪه جي تون ۾ ڪو ني مني هان ايشور اوتني ني سزا ڏي، تو اوتني ۾ مهارو ڪو پي ڏمو ڪونهي. 27 ڪيونڪه مهڙي ايشور ري شجي مرضي توني سٿائي ري. 28 ايشور آڻي ڏيڪري ري لوئي بيوڻ شون آڻي شارو آڻي منڊلي نائي هي. پويتر آتما توني سنپال ڪرڻ آلا راڪيا هي. ايتي ري ڪري تي آڻي هان ايشور ري وشواسي منڊلي ري ايتون سنپال ڪريا، جهڙي نموني ڌراڙ آڻي ڏن ري سنپال ڪري هي. 29 مهڙي خبر هي ڪه مهاري جاوڻ شون پڇي تون ڪيڏي اهڙا منڪ آشي، جڪو بگڙون آڻي ڪار هوشي. او ڏن تي ڪڏي پي دايا ڪونهي ڪري. 30 پڻ تونري آڻي منڊلي ۾ اهڙا منڪ هوشي، جڪو شاچي باتون ني غلط مطلب ڏي چيلون ني آپ ڏيڻا ڦيرائي. 31 ايتي ري ڪري اهڙي منڪون شون هوشيار رهيا هان ياد راڪيا ڪه هون تينون شالون توڻي ڏن رات ڏک ڏيڪي، هر هيڪ ني شمجهاوتو رهيو. 32 همي هون توني ايشور هان اوتني ري ڪريا ري حوالي ڪرون هون، جڪو تونرو وشواس پڪو ڪرڻ هان آڻي چونڊيوڙي منڪون پيڙو بارش ڪرڻ ري قدرت راڪي هي. 33 مهڙي ڪي شون پي شوني چونڊي جون گاپون رو لالچ ڪونهي ڪيو. 34 توني

آپني خبر هي ڪه مهي آيري هائون شون ڪمائي آيري هان آيري سائون ري ضرورتون پوري ڪبي. 35 جهڙي نموني مهي توني ڪري بتايو، اونهج نموني تي پي محنت ڪري محتاجون ري مدد ڪريا. برپو يسوع ري او بات ني پونتريا، جڪو اوني آب ڪي هتي ڪم، ’ڏيون آو ليون آلي شون وڌيڪ برڪت آو هي.‘ 36 آي باتون ڪئي پولوس آبرا گوڏا کوڙيا هان ائون شجون پيڙي پرائنا ڪي. 37 او شجائي تموم گهڻا رونا هان پولوس ني باتون گهاتي اوني ني مينڪي ڏيني. 38 ڪيونڪه آي بات شئي ائون ني تموم گهڻو ڏک هويو ڪه پولوس ڪهيو هتو ڪم، ”تي مهني پڙي ڪونهي ڏيڪو.“ پچي او اوني ني پيڙي توتي چوڙڻ ڪيا.

پولوس رو يروشلم شهر ڏيشا جاوڻ

21¹ جڏي مهني ائون شون موڪلائي پيڙي ۾ چڙهي بئير هويام، تو مهني سڌا ڪوس بيت تي ڪيا. بيخي ڏن رڏس بيت تي پگا هان اوت شون پترا شهر ڏيشا ڪيا. 2 اوت مهوني هيڪ پڙو مليوم، جڪو فيڪي علائقي ڏيشا جاوتو پڙيو. مهني پي اوني ۾ چڙهيا. 3 پچي جاوتي بلا مهوني ڪاپي پاشي ڪپرس بيت ڏيڪيڄڻ ۾ آيو. پچي سوريا صوبي شون هوئي صور شهر ۾ پگا هان مهني هينا اتريا، ڪيونڪه پيڙي آون ني سيمون اترتو هتو. 4 اوت مهون چيلون ني جوئي هات ڪيئا، جڏي او پيڙا هويام، تو مهني هيڪ هفتو ائون ڪڍي رهيا. ائون پويتر آتما ري ڪيوڻ شون پولوس ني شمجهايو ڪه او يروشلم ۾ ني جاوي. 5 جڏي هفتو پورو هويو، تو مهني سفر تي جاوڻ ري شارو سنيريا هان شجائي مينڪ آيري لگايون هان بائون شوڏا مهوني شهر شون باهر شموندر ري ڪپ تي چوڙڻ آيا. اوت پڳي مهون آبرا گوڏا کوڙي پرائنا ڪي. 6 پچي ائون شون موڪلائي مهني پيڙي ۾ چڙهيا هان او آيري آيري گهري ڪيا.

پولوس ري يعقوب شون ملاقات

7 پچي مهني صور شهر شون پيڙي ۾ چڙهي بئير هويام هان جائي پتلميس شهر ۾ اتريا. اوت مهني وشواسيون شون مليا هان هيڪ ڏن ائون پيڙا رهيا. 8 بيخي ڏن مهني اوت شون بئير هوئي قيصر يا شهر ۾ پگا هان اوت مهني فلپس ري گهري رهيا، جڪو پڙو يسوع ري خوشي ري خبر شتاتو هان او ائون شاتون منڪون ۾ هتو، جڪي ني يروشلم شهر ۾ امدادي بلاوڻ ري شارو چونديو هتو. 9 اوني ري چار ڪناري ڏيڪري ايشور رو نياپو ڏيني. 10 مهني ڪنيڪ ڏن اوت رهيا. ائون ڏنن ۾ يهوديا علائقي شون اگبس نون رو هيڪ وشواسي آيو، جڪو اگڪي ڪرتو. 11 او مهون ڪڍي آيو هان پولوس رو ڪليون آو گايو لي آبرا هات پگ بونڌي ڪيوڻ لاگو ڪم، ”پويتر آتما ايئون ڪي پڙيو ڪه جڪي مينڪ رو آي گايو هي، يهودي اوني ني يروشلم شهر ۾ ايئون بونڌشي هان بيخي قوم ري حوالي ڪرشي.“ 12 جڏي مهون آي بات شئي، تو مهون هان اوت ري منڪون پولوس ني منت ڪري ڪهيو ڪه او يروشلم شهر ڏيشا ني جاوي. 13 تو پولوس ڪهيو ڪم، ”تي آي ڪي ڪو هو؟ ڪيئون روئي روئي مهارو من ڏڪائو هو؟ هون يروشلم شهر ۾ برپو يسوع ري شارو بديجڻ تو نهيو، پڻ مرڻ ري شارو پي تيار هون.“ 14 جڏي اوني مهوري بات ڪونهي مني، تو مهني آي ڪي مات هويام ڪم، ”پرميشور ري مرضي پوري هووي.“ 15 ايئي شون پچي مهني سنيري يروشلم ڏيشا ڪيا. 16 قيصر يا شهر شون پي ڪئين چيلا

مهون ڀيٽا ٿوئا. او مهونئي مناسون نون زي منڪ زي گهري لي گيا، جڪي ڪڍي مهونئي ريوٽو هتو. او ڪپرس بيت رو ريوٽو آتو هتو هان او پريو يسوع رو پريوٽو چيلو هتو. 17 جڏي مهني يروشلم شهر ۾ پڳام، تو اوت را وشواسي تموم گهڻي خوشي شون مهون شون مليا. 18 پڇي بيچي ڏن مهني پولوس ڀيٽا يعقوب شون ملڻ گيا. اوت وشواسي مندلي را بيجا اگووٽ پي هتا. 19 اوئون شون ملڻ شون پڇي پولوس اوئون ني اوئي شجي ڪوم زي باري ۾ شٽايوم، جڪو ايشور بيچي قومون ۾ اوئي زي هائون ڪرايا هتا. 20 اي شٽي اوئون ايشور زي بڪوٽ ڪي هان پولوس ني ڪهيو ڪ، ”پائي، ٿئي تو اي خبر هي ڪه يهوديون ۾ هزاري منڪون پريو يسوع تي وشواس راکيو هي هان او شجائي شريعت تي بي هي. 21 اوئون تونري باري ۾ اي شٽيو هي ڪه ٿي بيچي قومون ۾ ريوٽو آتون يهوديون ني اي شيڪائو هو ڪه موسي زي شيڪايوٽي باتون ڦٽي ڪرو هان آپري بائون رو ڪتنو ني ڪرائو هان يهوديون زي ريتون تي ني بو. 22 همي مهني ڪي ڪرون؟ ڪيونڪه ضرور اوئون ني خبر پڙي هوشي ڪه ٿي ايت آيا هو. 23 ايئي زي ڪري جون مهني ٿئي ڪونه اينوج ڪر. مهون ۾ چار اهڙا منڪ هي، جڪون زي باش باشيورتي هي. 24 همي ٿي اوئون ڀيٽا پويتر هوٽن زي ريت ۾ جائو هان آپني پويتر ڪرو هان اوئون رو خرچ پي پرو. جڏي اوئون چارون را ماٿا ڪتريا جاشي، تو شجون ني خبر پڙشي ڪه تونري باري ۾ جڪو باتون اوئون شٽي هي، او شجي ڪوٽي هي، پڻ ٿي آپ شريعت تي بو هو. 25 پڻ جتري توڻي اوئي بيچي قوم زي بات هي، جڪون پريو يسوع تي وشواس راکيو هي، اوئون زي باري ۾ مهون فيصلو ڪري لڪيو هي ڪه او مورتيون تي چاهيوٽي شيون ني ڪاوي هان ني لوئي پيني جون ڪاوي هان ني اهڙا جنار ڪاوي، جڪون ني گهٽا ڏينوٽا هووي هان ني زنا ڪري.“

26 ايئي تي پولوس اوئون چارون منڪون ڀيٽو گيو هان پڇي بيچي ڏن اوئون ڀيٽو پويتر هوٽن زي ريت ڪي. پڇي او ايشور زي گهر ۾ گيو هان اوت ڏن راکيا هان شٽايو ڪه ڪڏي اوئون رو پويتر هوٽن رو تيم پورو هوشي هان هر هيڪ زي شارو ٻليدون ڪڏي ڪرڻو هي.

پولوس ني ايشور زي گهر ۾ جهالڻ

27 پڇي جڏي بادوٽا شات ڏن پورا هوٽن آلا هتام، تو آسيا صوبي زي ڪئين يهوديون پولوس ني ايشور زي گهر ۾ ڏينوم، تو او اوت زي منڪون ۾ هل هنگومو ڪرڻ لاگا هان پولوس ني جهاليو. 28 پڇي او زور شون ڪيوٽ لاگا ڪه، ”اي اسرائيلي پايون، مهوري مدد ڪرو، اي اوج منڪ هي، جڪو هر جگهه جائي آڀي قوم زي خلاف، شريعت زي خلاف هان ايشور زي گهر زي خلاف شيڪاوي هي. ايئي شون ٿال همي بيچي قومون ني پي ايشور زي گهر ۾ لائي ايئي پويتر جگهه ني پليت ڪي هي.“ 29 منڪون اي بات ايئي زي ڪري ڪي ڪه اوئون ايئي شون پيل ٽرفمسن نون زي منڪ ني، جڪو افسس شهر رو هتو، اوئي ني پولوس ڀيٽو يروشلم شهر ۾ ڏينو هتو. او سمجهڻ لاگا ڪه پولوس اوئي ني ايشور زي گهر ۾ لي آيو هي. 30 شجي شهر ۾ تموم گهڻو گوڙ هوپو هان منڪ ناشي ڀيٽا هويا. اوئون پولوس ني جهاليو هان گيشلي ايشور زي گهر شون باهر ڪاڍي لي آيا هان چيڪائي ڪري در بند ڪري چوٽيا. 31 منڪ پولوس ني مارڻ زي ڪوشش ۾ هتام، تو رومي فوج زي موٽي آفيسر ني خبر پڙي ڪه شجي يروشلم ۾ گوڙ هوپو هي. 32 او اوئيچ تيم آپري نيني آفيسرون هان فوجيون ني ڀيٽا ڪري اوت آيو، جيت گوڙ هتو. جڏي منڪون اوئون ني ڏينام، تو پولوس ني مارڻ

کُوتن ځټو کيڼو. ³³ پيچي موتو آفيسر پولوس کيڼي گيو هان اوني ني جهالي بيئون شونکزون م بوندځ رو حکم ځينو. پيچي اوني پوچو کم، ”آي کُ هني هان ايڼي کي کيڼو هي؟“ ³⁴ منکون م کو هيک بات کيتو پټيو، تو بيچو کو بيچي بات. جڏي منکون ري گوڙ ري کري فوج ري آفيسر ني صحيح بات ري خبر کونهي پټي، تو اوني فوجيون ني حکم ځينو که پولوس ني فوج ري کوت م لي هالو. ³⁵ جڏي او کوت ري چاڙهي کيڼي پگام، تو منکون ري رش ري کري فوجيون ني پولوس کټو پټيو. ³⁶ شجائي منک اوني لاري آيا هان زور شون کيڼو لاگا کم، ”ايڼي ني ماري چوڙو، ايڼي ني ماري چوڙو.“

پولوس رو آپري بچا م کيڼ کيڼو

³⁷ جڏي فوجي پولوس ني کوت م لي جاوڻ آلا هتا، تو پولوس فوج ري موتي آفيسر ني کهيو کم، ”کي هون توني کيڼ کيڼي شگهون هون؟“ تو موتي آفيسر پوچو کم، ”کي تو يوناني ٻولي شگهي هي؟“ ³⁸ کي تو مصر مُلک رو او منک تو کونهي، جکي ايڼي شون پيل رومي حکومت ري خلاف گوڙ گهاتيو هان چار هزار منک آب پيڙا کري رڻ پت م لي گيو هتا؟“ ³⁹ تو پولوس، يوناني ٻولي م کهيو کم، ”نام هون تو يهودي هون هان کليڪا صوبي ري مشهور شهر ترس رو هون. هون منځ کرون هون که مهربوني کري مهني منکون ني کيڼ کيڼو ڏي.“ ⁴⁰ تو فوج ري موتي آفيسر اوني ني موکل ڏيني. پيچي پولوس چاڙهي تي ابي هاتون ري اشاري شون منکون ني مات هوڻ رو کهيو. جڏي منک مات هويام، تو پولوس عبراني ٻولي م ٻولڻ لاگو.

22

¹ پولوس اوتون ني ايئون کهيو کم، ”اي مهاري پايون هان قوم ري اگروڻون، مهاري بات ڏهيون ڏي شوم، هون آپري بچا م کيڼ کونھ هون.“ ² جڏي اوتون پولوس ني عبراني ٻولي م ٻولتو شوم، تو شقا مات هويام. پيچي پولوس کهيو کم، ³ ”هون يهودي هون هان کليڪا صوبي ري شهر ترس م مهارو جنم هويو هان ايت يروشلم شهر م آپري گرو گملي ايل شون مهني شريعت ري هر هيک بات شيڪي. هون ايشور ري شيوا رو کوم اهڙي جوش شون کرتو، جون ٿي آج ايت کرو هو.“ ⁴ هون تو پريو يسوع ري بتايوڙي شاجي مارگ تي بيوڻ آتون ني، ني رگو تنگ کرتو، پڻ اوتون ني مرائي پي چوڙتو. بيشک او آدمي هوتا جون لگائي، هون اوتون ني بونڊي جيل م گهاتو. ⁵ ايشور ري پوجاريون رو سردار هان شجائي اگوڻ مهاري ايڼي بات را گواه هي، کيونک هون اوتون شون دمشق شهر ري يهوديون ري نون خط لکائي لي جاوتو پټيو که جترا پي وشواسي اوڻ هوڙي، اوتون ني بونڊي يروشلم شهر م سزا ڏيراوڻ ري سازو لي ائون.“

پولوس رو وشواس

(کوم 19-1:9، 18-12:26)

⁶ پيچي پولوس کهيو کم، ”جڏي هون بيتو بيتو دمشق شهر ري نيڙو پگوم، تو بپار ري تيم اوچتو آکاش شون مهاري چوڌاري تيز اڃائو چمکيو.“ ⁷ هون ڌرتي تي کريو هان هيک آواز شوم، جکي مهني کهيو کم، ’اي ساڻول، اي ساڻول، تو مهني کيڼون تنگ کري هي؟‘ ⁸ مهني پوچو

ڪم، 'اي پرڻو، تُو ڪُڻ هي؟' اُوئي ڪهيو ڪم، 'هُون يسوع ناصري هون جڪي ني تُو تنگ ڪري هي.'⁹ جڪو منڪ مهني پيٽا هتا، اُوئون اُجائو تو ڏينو، پڻ اُوئون مهني شون ٻولڻ آئي رو آواز ڪونهي سڻيو.¹⁰ اِئيني تي مهني پوڇو ڪم، 'اي پرڻو، همي مهني ڪي ڪرڻو هي؟' پرڻو مهني ڪهيو ڪم، 'اُئي، دمشق شهر ڏيشا جا. اوڻ ٽي شجو ڪئين سڻايو جاشي، جڪو ٽي ڪرڻو هي.'¹¹ هون اُوئي تيز اُجائي ري ڪري اونڌو هوئي گيو. اِئيني ري ڪري مهارا ساڻي مهارا هات جهالي مهني دمشق شهر ڏيشا لي گيا.¹² اوڻ حننيا نون رو هيڪ نيڪ منڪ هتو، جڪو شريعت تي بيتو هان دمشق شهر ري شجي يهوديون ۾ تموم گهڻي عزت آلو هتو.¹³ او مهني ڪيڏي آيو هان نيڙو اُئي ڪهيو ڪم، 'پائي سائول، پڙي جو.' اُوئيچ تيم مهاري اونڪي شاجي هوئي هان مهني اُوئي ني ڏينو.¹⁴ تو حننيا ڪهيو ڪم، 'مهوري باب ڏاڏون ري ايشور ٿي اِئيني ري ڪري چونديو هي ڪه تُو اُوئي ري مرضي ني اولڪي هان اُوئي ري نيڪ بونهي پرڻو يسوع ني جوڙي هان اُوئي رو هيلو سڻي.¹⁵ تُو اُوئي ري گواهي ڏئي هان شجون ني سڻائي ڪه ٿي ڪي ڏينو هان ڪي سڻيو هي.¹⁶ اِئيني ري ڪري همي دير ني ڪر. اُئي هان پويتر سنون لي هان پرڻو يسوع ري نون شون پراڻا ڪم، تو ٿارا پاپ معاف هوئي جاوي.'

¹⁷ پڇي هون پاڇو يروشلم شهر ۾ آيو هان جڏي هون ايشور ري گهر ۾ پراڻا ڪرتو پڙيو، تو مهني شينو لادو¹⁸ هان پرڻو يسوع مهني درشن ڏي ڪهيو ڪم، 'چيڪائي ڪم، يروشلم شهر شون نڪري جام ڪيونڪ مهاري باري ۾ جڪو ڪئين تُو منڪون ني ڪئي، او ڪونهي مني.'¹⁹ مهني ڪهيو ڪم، 'پرڻو، اُوئون شجون ني خبر هي جڪو ٿي مني هي، هون اُوئون ني جيت ڪيت پگتي گهرون شون جهالي جبل ڏيراوتو هان مار ڏيراوتو.²⁰ جڏي تاري گواهي ڏيوڻ آلو استيفنس ماريجم، تو هون پي اوڻ هتو، پڻ اُوئي ني مارڻ تي هون خوش هتو هان هون اُوئي ري گاپون رو رڪالو هتو، جڪون اُوئي ني ماريو هتو.'²¹ پڇي پرڻو مهني ڪهيو ڪم، 'جام ڪيونڪ هون ٿي بيبي قومون ڪيڏي الگو الگو ميلين.'²² اتر ري دير توڻي منڪ پولوس ري باتون سڻتا رهيا هان پڇي زور شون ڪيوڻ لاگا ڪم، 'اِئيني ني ماري چوڙو، ڪيونڪ اهڙو منڪ جيتو ني ريوڻ ڪبي.'²³ جڏي او رڙي ڪري آيرا گاپا اُچلاوڻ هان مٽي اُڏاوڻ لاگا،²⁴ تو فوج ري موتي آفيسر آبري فوجيون ني حڪم ڏينو ڪم، "پولوس ني ڪوت ۾ لي جائو هان چاٻڪ هڻي اِئيني شون پوڇو ڪم منڪ ڪيون اِئيني ري خلاف هل هنگومو ڪري پڙيا."²⁵ فوجيون اُوئي ني چاٻڪ هڻڻ ري سارو ٻونديو، تو پولوس اوڻ اُپوڙي آفيسر ني ڪهيو ڪم، "ڪي ٿي قانون تي، بنا ڏوه ثابت ڪرڻ بنا، هيڪي رومي شهري ني چاٻڪ هڻي شگهو هو؟"²⁶ جڏي اُوئي آفيسر اي سڻيو، تو اُوئي موتي آفيسر ڪيڏي جائي ڪهيو ڪم، "تي اي ڪي ڪرو پڙيا؟ او تو رومي شهري هي."²⁷ موتي آفيسر پولوس ڪيڏي جائي پوڇو ڪم، "مهني سڻام ڪي تُو روم ملڪ رو شهري هي؟" پولوس ڪهيو ڪم، "هاوي."²⁸ موتي آفيسر ڪهيو ڪم، "مهني تموم گهڻا رپيا ڏي، رومي شهري هوڻ رو حق ليو هي."²⁹ پڻ پولوس ڪهيو ڪم، "هُون تو جنم شون رومي شهري هون."²⁹ اِي سڻي پوڇا گاپا ڪرڻ آلا فوجي چيڪائي ڪري پولوس شون الگا هويا. جڏي فوج ري موتي آفيسر ني خبر پڙي ڪه اي رومي شهري هي، تو او پي بيٺاجوم ڪيونڪ اُوئي پولوس ني ٻونديو هتو.

پولوس ڌرمي پنچائيت آگهي

30 فوج ري موٽي آفيسر ري مرضي هتي ڪه او سٺي نموني خبرچار آي ڪه يهودي، پولوس تي ڪهڙو الزوم لگاوي هي. ائين ري ڪري اوني پيچي ڏن پولوس ري شونڪڙون ڪولائي هان حڪم ڏينو ڪه ايشور را موتا پوجاري هان سچائي ڌرمي پنچائيت آلا پيڙا هووي. پيچي اوني پولوس ني لائي ائون آگهي اڀاريو.

23

1 پولوس يهودي ڌرمي پنچائيت ڏيشا ڏهيون شون جوئي ڪهيو ڪم، ”مهاري پايون، هون آج ڏن توڻي ساچي من شون ايشور ري مرضي تي بون پڙيو.“ 2 ايشور ري پوجاريون ري سردار حننيا، پولوس ڪڍي اڀوڙي منڪون ني حڪم ڏينو ڪم، ”ايني ري موڏي تي هيڪ ٿاپ هئو.“ 3 تو پولوس اوني ني ڪهيو ڪم، ”اي ننگ، ايشور ضرور ٿئي مارشي. ٿئي تو ڪي ڪه ٿو شريعت تي مهارو انصاف ڪم پڻ ٿو تو اوني ري اُلت مهني مارڻ رو حڪم ڏي پڙيو.“ 4 ايني تي پاشي ۾ اڀوڙي منڪون پولوس ني ڪهيو ڪم، ”قاري اترِي همت ڪه ٿو ايشور ري پوجاريون ري سردار ني گهٽ وڌ ڪي؟“ 5 پولوس بلتي ڏيني ڪم، ”پايون، مهني خبر ڪونهي هتي ڪه آي ايشور ري پوجاريون رو سردار هي ڪيونڪه شاستر ۾ لڪيوڙو هي ڪم.

آپري قوم ري سردار ني پٽ ني.“

6 پولوس ني خبر هتي ڪه پنچائيت ۾ ڪئين صدوقي هان ڪئين فريسي منڪ هي. ايني ري ڪري پولوس ائون ني ڪهيو ڪم، ”مهاري پايون، مهارا باب ڏاڏا فريسي پٽ شون هتا هان هون پي فريسي هون. مهني تي آي ڪيس ايني ري ڪري هي، ڪيونڪه مهارو وشواس هي ڪه موٽوڙا پڙي جيتا هوشي.“ 7 جڏي ائون آي بات سٺي، تو فريسي هان صدوقي منڪون رو آپت ۾ جهيڙو شروع هويو. ايني نموني پنچائيت را بي ٽولا هوني ڪيا. 8 آي بات ايني ري ڪري هوني ڪه صدوقي ڪيتا ڪه موٽوڙا ڪڏي پي جيتا ڪونهي هووي هان فريشتا هان آتما هائي ڪونهي. پڻ فريسي منڪ آي سچي باتون منتا. 9 پيچي جهيڙو بدتو گيو هان ڪئين ڌرمي گرو جڪو فريسي هتا، او جهيڙو ڪري ڪيوڻ لاگا ڪم، ”مهني ايني منڪ ۾ ڪو پي ڏوه ڪونهي ڏيڪتا. هوني شگهي هي ڪه ڪي آتما جون ڪي فريشتي ايني شون بات ڪي هووي.“ 10 پيچي جڏي جهيڙو تموم گهڻو بدڻ لاگو، تو فوج رو آفيسر پيٽاجن لاگو هان شوچن لاگو ڪه ايتون ني هووي ڪه آي منڪ پولوس ني ماري ٿڪڙا ٿڪڙا ڪري چوڙي. ايني ري ڪري اوني آڀري فوجيون ني حڪم ڏينو ڪم، ”هينا جائو، پولوس ني اوت شون زوري ڪاڍي ڪوت ۾ لي آڻو.“ 11 پيچي اونيچ رات برپو يسوع، پولوس ني درشن ڏي ڪهيو ڪم، ”همت ڪم، ڪيونڪه جون ٿي يروشلم ۾ مهاري گواهي ڏيني هي، ايتوج ٿئي روم شهر ۾ پي مهاري گواهي ڏيوڻي هي.“

پولوس ني مارڻ ري رٿا

12 جڏي ڏن اگو، تو يهوديون پيڙا هوني رٿا ڪري شونش ليو ڪم، ”جترِي توڻي مهني پولوس ني مارون ڪونهي، اترِي توڻي مهني نڪو ڪاڻون نڪو پيئون.“ 13 ايني رٿا ۾ چاليهه شون وڌيڪ يهودي پيڙا هتا. 14 ائون ايشور ري موٽي پوجاريون هان يهودي اگوڻون ني جائي ڪهيو ڪم، ”مهون شونش

ليئو هِي ڪه جتري توهي مهِي پولوس ني مارون ني، اُترِي توهي مهِي نڪو ڪائون نڪو پيئون. ¹⁵ اِهي ري ڪري ٿي هان پنچائيت آلا ملي فوج ري آفيسر ني منت ڪرو ڪه پولوس شون پڙي باتون پوچڻ ري شارو تون پنچائيت آتون ڪڍي ميلي. مهِي سنڀريوڙا ريشون هان اوهي ري پڳڻ شون پيل مارگ ۾ اوهي ني ماري چوڻيون. ¹⁶ پڻ جڏي پولوس ري پوڻجِي ني اِهي بات ري خبر پڙي، تو اوهي ڪوت ۾ جائي پولوس ني سڻايو. ¹⁷ اِهي تي پولوس هيڪي آفيسر ني هيلو ڪرائي ڪهيو ڪه، ”اِهي نوجوان ني موٽي آفيسر ڪڍي لي جا، ڪيونڪه اِي اوهي شون بات ڪرشي.“ ¹⁸ پڇي آفيسر اوهي نوجوان ني فوج ري موٽي آفيسر ڪڍي لي گيو هان اوهي ني ڪهيو ڪه، ”قيدي پولوس مهني هيلو ڪرايو هان منت ڪي ڪه اِهي نوجوان ني تون ڪڍي لي ائون، ڪيونڪه او تون شون ڪئين بات ڪرشي.“ ¹⁹ تو فوج ري موٽي آفيسر نوجوان رو هات جهالي اوهي ني هيڪي باشي لي گيو هان پوچو ڪه، ”سڻام ڪهڙي بات هي؟“ ²⁰ اوهي بڻي ڏيني ڪه، ”يهوديون آبت ۾ هيڪ هوهي فيصلو ڪيو هِي ڪه او ٿي منت ڪري ڪه ساڪلي پولوس ني موٽي پنچائيت ڪڍي پوچا گاچا ري شارو آتوي. ²¹ پڻ ٿي اوهن ري بات ني منيام ڪيونڪه چاليه شون وڌيڪ منڪ پولوس تي حملو ڪرڻ ري شارو لڪي پينا هي. اوهن باش باشي شونش ليو هِي ڪه جتري توهي مهِي پولوس ني مارون ني، اُترِي توهي نڪو ڪائون نڪو پيئون. اِهي ري ڪري همي او تيار هِي هان رگو تونرو فيصلِي رو انتظار هِي.“ ²² اِي بات سڻي فوج ري موٽي آفيسر نوجوان ني اِي حڪم ڏينو ڪه، ”ڪيني پي ني سڻائي ڪه ٿي اِي بات مهني سڻائي هِي.“ پڇي اوهي نوجوان ني ميلي چوڙيو.

پولوس ني گورنر فيلڪس ڪڍي ميلن

²³ پڇي فوج ري موٽي آفيسر پيئون آفيسرون ني آتيا هان اوهن ني ڪهيو ڪه، ”بي سڻو فوجي، ستر گهوڙا سوار هان بي سڻو پالا هلاوڻ آلا سڻيائو. اوهن ني آج رات نئو بجي قيصر يا صوبي ڏيشا جاوڻو هِي.“ ²⁴ اوهي اِي حڪم پي ڏينو ڪه، ”پولوس ري شارو سوارِي سنڀرائو هان اوهي ني صوبي ري گورنر فيلڪس ڪڍي سنڀالي پڳائو.“ ²⁵ پڇي فوج ري موٽي آفيسر اوهن ري هاتون اِي خط پي ميلي ڪه، ²⁶ ”ڪلوديس لوسياس ري طرفون صوبي ري گورنر جناب فيلڪس ني نمسڪار. ²⁷ اِهي منڪ ني يهوديون جهاليو هان اِهي ني مارڻ آلا هنام پڻ جڏي مهني خبر پڙي ڪه اِي رومي شهري هِي، تو هون فوجي لي گيو هان اِهي ني چوڙائي لي آيو. ²⁸ ڪيونڪه هون جانچ ڪرڻ ري شارو ڪرتو ڪه او اوهي تي ڪهڙو ڏوه لگاوي هِي، اِهي ري ڪري هون اوهي ني يهوديون ري موٽي پنچائيت ۾ لي گيو. ²⁹ اوڻ مهني خبر پڙي ڪه او آڀري شريعت ري باتون تي اوهي ني ڏوهي ڪري پڙيا. پڻ اِهي اهڙو ڪو پي ڪوم ڪونهي ڪيو، جڪي ري ڪري اِهي ني موت جون قيد ري سزا ڏيني جاوي. ³⁰ پڇي جڏي مهني خبر پڙي ڪه اِهي ني مارڻ ري رٿا هوهي هِي، تو مهني يڪدم اِي فيصلو ڪيو ڪه اِهي ني تون ڪڍي ميلون. مهني اِهي تي الزوم هڻڻ آتون ني پي تون ڪڍي مليا هِي ڪه او آڀري باتون سڻايو.“

³¹ پڇي فوجيون اوهي ري حڪم تي پولوس ني آپ پڙو ليئو هان راتو رات اوهي ني آنتپترس شهر ۾ پڳايو. ³² پڇي پيچي ڏن او فوجي ڪوت ڏيشا پاچا گيا هان گهوڙي سوار پولوس ني آگهي ڪري لي گيا. ³³ اوهن قيصر يا صوبي ۾ پڳي گورنر ني او خط ڏينو هان پولوس ني پي اوهي ري حوالي

کینو. ³⁴ پچي صُوبِي زي گورنر خط پڙهي پولوس شون پوچو ڪم، ”تو ڪئي صُوبِي رو هي؟“ پولوس اُوئي ني بلتي ڏيني ڪم، ”هُون ڪلڪيا صُوبِي رو هون.“ ³⁵ پچي گورنر ڪهيو ڪم، ”هُون تارو فيصلو اُوئي تيم ڪرين، جڏي تي تي الزوم هڻڻ آلام او پي ايٽ هووي.“ پچي اُوئي حُڪم ڏينو ڪم، ”پولوس ني هيروديس بادشاه ري ناهيوڙي ڪوت م قيد راکو.“

يهوديون رو پولوس تي ڪيس

24 ¹ پونچون ڏنون شون پچي ايشور زي پوجاريون رو سردار حننيا ڪينڪه اگووئون هان ترططس نون ري هيڪي وڪيل پيرو قيصريا شهر م آيو. او صُوبِي زي گورنر فيلڪس ڪڍي گيا ڪم او پولوس تي الزوم هڻي. ² جڏي پولوس ني هيلو ڪرايو، تو ترططس اُوئي تي الزوم هڻي ڪيوڻ لاگو ڪم، ”جناب فيلڪس صاحب، تي شمعهداري شون حڪومت ڪرو پڙيا، جڪي ري ڪري مهني خوش بينا هون هان تاري شمعهداري ري ڪري ايني قوم ري ترقي هوئي هي. ³ تاري ايني مهربوني ري ڪري مهني هر نموني شون هان جيٽ ڪيٽ تارا تموم گهڻا ثورائتا هون. ⁴ هون تني گهڻي تڪليف ڪونهي ڏيون. ايني ري ڪري تني منت ڪرون هون ڪم مهربوني ڪري مهوري ڪنين منت سُڻ. ⁵ مهون ڏينو هي ڪم اي منڪ خطرناڪ هي هان سجي دنيا ري يهوديون م گوڙ گهاتي هي هان يسوع ناصري ري بنت رو اگوڻ هي. ⁶ هيڪ گهمرو ايني مهوري، ايشور ري گهر ني پليت ڪرڻ ري ڪوشش ڪي هتي، پڻ مهون ايني ني جهاليو. [مهوري مرضي هتي ڪم ايني رو فيصلو آپني شريعت تي ڪرون. ⁷ پڻ فوج رو موتو آفيسر لوسياس آيو هان ايني ني زوري مهوري هائون ڪوشي لي گيو. ⁸ اُوئي ايني تي الزوم هڻڻ آئون ني حُڪم ڏينو ڪم تون ڪڍي آوي.] همي تي آپ ايني شون ايني سجي باتون ري باري م پوچو، جڪو مهني ايني تي الزوم هڻون پڙيا.“ ⁹ پچي شجائي يهودي اُوئي پڙا هوئي ڪيوڻ لاگا ڪم، ”اي شاجي ڪي هي.“

پولوس رو آپري باري م سٽاڻ

¹⁰ پچي جڏي گورنر پولوس ني بولڻ رو اشارو ڪينو، تو پولوس ڪهيو ڪم، ”سائين، مهني خبر هي ڪم تي شالون شون ايني قوم را فيصلا ڪرو پڙيا، ايني ري ڪري هون تموم گهڻي خوشي شون آپري باري م چتو سٽائون هون. ¹¹ تي آپ جانچ ڪري شگهو هو ڪم بارهي ڏن هويا ڪم هون يروشلم شهر م پگني ڪرڻ گيو هتو. ¹² نڪو ائون مهني ايشور ري گهر م ڪي شون بحث ڪرتي ڏينو هان نڪو پگني گهرون جون اينا اونا شهر م گوڙ ڪراوتي ڏينو. ¹³ جڪي باتون رو همي اي مهني تي الزوم لگاوي پڙيا، او تونري روبرو ثابت ڪري ڪونهي شگهتا. ¹⁴ پڻ هون اي بات منون هون ڪم هون آپري باب ڏاڏي ري ايشور ري پگني پڙيو يسوع ري بتايوڙي شاجي مارگ تي ڪرون هون، جڪي ني اي منڪ غلط پنت شمعجهي هي هان جڪو ڪين توريت شاستر هان نبيون ري شاسترون م لڪيوڙو هي، ائون شجون باتون تي مهارو وشواس هي. ¹⁵ هون ايشور شون اوج اميد راکون هون. جڪو اي پي راکي هي ڪم ايشور سجي نيڪ هان بچڙي منڪون ني پڙي مونوڙون شون جيتا ڪرشي. ¹⁶ ايني ري ڪري مهاري هميشا ڪوشش هي ڪم مهارو من ايشور هان منڪون آگهي آچو اوجلو ري. ¹⁷ تموم گهڻي شالون شون هون يروشلم شهر شون باهر هتو. پچي هون آپري

قوم نِي امدادي ڳاڻو هانَ بليدون ڪرڻ ايت آيو. 18 جڏي ايتون مهني ايشورَ ري گهر ۾ ڏينوم تو مهني پويتر هوڻن ري ريت ڀوري ڪي هتي. اوت مهني پيڙا نڪو منڪ هتا هانَ نڪو مهني ڪو گوڙ ڪيئو. 19 هاوي، آسيا صوبي را ڪئين يهودي اوت هتا هانَ جي اوتون ني مهني تي ڪو الزوم هئو هتو، تو او تون ڪيدي آئي مهني تي ڪيس ڪرون تو. 20 جون آي منڪ ڪي ڪه جڏي مهني آڀري ڌرمي پنچائيت آگهي لي آيا هتا، تو ايتون مهني ۾ ڪهڙو ڏوه ڏينو؟ 21 مهني ايتون آگهي تموم گهڻي زور شون رگو آي بات ڪي هتي ڪه، ’آج ٿي مهني تي ايني ري ڪري ڪيس هلائو پڙيا ڪه مهارو وشواس هي ڪه منڪ پڙي موٽڙون شون جيتا هوئي جاشي.‘ 22 پڇي فيلڪس ڪيس ني آڀاري چوڙيو. او پڙيو يسوع ري بتايوڙي مارگ ني شني نموني اولڪنو. اوتني ڪهيو ڪه، ”جڏي فرج رو موٽو آفيسر لوسياس آشي، تو هون تونري ڪيس رو فيصلو ڪرين.“ 23 پڇي اوتني هيڪي آفيسر ني حڪم ڏينو ڪه، ”پولوس ني جيل ۾ تو راکيا، پڻ گهڻي سختي ني ڪريا هانَ جي اوتني را منڪ اوتني ري شيوا ڪري، تو اوتون ني پاليا ني.“

پولوس رو پڙيو يسوع ري باري ۾ سڻاڻ

24 پڇي ڪئينڪه ڏنون شون پڇي فيلڪس آڀري لگائي ڊروسلا جڪو يهودي قوم ري هتي پيڙي لي آيو. اوتني پولوس ني هيلو ڪرايو هانَ مسيح يسوع تي وشواس راکڻ آتون ري باري ۾ باتون سڻي. 25 پڻ جڏي پولوس سچائي، آيو آپ تي ڪاڻو راکڻ هانَ انصاف ري اوڻ آئي ڏن ري باري ۾ سڻاوتو پڙيو، تو فيلڪس بيٺاجو هانَ ڪيوڻ لاگو ڪه، ”همي تو جائي شگهي هي. جڏي هون ووندو هويوم، تو پڙي ٿني هيلو ڪرائين.“ 26 اوتني ني آي پي آشرو هتو ڪه پولوس اوتني ني رشوت ڏيشي. ايني ري ڪري فيلڪس اوتني ني گهڙي گهڙي اڻاوتو هانَ اوتني شون باتون ڪرتو. 27 پڻ پوري بيئون سالون شون پڇي فيلڪس ري جگها تي پڙڪيس فيسٽس گورنر هيو. فيلڪس يهوديون ني خوش ڪرڻ ري سارو ڪرتو ايني ري ڪري اوتني پولوس ني جيل ۾ راکيو.

پولوس ري قيصر بادشاه ني اپيل

1 نوتني گورنر فيسٽس رو صوبي ۾ پڳڻ شون تينون ڏنون شون پڇي، او قيصر يا شهر شون هوئي يروشلم شهر ڏيشا گيو. 2 اوت ايشور را موتا پوجاري هانَ يهودي آگوڻ اوتني ڪيدي آيا هانَ پولوس تي الزوم هڻڻ لاگا. 3 اوتون گورنر ني منت ڪي ڪه او پولوس ني يروشلم شهر ۾ اٿاوي. اوتون آي ايني ري ڪري ڪهيو، ڪيونڪه اوتون پولوس ني مارگ ۾ لڪي مارڻ ري رٿا ڪي هتي. 4 پڻ فيسٽس ڪهيو ڪه، ”پولوس تو قيصر يا شهر ۾ قيد هي هانَ هون آپ اوت جاوڻ آڻو هون. 5 ايني ري ڪري تون ۾ جڪو آگوڻ هي، او مهني پيڙا قيصر يا ۾ هالي هانَ جي اوتني منڪ ۾ ڪو ڏوه هي، تو اوت اوتني تي ڪيس ڪريا.“

6 پڇي فيسٽس آت ڏن يروشلم شهر ۾ رهيو هانَ پڇي قيصر يا شهر ڏيشا گيو. اوت پيڇي ڏن او فيصلو ڪرڻ بنو هانَ پولوس ني اوت لي اوڻ رو حڪم ڏينو. 7 جڏي پولوس ني اوت لي آيا، تو يهودي جڪو يروشلم شهر شون آيوڙا هتا هانَ او اوتني ري چوڌاري آيا هانَ اوتني تي تموم گهڻا ڏوه هڻڻ لاگا، پڻ ڪو پي ڏوه ثابت ڪري ڪونهي شگهيا. 8 پولوس آڀري باري ۾ ڪيتو رهيو ڪه، ”مهني يهودي شريعت، ايشورَ ري گهر هانَ قيصر

بادشاه رِي خلاف ڪئين ڪونهي ڪيئو. “⁹ فيسٽس يهوديون نِي خوش ڪرڻ رِي شارو ڪرتو، اِئيني رِي ڪري اُوئي پولوس شون پوچو ڪم، ”ڪي تاري مرضي هِي ڪه تُو يروشلم شهر ڏيندا جاوي ڪه هُون اوت تاري اِئيني ڪيس رو فيصلو ڪرون؟“¹⁰ پولوس ڪهيو ڪم، ”هون رومي بادشاه قيصر رِي ڪورٽ ۾ حاضر هون، اِئيني رِي ڪري مهاري ڪيس رو فيصلو پي ايت هوڻ ڪيئي. تونِي تو شجي خبر هِي ڪه مهِي يهوديون رو ڪو پي ڏوه ڪونهي ڪيئو. ¹¹ جي هُون ڏوهي هون جون مهِي ڪو اهڙو ڪوم ڪيئو هِي، جڪي رِي سزا موت هِي، تو هُون مرڻ رِي شارو تيار هون. پڻ جي اِئينون را الزوم ڪوڙا هِي، تو ڪيئي ڪو پي حق ڪونهي ڪه او مهني اِئينون رِي حوالي ڪري. اِئيني رِي ڪري هُون قيصر بادشاه نِي اپيل ڪرون هون.“¹² اِئيني تي فيسٽس آپري صلاح ڪارون شون صلاح ڪري ڪهيو ڪم، ”تي قيصر بادشاه نِي اپيل ڪي هِي، تو تُو اُوئي ڪيئي جائي.“

پولوس رِي اگريا بادشاه شون ملاقات

¹³ ڪئينڪ، ڏنن شون پچي اگريا بادشاه هان اُوئي رِي پين برنيڪا، قيصر يا شهر ۾ نونِي گورنر فيسٽس شون ملڻ آيا. ¹⁴ او تموم گهڻا ڏن اوت رهيا. فيسٽس، بادشاه نِي پولوس رِي ڪيس رِي باري ۾ سُڻايو ڪم، ”ايت پولوس نون رو هيڪ منڪ هِي، جڪي نِي فيلڪس قيد ۾ چوڙي گيو هِي.“¹⁵ جڏي هُون يروشلم شهر ۾ هتوم، تو ايشور رِي موئي پوجاريون هان يهودي اگروڻون اُوئي تي ڪيس ڪيئو هان مهني منٽ ڪرتا رهيا ڪه اُوئي نِي سزا رو حڪم ڏينو جاوي. ¹⁶ پڻ مهِي اوتون نِي ڪهيو ڪم، ’رومي قانون تي جتري توڻي ڪي منڪ تي ڏوه ڏيون آتون رِي شومهو آپري باري ۾ سُڻاڻ رو موقعو نِي ملي، اترِي توڻي اُوئي نِي سزا ڪونهي ملتي.“¹⁷ پچي جڏي او منڪ ايت آيا، تو مهِي گهڻي دير ڪونهي ڪي هان پچي ڏن فيصلو ڪرڻ پينو هان پولوس نِي آڻايو. ¹⁸ جڏي اُوئي تي ڪيس ڪرڻ آلا مهِي ڪيئي آيا، تو جون مهِي شوچو هتوم، اوتون اُوئي تي اهڙو ڪو پي ڏوه ڪونهي لگايو، جڪي ۾ او ڏوهي هوئي. ¹⁹ او آپري ڌرم هان ڪي يسوع نون رِي منڪ رِي باري ۾ بحث ڪرتا رهيا. الزوم هڻڻ آلا ڪي هِي ڪم، ’او موئو رو- پڻ پولوس ڪي هِي ڪم، ’او جيتو هِي-‘²⁰ مهني آي بات سمجه ۾ ڪونهي آئي ڪه ڪيڪر اِئينون باتون رِي باري ۾ خبر ليئون. اِئيني رِي ڪري مهِي پولوس شون پوچو ڪم، ’ڪي تُو يروشلم شهر ڏيندا جاوڻ رِي شارو خوش هِي ڪه اِئينون باتون رو فيصلو اوت هوئي؟‘²¹ تو پولوس اپيل ڪي ڪم، ’مهاريو فيصلو قيصر بادشاه ڪري-‘ اِئيني رِي ڪري مهِي حڪم ڏينو ڪم، ’جتري توڻي اُوئي نِي قيصر بادشاه ڪيئي نِي ميلون، اترِي توڻي او قيد ۾ هوئي-‘²² اگريا بادشاه فيسٽس نِي ڪهيو ڪم، ”مهاري مرضي هِي ڪه هُون پي اِئيني منڪ رِي بات سُڻون.“ فيسٽس ڪهيو ڪم، ”نيڪ هِي، تو پچي شواري ٿي اُوئي رِي باتون سُڻسو.“

²³ پچي ڏن اگريا بادشاه هان برنيڪا موئي مون شون دربار ۾ آيا هان رومي فوج را موتا آفيسر هان شهر را خاص اگروڻ پي اوتون پيڙا هتا. پچي فيسٽس، پولوس نِي اوت آڻايو. ²⁴ پچي فيسٽس ڪهيو ڪم، ”اي اگريا بادشاه هان شجي منڪون، جڪو منڪ تونري شومهو ايو هِي، اِئيني رِي دانهن ايت رِي هان يروشلم رِي تموم گهڻي يهوديون مهني ڏيني هِي. او اِئيني بات تي زور شون ڪيتا رهيا ڪه اِئيني نِي جيتو نِي چوڙو. ²⁵ پڻ مهني خبر پڙي ڪه اِئيني ڪو پي ڏوه ڪونهي ڪيئو، جڪي رِي ڪري اِئيني نِي موت رِي سزا ملي. پچي جڏي اِئيني قيصر بادشاه نِي اپيل ڪي، تو

مهي ايني ني اوت ميلن رو فيصلو ڪيو. ²⁶ پڻ مهني ايني ري باري ۾ اهڙي ڪي خاص بات ري خبر ڪونهي هي، جڪو هون قيصر بادشاه ني لڪون. ايني ري ڪري آج مهني تون شجون ري شومهو هان خاص ڪري آگريا بادشاه ڪي ايني ني اٿايو هي. هوني شگهي هي ڪه جانچ ڪرڻ شون پچي ڪي اهڙي بات ري خبر پڙي جڪو لڪي جاوي. ²⁷ اي بات مهني شني ڪونهي لاگتي ڪه هون هيڪي قيدي ني تو ميلون، پڻ جڪو الروم اوني تي لاگوڙا هي، اونون ني شني نموني ني لڪون.“

پولوس رو آگريا ني آپري باري ۾ سٿاڻ

26 ¹ آگريا بادشاه پولوس ني ڪهيو ڪه، ”نتي موڪل هي ڪه تو آپري باري ۾ ڪئين سٿا.“ ايني تي پولوس هات رو اشارو ڪيو هان آپري بجا ۾ اينون ڪيوڻ لاگو ڪه. ² ”اي آگريا بادشاه، هون آپني تموم گهڻو پاگ آڻو سمجهون هون ڪه آج تونري شومهو اونون شجي باتون ري باري ۾ بلتي ڏي شگهون هون، جڪي رو ڏوه مهني تي يهوديون لگايو هي. ³ توني تو يهوديون ري شجي ريتون رواجون هان مسئلون ري باري ۾ شني نموني خبر هي. ايني ري ڪري هون توني منت ڪرون هون ڪه مهاري بات ڏهيون ڏي سٿيا. ⁴ شجي يهوديون ني خبر هي ڪه هون جواني شون لي آپري زندگي ۾، آپري ملڪ هان يروشلم شهر ۾ ڪيڪر رهيو. ⁵ او شروع شون مهني اولڪي هي هان جي اونون ري مرضي هي، تو او ايني بات ري گواهي ڏي شگهي هي ڪه هون آپري ڌرم ري شجون شون پڪي هان سخت فريسي پنت ري قانون تي بيتو آيو هون. ⁶ پڻ مهني تي همي رگو ايني ري ڪري ڪيس ني پڙيو ڪه هون ايشور ري اوني واعدي ري اميد راکون هون، جڪو اوني مهوري باب ڏاڏون شون ڪيو هتو. ⁷ اي او واعدو هي، جڪي ني پورو هوڻ ري اميد آڻي يهودي قوم ري ٻارهون قبيلون ني هي هان او پوري من شون ڏن رات ايشور ري پگتي ڪرتا ري هي. اي بادشاه، ايني اميد ري ڪري، يهودي مهني تي الزوم هڻي پڙيا. ⁸ تي شجائي منڪ جڪو ايت هو، اي بات ڪيون ڪونهي منتا ڪه ايشور منڪون ني مونڙون شون پڙي جيتا ڪري شگهي هي؟ ⁹ هيڪ اهڙو تيم پي هتو، جڏي هون يشوع ناصر ري نون ري هر نموني گلا ڪرڻ آپرو فرض سمجهتو. ¹⁰ ايني ري ڪري مهني يروشلم ۾ ايشور ري موٽي پوجاريون ري موڪل شون تموم گهڻا وشواسي قيد ڪرايا. جڏي اونون ني نپ مارڻ ري سزا ڏيني جاوتي، تو هون پي اي صلاح ڏيتو. ¹¹ اوني شون نال مهني شجي پگتي گهرون ۾ تموم گهڻا گهمرا اونون ني سزا ڏيرائي هان اونون ني مجبور ڪيا ڪه او بريو يسوع ري خلاف بات ڪري. مهني اونون تي اتر تي اتر ري ريش اوتي ڪه هون بيچي شهرن ۾ پي جائي اونون ني تنگ ڪرتو.“

پولوس رو وشواس

(ڪوم 9:19-16:22)

¹² پچي پولوس ڪهيو ڪه، ”هيڪ گهمرو هون ايشور ري موٽي پوجاريون شون اختيار هان موڪل رو خط لي دمشق شهر ڏيشا جاوتو پڙيو، ¹³ تو اي بادشاه، مهني پييار ري تيم مارگ ۾ شوج شون پي وڌيڪ تيز اڃالو ڏينوم، جڪو آڪاش شون آيو هان او مهاري هان مهاري ساڻيون ري چوڌاري

چمکيو. ¹⁴ مهی شجائي ڌرتي تي کريا هان مهی عبراني بولي ۾ هيڪ آواز سُٺيو ڪم، 'سائول، اي سائول، تُو مهني ڪيئون تنگ ڪري هي؟ ايئون ڪرڻ شون ٿارو آبرو نقصون هوشي. ' ¹⁵ مهی پوچو ڪم، 'پريو، تُو ڪٿ هي؟' پريو يسوع ڪهيو ڪم، 'هُن يسوع هون، جڪي ني تُو تنگ ڪري هي. ¹⁶ پڻ همي تُو اُئي اُپ، ڪيونڪه مهی ٿئي ايئي ري ڪري درشن ڏينو هي ڪه ٿئي آيري شيوا ري شارو راکون ڪه ٿي جڪو ڪئين آج مهاري باري ۾ ڏينو هان جڪو ڪئين هون ٿئي بتائين، تُو اُونون باتون ري گواهي منڪون ۾ ڏي. ¹⁷ هون ٿئي يهوديون هان پيچي قومون شون، جڪون ڪيدي هون ٿئي ميلڻ آڻو هون، ٿئي بچاوتو رئين. ¹⁸ ٿئي اُونون ري اونڪي ڪولٽي هي هان اُونون ني انداري شون ڪاڍي اُجائي ڏيشا هان شيطون ري هاڻون شون چوڙائي ايشور ڏيشا لي آوڻا هي. ايئي نموني مهی تي وشواس راکڻ شون اُونون را پاپ معاف هوشي هان او ايشور ري چونديوڙي منڪون پيڙا ملي جاشي. ' ¹⁹ اي اگريا بادشاهم ايئي ري ڪري مهی پوري من شون آڪاش شون درشن ڏيوڙي آڻي ري بات مني. ²⁰ مهی پيل دمشق شهر ري منڪون ني، پيچي يروشلم شهر هان شجي يهوديا علائقي ۾ ريوڻ آڻون ني هان پيچي پيچي قومون ني جائي سُٿايو ڪم، 'توبهون ڪرو هان آيرا من ايشور شون لگائو هان اهڙا ڪوم ڪرو، جڪي شون خبر پڙي ڪه ٿون شاجي توبهون ڪي هي. ' ²¹ ايئي باتون ري ڪري يهوديون مهني ايشور ري گهر ۾ جهاليو هان پيچي مارڻ ري ڪوشش ڪي. ²² پڻ ايشور آج ڏن توڻي مهارو مددگار هي. ايئي ري ڪري هون شاجو سُورو هون هان شجي نبيون موتون آگهي گواهي ڏيون هون. هون اوج باتون سُٿائون هون جڪي ري باري ۾ موسي هان نبيون پيل سُٿايو هتو ڪه آي ضرور هوشي ²³ ڪم، مسيح ڏک ڏيڪشي هان مري جاشي. او پيلڪو منڪ هوشي، جڪو مُوٽورون شون جيتو هوشي هان ايئي نموني او يهوديون هان پيچي قوم ني مُگتي ري اُجائي ري باري ۾ سُٿاشي. ' ²⁴ جڏي پولوس آيري باري ۾ ايئون ڪيتو پڙيو، تو فيسٽس زور شون ڪهيو ڪم، 'اي پولوس، تُو ڪالهو هويو رو، تموم گهڻي جاڻ ٿئي ڪالهو ڪيئو رو. ' ²⁵ پولوس ڪهيو ڪم، 'فيسٽس سائين، هون ڪالهو ڪونهي، هون شاجي هان سمجه آڻي باتون ڪرون پڙيو. ²⁶ اي بادشاهم ٿي ايئي باتون ري باري ۾ سُئي نموني سمجهو هو هان هون بنا پي ٿون شون باتون ڪري شگهون هون. آي ايئي ري ڪري هي ڪه مهني پروسو هي ڪه آي باتون ٿون شون ليڪيوڙي ڪونهي، ڪيونڪه آي باتون ڪي اُوڻي ڪوڻي ۾ ڪونهي هوي. ²⁷ اگريا بادشاهم ڪي ٿي نبيون ني منو هو؟ مهني خبر هي ڪه ٿي منو هو. ' ²⁸ ايئي تي اگريا بادشاهم پولوس ني ڪهيو ڪم، 'واهم، تُو تو توڙي تيم ۾ باتون سُٿائي ڪوشش ڪري پڙيو ڪه هون پي مسيح تي وشواس راکون. ' ²⁹ پولوس ڪهيو ڪم، 'توڙي جون گهڻي تيم ري بات ڪونهي، پڻ هون تو ايشور شون پراڻا ڪرون پڙيو ڪه ني رگو ٿو، پڻ جترا پي آج مهاري باتون سُٿي پڙيا، او مهني آڻي ڪار پريو يسوع تي وشواس راکڻ آڻا هوي جاوي، پڻ مهني آڻي ڪار قيد نا. ' ³⁰ ايئي شون پيچي اگريا بادشاهم اُوڻي ري بين برنيڪي، گورنر فيسٽس هان اُوڻي پيڙا بينوڙا باقي منڪ اُنيا ³¹ هان اُوڻي جگها شون ٻاهر جائي هيڪي پيچي ني ڪيوڻ لاگا ڪم، 'ايئي منڪ اهڙو ڪو پي ڏوه ڪونهي ڪيئو، جڪي ري ڪري ايئي ني قيد جون موت ري سزا ڏيني جاوي. ' ³² پيچي اگريا بادشاهم فيسٽس ني ڪهيو ڪم، 'جي ايئي قيصر بادشاهم ني اڀيل ني ڪي هوونت، تو مهني ايئي ني ڦٽو ڪرون تو. ' "

پولوس ني روم شهر ميلن

27

¹ جڏي آي فيصلو هويو ته مهڙي ۾ چڙهي اٽلي ملڪ ري روم شهر ڏيشا جاشون، تو پولوس هان ڪئين بيجون قيديون ني

جوليس نون ري رومي آفيسر ري حوالي ڪيائ، جڪو قيصر بادشاه ري موٽي تولي رو هيڪ آفيسر هتو. ² مهڙي ادرمٽيم شهر ري

بيٽون ري اڏي شون چڙهي بٽير هويا. آي بيٽو آسيا صوبي ري پاشي آلي شهرون شون هوئي آگهي جاوڻ آلو هتو. مهون پيٽو ارسترخس نون رو هيڪ

منڪ پي هتو، جڪو مڪڏونيا صوبي ري ٿيسلينڪي شهر رو هتو. ³ پيچي ڏن جڏي مهڙي صيدا شهر ڳام، تو جوليس پولوس تي مهربوني ڪي

هان اوئي ني آپري دوستون شون ملڻ ري موڪل ڏيئي ته او پولوس ري ميموٽي ڪري. ⁴ پيچي مهڙي صيدا شهر شون بٽير هويا. ڪيونڪه شومهو

بائرو هتو، ايئي ري ڪري مهڙي ڪپرس بيت ري آل ۾ ٿوئا. ⁵ پيچي مهڙي ڪلڪيا هان بمفليا صوبي ري شموندر شون هوئي لوڪيا صوبي ري مورا

شهر ۾ اٿريا. ⁶ فوج ري آفيسر ني اوت اسڪندريا شهر رو هيڪ بيٽو مليوم، جڪو اٽلي ملڪ ڏيشا جاوڻ ري شارو تيار هتو. اوئي مهون ني اوئي بيٽي

تي بيشاڙيا. ⁷ بيٽو تموم گهٽا ڏن هئي هئي بيتو رهيو هان مهڙي تموم گهٽي ڏڪون شون پيچي، ڪنڊس شهر ري نيٽا ڳا. بائيري ري زور ري ڪري

مهڙي آگهي ڪونهي بڏيا. ايئي ري ڪري مهڙي ڪريتي بيت ري سلبيمني نون ري جگها ري نيٽا ڳي ڪريتي بيت ري آل ۾ بيوڻ لاگا. ⁸ تموم

گهٽي ٽڪليف شون اوئي ڪپ شون بني لسيا شهر ري نيٽا اوئي جگها ڳا جڪي ني ”بيٽا اڀاڙڻ ري شني جگها“ ڪيئا. ⁹ اوت مهون ني تموم گهٽا

ڏن ريوٽو پٽيو، ڪيونڪه روزون را ڏن ختم هويا هتا هان اوئي مند ۾ شموندر رو سفر ڪرڻ تموم گهٽو خطرناڪ هتو. پيچي پولوس اوئون ني صلاح

ڏيئي ته، ¹⁰ ”پايون، مهني ايئون لاڳي هي ته آگهي سفر ڪرڻ ڏڪيو هوشي. ني رگو سيمون هان بيٽي رو تموم گهٽو نقصون هوشي، پڻ آڀو

پي نقصون هوشي.“ ¹¹ پڻ بيٽي ري مالڪ هان بيٽو هلاوڻ آلي بيئون آگهي جاوڻ رو ڪهيو هان فوج ري آفيسر پولوس ري نام، پڻ اوئون ري بات

مني. ¹² هيڪ پيچي بات آي پي هتي ته شياڻي ري مند پي شروع هوڻ آلي هتي هان بيٽا اڀاڙڻ ري جگها شياڻي ري شارو شني پي ڪونهي هتي.

ايئي ري ڪري شجون منڪون ري صلاح هتي ته اوٽ شون بٽير هوئي فينڪس شهر ڏيشا هالون هان شياڻي رو اوٽج رون. فينڪس شهر ڪريتي

بيت ري هيڪ جگها هتي، جڪي رو موندو اتر آٽوٽي هان ڏڪڻ آٽوٽي ڏيشا هتو.

شموندر ۾ طوفون

¹³ جڏي ٿوڙو ٿوڙو ڏڪڻ رو بائيرو ڪلبوم، تو او شمجها ته همي مهڙي سفر ڪري شگهون هون. ايئي ري ڪري اوئون بيٽي را لنگر ڪاڍيا هان ڪريتي

بيت ري ڪپ شون آگهي بڏڻ لاگا. ¹⁴ پڻ ٿوڙي دير شون پيچي بيت شون هيڪ موتو طوفون آيو، جڪي ني ”يورا ڪلون“ ڪي هي. (يورا ڪلون

رو مطلب هي ”اٽر اوگوٽي رو بائيرو.“) ¹⁵ بيٽو اوئي طوفون ۾ ڦاٽو هان بائيري شومهو بي ڪونهي شگهيو، ايئي ري ڪري مهون مجبورِي ۾ بيٽي

ني بائيري ري زور تي بيوڻ ڏينو. ¹⁶ پيچي بيٽو بيتو ڪودا نون ري هيڪي نني بيت ري ڏڪڻ ڏيشا ڳو هان اوٽ بائيري شون ڪئين بچا هيو.

پيچي مهون تموم گهٽي ٽڪليف شون بيٽي لاري ٻاڏوڙي بچاوڻ آلي بيٽي ني ڪاڻو ڪي ¹⁷ هان اوئي ني بيٽي ۾ چاڙهي. پيچي بيٽي ني پاڳڻ شون

بچاڻڙي ري شارو هينا شون رنڊوڙي بونڊي ڪاڻو ڪيئو، پڻ تو پي بي هتو ڪه ٻيڙو سُورتيس ري ڪپ نيڙو بيٺو ۾ ڦاشي ني جاوي. ايني ري ڪري اُونڻ ٻيڙي رو گاپو اُتاريو هانَ ٻيڙي ني بائيري ري زور ڏيما بيوڻ ڏينو. ¹⁸ ٻيڙي ڏن پي طوفون ري ڪري ٻيڙو لوڏا ڪاوڻ لاڳو، تو ٻيڙي ۾ راکيوڙو سيمون شُمندري ۾ نوڪيو. ¹⁹ اُوئي شون پڇي ٻيڙي ڏن اُونڻ آڀري هائون شون ٻيڙي ني هلاوڻ آڻو خاص سيمون پي اُچلائي چوڙيو. ²⁰ جڏي تموم گهڙي ڏنون توڙي نڪو سُورج نڪو تارا ڏيڪيجڻ ۾ آيا هانَ بائيرو پي تيز هتو، تو مهوئي بچڻ رو ڪو پي آشرو ڪونهي هتو. ²¹ جڏي اُونڻ گهڙي ڏنون شون ڪئين ڪونهي ڪاڌو، تو پولوس اُونڻ ري بچ ۾ اُپي ڪهيو ڪم، ”پايون، جي تون مهاري بات مني هوونت هانَ ڪريتي بيت شون ني هاليا هوونت، تو آي نقصون هانَ تڪليف آيون تي ڪونهي ائون تو. ²² همي هون توني صلاح ڏيون هون ڪه حوصلو راکوم، ڪيونڪه آبي شجائي بچي جاشون، پڻ رگو ٻيڙو ٻوڏي جاشي. ²³ ايني رو ڪارڻ آي هي ڪه هون جڪي ايشور رو شيواداري هون هانَ جڪي ري هون پگتي ڪرون هون، اُوئي رو فريستو ڪالهي راتي مهِي ڪڍي آئي اُپو ²⁴ هانَ ڪهيو ڪم، ’اي پولوس، تُو ني پيئاج، تُو ضرور قيصر بادشاه ڪڍي جائي. جو، ايشور ئي تي مهروني ڪي هي، جڪو منڪ ئي پيڙا ٻيڙي ۾ هي، او شجائي ٿاري ڪري بچي جاشي.‘ ²⁵ ايني ري ڪري پايون، حوصلو راکوم، ڪيونڪه مهارو ايشور تي پڪو وشواس هي ڪه جون مهني سُٺايو هي، ايشور هوشي ²⁶ هانَ آبي ضرور ڪي بيت تي پُگشون.“

²⁷ جڏي بي هفتا طوفون ري ڪري مهورو ٻيڙو آريا شُمندري ۾ اينا اونا پوتڪيجنو رهيو، تو آڏي رات رو ٻيڙي هلاوڻ آئي ني خبر پڙي ڪه مهِي زمين ري ڪي ڪپ ري نيڙا هون. ²⁸ اُونڻ پوڻي ني ماڀي جويو، تو اُونڻ ني خبر پڙي ڪه اوندائي هيڪ سئو بيش ڦٽ هي. پڇي توڙو آگهي جائي ڏينو، تو نوي ڦٽ هتي. ²⁹ اُونڻ ني بي هتو ڪه ڪيت ٻيڙو پٿرون آئي ڪپ شون ني لاڳي. ايني ري ڪري اُونڻ لاري شون چار لنگر گهاتيا هانَ پرائنا ڪرنا رهيا ڪه يڪدم ڏن اُگي. ³⁰ ايني تي ٻيڙو هلاوڻ آئي ڪوشش ڪي ڪه ٻيڙي شون ناشي جاوي. ايني ري ڪري اُونڻ بچاڻڙي آئي ٻيڙي ني شُمندري ۾ گهاتي هانَ بهانو ناهيو ڪه او ٻيڙي را آگلا لنگر هئي پڙيا. ³¹ پولوس فوج ري آفيسر هانَ اُوئي ري فوجيون ني ڪهيو ڪم، ”جي ٻيڙو هلاوڻ آلا ٻيڙي ۾ ني هويام، تو ٿي بچي ڪونهي شگهو.“ ³² پڇي فوجيون بچاڻڙي آئي ٻيڙي ري رنڊوڙي باڊي اُوئي ني شُمندري ۾ چوڙي ڏيني. ³³ جڏي ڏن اُگڻ آڻو هتو، تو پولوس شجون ني ٻائي ڪاوڻ ري شارو منت ڪي هانَ ڪهيو ڪم، ”آج چئوڏي ڏن هويام، ٿي پريشوني ۾ طوفون اُپڻ ري انتظار ۾ هو هانَ تون ڪئين ڪونهي ڪاڌو. ³⁴ ايني ري ڪري هون توني منت ڪرون هون ڪه ٻائي ڪاڻو ڪه ٿي جيتا رو. گتتي ني ڪرو، تون ۾ ڪيرو پي بال جترو پي نقصون ڪونهي هوئي.“ ³⁵ آي ڪيوڻ شون پڇي پولوس ٻائي لي هانَ شجون ري شومهو ايشور رو شڪر ڪيئو. پڇي او ٻائي پونگي ڪاوڻ لاڳو. ³⁶ آي جوئي شجون ني همت ملي هانَ او پي ٻائي ڪاوڻ لاڳا. ³⁷ ٻيڙي ۾ مهِي شجائي بي سئو چاهتر منڪ هتا. ³⁸ جڏي ڏنو ڪري ٻائي ڪاڏي، تو اُونڻ ڪڻڪ ني شُمندري ۾ نوڪي ڪه ٻيڙي ۾ پار گهت هوئي.

بيٽي رو ٻوڏڻ

39 جڏي ڏن اڳو، تو ٻيڙو هلاوڻ آئون ني ڪپ ڏيڪيجڻ ۾ آيم، پڻ او اوي علائقي ني اولڪي ڪونهي شگهيا. اوڻ اوئون ني هيڪ اهڙي جگهيا ڏيڪيجڻ ۾ آئي، جيت شون شموندر رو پوڻي شوڪي پاشي شون هيئا جاتو هان اوئي رو ڪپ صحيح هتو. ايئي ري ڪري اوئون آيت ۾ صلاح ڪي ڪه، ”جي هوئي شگهي، تو ٻيڙي ني هلائي اوئي پاشي لي هالون.“ 40 ايئي ري ڪري اوئون لنگر ري رنڊوڙي ڪولي شموندر ۾ اچلائي. ايئي شون پڇي اوئون ٻيڙي رو رڪ مئاوڻ آئي ڏنڊون ري رنڊوڙي پي ڪولي چوڙي هان ٻيڙي رو اگلو ڪاپو ڪولي بائيري ري رڪ ڏيشا بونڊيو ڪه بائرو ٻيڙي ني اگهي لي جاوي. ايئي نموني مهني اگهي ڪپ ڏيشا ٻڌيا. 41 پڻ ٻيڙو اگهي بني بيلو ۾ جائي لاگو هان اوئي رو اگلو پاشو قاشي گيوم پڻ اوئي رو لارلو پاشو موئي چوليون ري ڪري توتڻ لاگو. 42 ايئي تي فوجيون صلاح ڪي ڪه قيديون ني ماري چوڙون. ايئون ني هووي ڪه او پوڻي ۾ تري ناشي جاوي. 43 پڻ فوجي آفيسر اوئون ني پاليا، ڪيونڪه اوئي ري مرضي هتي ڪه او پولوس ني جيتو بچاوي. ايئي ري ڪري اوئي حڪم ڏينو ڪه، ”جڪو تري شگهي هي، او پيل ٿي هتي ڪپ ڏيشا جاوي 44 هان باقي منڪ تڪتون هان ڪئين ٻيڙي ري بيجي شيون ري مدد شون ٻونا جاوي.“ ايئي نموني شجائي منڪ شاجا شورا شوڪي ڌرتي تي پڳا.

پولوس را مالتا بيت ۾ پرچا

1 جڏي مهني خيريت شون اوڻ پڳا، تو مهوني خبر ٻيڙي ڪه اوئي بيت رو نون مالتا هي. 2 اوڻ ري منڪون مهون تي تموم گهڻي 28 مهربوني ڪي. شيائي ري مند هتي هان مي پي برشتو ٻيڙو، ايئي ري ڪري اوئون باشدي ٻاليو هان مهون شجون ري ميموڻي ڪي. 3 پولوس لڪڙيون ري ٻاٽ نائي باشدي ۾ گهاتي، تو تپ ري ڪري هيڪ ناگ نڪريو هان پولوس ري هات ني ڏنگي چنڀري گيو. 4 جڏي بيت ري منڪون ناگ ني پولوس ري هات تي بيٺهجوڙو ڏينو، تو او آيت ۾ ڪيوڻ لاگا ڪه، ”اي منڪ شاجيلي خوني هي. اي شموندر شون تو بچي نڪريو هي، تو پي انصاف ري ديوي ايئي ني جيتو ڪونهي چوڙي.“ 5 پڇي پولوس يڪدم آيو هات چنڊي ناگ ني باشدي ۾ اچلايو، پڻ پولوس ني ڪئين ڪونهي هويو. 6 منڪ ايئي انتظار ۾ هتا ڪه پولوس رو شرير شوحي جاشي، جون او اوچتو مري هيئو ڪرشي. جڏي او اوئي ني دير توڻي جوتا رهيا هان اوئي ني ڪو پي نقصون ڪونهي هويو، تو اوئون شمجهو ڪه او ڪو ڏيوتا هي. 7 اوڻ پاشي ۾ بيت ري سردار پيليئس ري بني هتي. او مهوني آيري گهري لي گيو هان تينون ڏنون توڻي مهوري شئي نموني ميموڻي ڪي. 8 اوئي ڏنون ۾ پيليئس رو ٻاپ تا ري ڪري هان دستون ري ڪري بيمار هتو. پولوس اوئي ڪيڏي گيو هان هات راڪي پراٽنا ڪي، تو او شاجو هوئي گيو. 9 جڏي بيت ري منڪون ني ايئي بات ري خبر پڙي، تو بيجا بيمار پي پولوس ڪيڏي آوتا هان او اوئون ني شاجا ڪرتو. 10 اوئون مهوري تموم گهڻي عزت ڪي هان جڏي مهني ٻيڙي ۾ جاوڻ آلا هتا، تو اوئون مهوني مهوري ضرورت رو شجو سيمون ڏينو.

پولوس رو مالتا بیت شون روم جاوڻ

11 تین مهیٹا مالتا بیت ۾ ریوڻ شون پڇی، مهی اسکندریا شهر ری هیکی پیڙی تی بئیر هويا۔ اونی پیڙی تی جاڙی ڈیوتائون رو نشون ناهیوڙو هتو۔ او پیڙو شیاڻی ری شجی مُند اوڻج بیت ۾ اُپو رهيو۔¹² پڇی مهی سرکوسا شهر ۾ پُگا هان تین ڏن اوڻج رهيا۔¹³ پڇی اوڻ شون مهی ریگیم شهر ۾ پُگا۔ بیجی ڏن ڏکڻ رو بائیرو گلیو، ایڻی ری کری مهی بیئون ڏنون ۾ پُتیلی شهر ۾ پُگا۔¹⁴ اوڻ مهوڻی کئین وشواسی ملیا۔ اُونون مهوڻی شاتون ڏنون ری شارو آپ کیدی ریوڻ ری دعوت ڏینی۔ ایڻی نمونی مهی روم شهر ۾ پُگا۔¹⁵ اوڻ وشواسیون مهوڻی اوڻ ری خبر سُڻی هتی، ایڻی ری کری او اُپس ری بازار هان تین سرائی نون ری جگها تی مهون شون ملڻ آیا۔ اُونون نی جوڻی پولوس نی همت ملی هان اُونی ایشور رو شکر کیو۔¹⁶ جڏی مهی روم شهر ۾ پُگا، تو پولوس نی موکل ملی که او هیکلو آپ تی پهرو ڏیوڻ آڻی فوجی پیڙو ری۔¹⁷ تینون ڏنون شون پڇی پولوس روم شهر ری یهودی اگروڻون نی اُتایا۔ جڏی او پیڙا هويا، تو پولوس اُونون نی کهیو که، ”مهاری پایون، مهی آپری قوم جون آپری باپ ڏاڏی ری ریتون ری خلاف کئین کونهی کیو، تو پی مهنی یروشلم شهر ۾ بونڊی رومیون ری حوالی کیو۔¹⁸ جانچ کرڻ شون پڇی رومیون ری مرضی هتی که مهنی ڦٽو کری، کیونکه مهی کو پی اهڙو کوم کونهی کیو، جکی ری کری مهنی موت ری سزا ڏی۔¹⁹ پڻ جڏی یهودیون فیصلو کونهی منیو، تو مهی لاچاری ۾ قیصر بادشاه نی اپیل کرڻ رو فیصلو کیو۔ مهارو کڏی پی آی مقصد کونهی هتو که هون آپری قوم تی ڏوه لگائون۔²⁰ ایڻی ری کری مهی ٿونی اُتایا که ٿون شون ملون هان بات کرون۔ مهنی ایڻی شونکڙون ۾ ایڻی ری کری بونڊیو هی، کیونکه مهارو وشواس مسیح تی هی، جکی ری امید شجی اسرائیلی قوم نی هی۔“²¹ اُونون پولوس نی کهیو که، ”نکو مهون کیدی یهودیا ری علائقی شون تازی باری ۾ کو خط آیو، نکو مهوڻی پایون ۾ کی آئی تازی باری ۾ کئین سُڻایو هان نکو تازی باری ۾ کی دانهن ڏینی۔²² مهوڻی شجی خبر هی که منک ایڻی پنت نی جیت کیت خراب کی هی، پڻ مهی ٿی شون سُڻڻ آیا هون که ٿارو کهڙو خیال هی۔“²³ ایڻی ری کری اُونون هیڪ ڏن راکيو۔ پڇی تموم گهڻا منک اُونی جگها پیڙا هويا، جیت پولوس ریتو۔ تو پولوس ساکلی شون لی شام توڻی ایشور ری بادشاهی ری باری ۾ اُونون نی شمجهاوتو رهيو۔ او موسی ری شریعت هان نیون ری شاستر شون اُونون نی پرپو یسوع ری باری ۾ آپری باتون مناوڻ ری کوشش کرتو رهيو۔²⁴ کئینکه منکون پولوس ری باتون منی، پڻ کئینکه منکون کونهی منی۔²⁵ جڏی او آپت ۾ کونهی نهیا، تو او اوڻ شون جاوڻ لاگا، پڻ اُونون ری جاوڻ شون پیل پولوس کهیو که، ”پویتر آتما، یسعیاھ نیی ری وسیلی ٿونری باپ ڏاڏون نی شاجی کهیو هی که

26 ایڻی قوم کیدی جا هان اُونون نی کی

که تی گهڙی گهڙی سُڻشوم پڻ شمجهو کونهی

هان گهڙی گهڙی جوشوم، پڻ ڏیکو کونهی۔

27 کیونکه آی منک شوچتا کونهی هان شمجها کونهی،

آي ٻوڙا هويا رام

ايئون آڀري اونگي بند ڪيئي ري۔

ڪيٽ ايئون ني هووي ڪه او آڀري اونڪيون شون ڏيکي،

ڪيٽ ايئون ني هووي ڪه او آڀري ڪونون شون سُڻي،

ڪيٽ ايئون ني هووي ڪه او آڀري من شون شمجهي،

ڪيٽ ايئون ني هووي ڪه او مهِي ڏيشا آوي

هان هون اونون ني شاجا ڪرون۔‘

²⁸ ايئي ري ڪري ٿوئي خبر هوئڻ ڪبي ڪه ايشور ري مگتي رو نياپو پيڄي قومون ڪڍي ڳو رو هان او اوئي ني سُڻشي۔“ ²⁹ [جڏي يهوديون پولوس

ري آي بات سُڻي، تو او آيت ۾ بحث ڪرنا، اوڻ شون ٿوئا ڳيا۔]

³⁰ پولوس پورا بي شال مسواڙ ري هيڪي گهر ۾ رهيو، جيٺ او اونون شجون شون ملتو رهيو جڪو اوئي ڪڍي آتا۔ ³¹ او اونون ني ايشور ري بادشاهي

رو نياپو سُناوتو رهيو هان پريو يسوع مسيح ري باري ۾ شيڪاوتو رهيو۔ آي شجو ڪئين او دليري شون ڪرتو رهيو هان ڪي پي اوئي ني پاليو ڪونهي۔